

کیتابُ اعمالُ رسولاًن

کتاب اعمال رسولان

به زبان گیلکی

www.gilakmedia.com

۱۳۹۸ شمسی

حق چاپ محفوظ است. در صورت استفاده از تولیدات،

لطفا نام وبسایت عنوان شود.

کتاب اعمال رسولان

عیسیٰ مسیح صعود بہ آسمان

۱ ای تئوفیلوس، من می اولی کتاب میان* بنیویستم دربارہی ہمہی کارانی کی عیسائی مسیح شروع بہ انجام و تعلیم بوکودہ بو^۲ تا او روزی کی اون، جہ ہدایت روح القدس، خو رسولانی کی انتخاب بوکودہ بو، دستوراتی فدہ و بزین اون بہ آسمان جور، ببردہ بوبوستہ۔^۳ اون بعد رنج کشن، خو مرگ مرہ، خودش زندہ بہ خو رسولان آشکار کودہ و دلایل فراوانی امرأ ثابت بوکودہ کی زندہ بوستہ۔ چہل روز اوشان آشکار بوستی و خودا پادشاہی جا گب زہی۔^۴ ایبار کی خو رسولان امرأ غذا خوردن دو بو، بفرمأستہ: «اورشلیم ترک نوکونید، روح القدس رافا بیسید کی می پتر وعدہ بدہ بو و می جا بیشنوستیدی۔^۵ چونکی یحیی، شمر آب امرأ تعمید ذبی ولی چند روزی ویشتر نوگذرہ کی شومان روح القدس امرأ تعمید گیریدی.»

۶ عیسی شاگردان، وختی کی دوز ہم ایسہ بید، عیسی جا وورسہ بیدی: «خودا وندا، ہہ زمان میان ایسہ کی او پادشاہی کی امی دشمنان امی دس جا فیگفتیدی، تو قوم بنی اسرائیل واگردانی؟»^۷ عیسی جواب بدہ: «تاریخ و وختانی کی وستی ایتفاق دکفہ می پتر اختیار نہہ و لازم نی یہ شومان بدانید۔^۸ ولی او چیزی کی وستی بدانید ہنہ کی وختی روح القدس شمر نوزول بہ، قوت گیریدی کی اورشلیم و تومامی ییہودیہ و سامرہ استانان میان، تا دورترین نقطہی دنیا، می شاہدان بیدی.»

۹ عیسی بعد گفتن آ حرفان، ہوطو کی اوشان فندرستید، ہمہ تان چومان جُلو ابر میان آسمان جور ببردہ بوبوستہ۔^{۱۰} ہو وخت کی شوئون دو بو و شاگردانم رو بہ آسمان چوم بودوختہ بید، ناخبر دینیدی کی دوتا مرد سیفیڈ لباس دوکودہ اوشان ورجہ ہا ایسہ بیدی۔^{۱۱} اوشان، رسولان بوگفتیدی: «ای جلیل مردا کان، چہرہ آہ بہ ہا ایسہ بیدی، آسمان فندریدی؟ ہہ عیسی کی جہ شیمی میان آسمان جور ببردہ بوبوستہ، ہطوی دووارہ، واگردہ.»

متیاس انتخاب بہ جای یهودای اسخریوطی

۱۲ او وخت رسولان جہ کوهی کی اون ایسم «زیتون» بو واگردستیدی اورشلیم شہر۔ او کوه ویشتر جہ یک کیلومتر، اورشلیم جا فاصلہ ناشتی۔^{۱۳} وختی فارسہ بیدی شہر، ہوشوید ہو بالاخانہی کی شاگردان اقامتگاہ بو۔ پطرس و

* ۱:۱ کی انجیل لوقا نام دارہ

یوحنا، یعقوب و آندریاس، فیلیپس و توما، برتولما و متی؛ یعقوب کی حلفی زای بو، شمعون کی معروف به «غیور» بو، و یهودا، یعقوب زای هم او یه ایسه بید. ۱۴ اوشان، عیسی مار، مریم امرأ و بقیه ئی زناکان و عیسی براران امرأ یکدل توما وخت دوعا کودیدی.

۱۵ ایتا جه او روزان، پطرس توما ایمانداران میان کی حدود صد و بیست نفر بید، به پا بیسه ۱۶،۲۰ و بوگفته: «ای براران و خواخوران، کیتاب مزامیر نیویشته یان و با حقیقت برسه کی روح القدس پیشتران داوود نبی ئی زبان امرأ در مورد یهودا پیشگویی بوکوده بو:

ببه کی اون خانه فوگورده، هیکس او یه ساکن نبه.)*

و هطویم بینیویشته بو بوسته:

ببه کی اون خدمت به خودا، به اینفر دیگر دس بیسپرده ببه.)*

هطو کی دانیدی، یهودا عیسای خیانت بوکوده و با نیشان دئن عیسی جاجیگاه باعث اون دسگیری بو بوسته. ۱۷ یهودا قبل انکی عیسای خیانت بوکونه، ایتا جه امان بو و اون عیسی انتخاب بوکوده بو تا امی مانستن خودای خدمت بوکونه. ۱۸ یهودا خو خیانت وستی پولی کی فیگفته بو، هو پول امرأ ایتا باغ بیهه کی هو باغ میان دمر بکفته زمین سر، اون شکم بترکسته و اون روده فووسته بیرون. ۱۹ توما مردومی کی اورشلیم میان زندگی کودیدی و اخبر بوستیدی و خوشان زبان امرأ او محله «حقل دما»، یعنی زمین خون، نام بنه ییدی.

۲۱ پطرس ادامه بده و بوگفته: «هسه و جه شاگردانی کی توما می سفرا میان، خوداوند عیسی مسیح و امی امرأ بید، ۲۲ یعنی جه او وختی کی یحیی، عیسی مسیح تعمد بده تا روزی کی عیسی جه امی ورجه آسمان جور بیرده بو بوسته، اینفر انتخاب بوکونیم تا امی امرأ عیسی مسیح مردن و زنده بوستن شهادت بده.»

۲۳ هن وستی دو نفر پیشهاد بوکودیدی کی ایتا، یوسف مشهور به «برسابا» بو، ولی اون «یوستوس» دوخوآدیدی و اینفر دیگه یم کی اون نام «متیاس» بو.

۲۴ پس اطو دوعا بوکودیدی: «خوداوندا، تو همه کس قلب جا خبر داری. تو خودت، امر نیشان بدن کی ا دو نفر جا کویتای انتخاب بوکودی ۲۵ تا تی خادم و تی رسول ببه، خدمتی کی یهودای اسخریوطی اون جا رو و اگردانه و بوشو او جایی کی لایقش بو.»

۲۶ بزین قرعه تاوده ییدی و متیاس ایسم بیرون بمو. اطویی اونم او یازده تا رسول امرأ خدمت کون وستی همراه بو بوسته.

* ۲۰، ۱۶: ۲۵، ۶۹، آیه ۲۵

* ۲۰، ۱۶: ۱، ۱۰۹، آیه ۸

روح القدس نزل، پنتیکاست روز میانی

۲
 ۱ ہفت ہفتہ جہ عیسیٰ مسیح زندہ بوستن بوگذشتہ بو کی عید پنتیکاست فارسہ و ہمہ ایمانداران، یکدیل ایجا جمع بوستہ بید ۲ کی ناخبر صدایی کی شبیہ زوزہی باد شدید بو، آسمان جا او خانہ میان کی ہمہ اویہ نیشته بید، بمو و تومام او خانہ پور کودہ. ۳ ایدفعہیی شوالہ یانی، آتش مانستن اوشان چومان ورجہ آشکار بوستید، ہمدیگر جا سیوا بو بوستیدی و ہر کدالم او ایمانداران سر بینشتیدی. ۴ پس ہمہ تان روح القدس جا پور بوستیدی و جہ قوت خودا روح بتانستیدی ایتا ایتا شروع بہ گب زنن بہ زبانان جورواجور بوکونید کی بہ او زبانان ہیچ آشنایی ناشتیدی.

۵ او روزان، یہودیآن خوداترس تومامی قومان، عید پنتیکاست وستی اورشلیم میان بمو بید. ۶ وختی مردومانی کی اویہ جمع بوستہ بید او سر و صدای بیشنوستیدی، تعجب بوکودیدی کی شاگردان اوشان زبانان گب زنن دریدی. ۷ ہمدیگر فندرستیدی و بوگفتیدی: «چوطوی ممکن بہ؟ مگہ آشان ہمہ تان جلیل شین نی بیدی؟» ۸ پس چی بو بوستہ کی امی زبان مادری امرآ گب زنیدی؟ ۹ آمان، ہمہ تان قوم پارتیان، مادیان، ایلامیان و مردومان بین النهرین و یہودیہ و کاپادوکیہ و پونتوس و آسیا استان ۱۰ و فریجیہ و پامفیلیہ و مصر و نواحی لیبی کی قیروان شہر وصلہ و روم زواران، ۱۱ چی یہودی و چی اوشانی کی یہودی بو بوستہ بید، و گرت و عربستان مردومان، ہمہ ایشنوستن دریم کی آسانی کی بہ عیسیٰ ناصری ایمان باوردیدی امی زبانان امرآ خودا عظمت و اون عجیب کاران گب زنن دریدی. ۱۲ ہمہ تان تعجب امرآ ہمدیگر گفتیدی: «چی ایتفاقی دکفتہ؟» ۱۳ ولی بعضیانم مسخرہ کنان گفتیدی: «آشان شراب امرآ مست بوستیدی!»

پطرس پیکام

۱۴ او وخت پطرس او یازدہ تا رسول امرآ ویریشته، بہ پا بیسہ، اوشان طرف واگردستہ و بلند بوگفتہ: «ای ہم شہریان یہودی و ای شومانی کی اورشلیم میان زندگی کونیدی، ان بدانید و ہرچی کی گفتن درم وستی حُب گوش بوکونید! ۱۵ فکر نوکونید امرآ کان مست بوستیدی، چونکی ساعت نہ صبحہ! ۱۶ اونچی کی الان آیہ دنن دریدی یوئیل نبی پیشگوی بوکودہ بو:

۱۷ «خودا بفرمأستہ: «روزان آخر دورون،

می روح بر تومام مردوم فوکونم.

شیمی زاکان چی پسر و چی دوختر، نبوت کونیدی،

شیمی جوانان رویا دینیدی و شیمی پیرانم خواب دینیدی.

۱۸ هطويم هو روزان، تومامی ئی می خدمت گوزاران، چی مردای و چی زنانی،

می روخ جا پور بیدی

و اوشانم نبوت کونیدی.

۱۹ آسمان جور عجایب

و بیجیر، زیمین سر، نیشانه یانی

جه خون و آتش و دود آشکار کونم.

۲۰ قبل اونکی او پيله دانه روز پور جلال خوداوند فارسه،

خورشید تاریک به و ماه به رنگ خون واگرده.

۲۱ اطویی به، هر کی خوداوند نام دوخوانه، نجات پیدا کونه.»*

۲۲ «ای قوم اسرائیل، آن بيشنويد: هوطو کی خودتان دانیدی، عيسای ناصری مردی بو کی خودا، خو معجزات و

عجایب و نیشانه یان امرأ کی اون دس جا شمر آشکار کوده، ثابت بوکوده کی عيسی مأموریت جه اون طرف بو. ۲۳ هن

نقشه و اراده خودا بو کی عيسی، شیمی دس امرأ تسلیم بوسته، و شومانم اون بی دینان دس بیسپردیدی و اوشانم

اون مصلوب کودیدی و بوکوشتید. ۲۴ ولی خودا، عيسی مسیح، بعد اونکی بمرده، زنده کوده، چونکی مرگ قدرت

آن ناشتی کی اون خو چنگال دورون بداره. ۲۵ هوطو کی داوود نبی درباره ئی مسیح بفرماسته:

«خوداوند همیشه می چومانم جلو دینم

کی اون می راست دس ایسه کی نکفم.

۲۶ هن وستی می دیل شاده و می زبانم اون ستایش کونه

و می جان میانم امید دارم.

۲۷ چونکی تو، می پتر، ونالی می جان مرده یان دنیای میان بمانه

و تی پسر جسم کی قدوسه، بعد مردن فاسد به.

۲۸ تو حیات راه مر نیشان بدیی

و تی حضور امرأ، مر شادی جا پور کونی.»

۲۹ «ای براران، تانم شمر ایطمینان امرأ بگم داوود نبی* بمرده و دفن بوسته و اون مقبره یم تا به ایروز هیه باقی

بمانسته. ۳۰ ولی اون، پیغمبر بو و دانستی کی خودا اون ره قسم بوخورده بو کی اینفر جه اون نسل، سلطنت تخت سر

نیشانه. ۳۱ داوود نبی، قبل آنکی بیمیره، مسیح مرگ و اون دوواره زنده بوستن پیشگویی بوکوده و در مورد اون بوگفته:

* ۲۱:۲ یوئیل نبی کیتاب باب ۲، آیه ۲۸ تا ۳۲.

* ۲۹:۲ متن اصلی میان «داوود پاتریازک»

«خودا، دونیا مُردہ یان دورونی اون ترک نوکودہ، و اون جسد ہیچ وخت فاسد نو بوستہ.»*

۳۲ «خودا هہ عیسای سه روز بعد مرگ زندہ کودہ و امان همه تان شاهد ایسیم. ۳۳ اون خودا راست دس ورجہ نیشتہ و روح القدس کی پتر وعدہ بدہ بو، فیگفتہ و اون خو شاگردان فده کی ہسہ شومان اون نتیجہی دینیدی و ایشویدی، ۳۴ چونکی داوود نبی، عیسی مسیح مانستن آسمان جور نوشو، ولی بوگفتہ:

«خودا، می خوداوند مسیح بفرماستہ: «به می راست دس بینیشین ۳۵ تا کی تی دشمنان تی پا جیر تاؤدم.»*»

۳۶ «پس ای قوم اسرائیل، همه تان یقین بدانید کی خودای پتر هہ عیسای کی شومان اون بہ صلیب فکشہ ییدی، خوداوند و مسیح تعیین بوکودہ.»

۳۷ وختی آگبان بيشنوستید، اشان دیلان دورون خیلی غم دکفتہ و پطرس و بقیہی رسولان بوگفتیدی: «ہسہ ای براران، چی وا بوکونیم؟» ۳۸ پطرس و اگر دستہ اوشان بوگفتہ: «وستی توبہ بوکونید و هرکدام شومان عیسی مسیح نام امرأ تعمید بیگیرید تا شیمی گوناہان بخشیدہ بہ و بتانید روح القدس دریافت بوکونید، ۳۹ چونکی آ وعدہ، شومان، شیمی زاکان و تومامی مردومان شینہ کی جہ آ سرزمین دور ایسیدی، یعنی کسان کی امی خوداوند، خودا اوشان دوخوانہ.»

۴۰ پطرس خو گبان زیاد دیگر امرأ شہادت بدہ و اوشان تشویق بوکودہ، بوگفتہ: «شمر جہ آنسل، کی گمراہہ، آزاد کونید!» ۴۱ بزین اوشان کی اون گبان قوبیل بوکودیدی، تعمید بیگفتید. هو روز میان، حدود سه ہزار نفر ایمان باوردید.

ایمانداران زندگی ی موشرک

۴۲ ایمانداران، تومامی خوشان وخت، تعلیم گيفتن وستی در اختیار رسولان نہیدی و ہمدیگر امرأ مشارکت داشتیدی و دوعا کودیدی و مراسم «شام خوداوند» میان شرکت کودیدی. ۴۳ جہ خاطر کی خیلی عجایب معجزہ یان رسولان جا آشکار بوستی، همه تان دیل دورون ترس و احترام بہ خودا دکفتی ۴۴ تومامی ایمانداران ہمدیگر امرأ یکدیل بید و ہرچی کی داشتیدی خوشان میان سہم کودیدی. ۴۵ خوشان ملک و املاک فروختیدی و او پول ہر کسی، ہر چقدر لازم داشتی، فدیدی. ۴۶ اوشان همه تا روزان، یکدیل معبد میانی جمع بوستیدی و خوشان خانہ یان میانم مراسم «شام خوداوند» میان شرکت کودیدی و خوشی و صفای دیل امرأ ہمدیگر مرہ غذا خوردیدی ۴۷ و خودای شکر کودیدی. تومامی مردوم اوشان احترام نہیدی و دوست داشتیدی و خوداوند ہر روزہ کسان کی نجات پیدا کودیدی اوشان جمع اضافہ کودی.

* ۳۱:۲ مزمور ۱۶، آیہ ۱۰

* ۳۵:۲ مزمور ۱۱۰ آیہ ۱

شل مادرزاد شفا دتن

۱ ایتا روز پطرس و یوحنا ساعت سهی بعد از ظهر کی دوعا کودن وخت بو، شوئون دیبید معبد. ۲ هو وخت بیدهیدی کی چند نفر ایتا مرداک، کی شل مادرزاد بو، آوردن دیبید. اوشان همه تا روزان اون معبد دروازه کنار کی «دروازهی زیبا» نام داشتی، نهیدی تا مردوم جا کی شویدی معبد میان، صدقه فیگیره. ۳ هطو کی اون پطرس و یوحنا بیده کی شوئون دیبید معبد میان، خو دس دراز کوده کی اوشان جا صدقه فیگیره. ۴ پطرس و یوحنا بیسهیدی، اون فندرستید و بوگفتید: «امر نیگاه بوکون!» ۵ بزین او مردای اوشان نیگاه بوکوده و منتظر صدقه بو کی اوشان جا فیگیره. ۶ ولی پطرس اون بوگفته: «من پولی نارم تر قدم ولی اونچی کی دارم جه پول بالاتره! به نام عیسای مسیح ناصری ویریز و راه دکف!» ۷ بزین اون راست دس بیگفته و اون به پا بدآشته. فوری اون پا استخوانان قوت بیگفتیدی. ۸ اون بپرسته، خو پا سر به پا بیسه، راه دکفته. هطو کی وازواز کودی، خودای شکر کودی و پطرس و یوحنا امرأ بوشو معبد دورونی. ۹ تومام مردوم، اون راه شوئون و خودای شکر کودن بیدهیدی ۱۰ و بفهمستیدی ان هو گدایی ایسه کی «دروازهی زیبا» معبد کنار نیشتی و صدقه فیگفتی. جه ایثفاقی کی او گدا ره دکفته بو مردوم حاج و واج بید.

پطرس پیام

۱۱ هطو کی او مردای، پطرس و یوحنا امرأ شوئون دو بو و اوشان جا سیوا نوبوستی، تومام مردوم تعجب امرأ «سلیمان ایوان» دورون اوشان طرف بودوستیدی. ۱۲ وختی پطرس او مردومان بیده، واگردسته بوگفته: «ای مردومان اسرائیلی، چره آپیش آمد جا تعجب کونیدی؟ چره امرأ طویی نیگاه کودن دریدی؟ مگر امان، امی خودمان قوت و کردکاران دینی امرأ، امرأک شفا بدیم کی اون تانه راه بشه؟ ۱۳ خودای ایبراهیم و اسحاق و یعقوب، امی پتران خودا، خو خادم، عیسی مسیح جلال فده، هو عیسی کی شومان اون تسلیم بوکودیدی و پیلاطس حاکم ورجه اون انکار بوکودیدی، هر چند کی پیلاطس تصمیم داشتی اون آزاد کونه. ۱۴ ولی شومان بید کی دس رد به سینهی او قدوس و عادل، عیسای مسیح بزهیدی و بخواستیدی کی پیلاطس، اون عوض باراباس قاتل آزاد کونه. ۱۵ شومان چشمهی حیات بوکوشتید ولی خودای پتر، اون جه مُردهیان میان ویریزانه و امان شاهدیم. ۱۶ عیسی نام و قدرت مره امرأک کی شناسیدی و دتن دریدی، قوت فیگفته و هطویم، ایمان به عیسی نام وستی بتانسته شفا بیگیره و شیمی همه تان پهلوساق و سالم بیسه.

۱۷ «هسه ای براران، دانم کی شومان و شیمی پيله دانه آدمان کار، جه جهل و نادانی بو. ۱۸ ولی خودا طویی اونچی کی تومام پیامبران زبان امرأ پیشگویی بوکوده بو، به انجام برسانه: کی مسیح، وا عذاب بکشه. ۱۹ وستی توبه بوکونید

و خدا طرف بآید تا شیمی گوناہان پاک بہ و او وختآن دووارہ زندگی کودن خوداوند ورجہ فارسہ. ۲۰ و خودا، عیسای، او مسیح موعود کی قبلًا شمرہ انتخاب بوکودہبو، اوسہ کونہ. ۲۱ ہطو کی جہ قبلنان، خودا خو انبیای مقدس زبان جا اعلام بوکودہبو، عیسی تا او وختانی کی ہمہ چیز تازہ بہ، وستی آسمان جور بیسہ. ۲۲ موسی نبی، خو قوم بوگفتہ: (خوداوند، شیمی خودا، جہ شیمی برارآن میان پیغمبری می مأنستن شمرہ اوسہ کونہ و شومان وا ہرچی کی شمر گہ، دیل و جان مرہ گوش بدید. ۲۳ ہر کس اون گبان گوش ندہ، وا جہ اسرائیل قوم دورونی ریشہ کن بیہ.) ۲۴ «پیغمبرانم، جہ سموئیل بہ بعد، ہمہ تان دربارہی آ روزان پیشگویی بوکودید. ۲۵ شومان پیغمبران زاکان، وارثان عہد و پیمانی ایسیدی کی خودا شیمی پڑان امرأ دَوستہ. اون، ابراہیم بوگفتہ: (ہمہی قومآن زمین، تی نسل جا برکت بریدی.) ۲۶ ہو زمانی کی خودا خو خادم، عیسای انتخاب بوکودہبو، اون شیمی ورجہ اوسہ کودہ تا شمر جہ شرارت رایان واگردانہ و برکت بدہ.»

پطرس و یوحنا محاکمہ شورای یهود جُلُو

۴ ۱ پطرس و یوحنا مردوم امرأ گب زئن دیید کی کاهنان و معبد نگہبانان فرماندہ و صدوقیان بمویدی. ۲ اوشان ہن وستی خیلی غیظ گیفته بو کی رسولان مردوم تعلیم دەیدی و گفتیدی: چون عیسی جہ مُردہیان زندہ بوستہ، ایماندارانم وختی بیمیرید، دووارہ بہ زندگی واگردیدی. ۳ پس اوشان بیگفتیدی و چونکی غروب دم بو، تا فردا زندان دورون بدآشتیدی. ۴ ولی خیلی جہ اوشان کی رسولان تعلیم بیشنوستہ بید، ایمان باوردیدی و اوشان تعداد نزدیک بہ پنج ہزار نفر فارسہ.

۵ فردا روز رہ، قوم رہبران و پیلہ آدمان و دین علما، اورشلیم میان جمع بوستیدی ۶ و حنا، کاهن اعظم و قیافا و یوحنا و اسکندر و توما کاهن اعظم خانوادہ دور ہم ایسہ بید. ۷ وختی اوشان باوردیدی خوشان میان بہ پا بدآشتیدی، اوشان جا وورسہ بیدی: «کو نام و کو قدرت امرأ مرداک کی نتانستی راہ بشہ، شفا بدیدی؟»

۸ پطرس روح القدس جا پور بوستہ، جواب بدہ: «ای پیلہ کسان قوم و ای مشایخ، ۹ اگہ ایمروز امرأ کار خیر وستی کی امرأک رہ کی شل بو، انجام بدیمی بازخواست کودن دریدی کی اون چوطو شفا پیدا بوکودہ، ۱۰ پس ہمہی شومان و تومامی قوم اسرائیل بدانید کی عیسی مسیح ناصری نام و قوت مرہ امرأ شفا فیگفتہ و ساق و سالم شیمی چومان جُلُو بہ پا ایسہ. شومان عیسای بہ صلیب فکشہ بیدی ولی خودا اون جہ مُردہیان ویریزانہ. ۱۱ ہوطو کی مزمور دورون بمو:

«او سنگی کی شومان، معماران فیشادیدی، سنگ اصلی بو بوستہ» * ۱۲ و ہیکس دیگر ناجی نی بہ، چونکی آسمان جیر نام دیگری بہ جز عیسی نام، انسان رہ وجود نأرہ کی بتانہ امر نجات بدہ.»

۱۳ وختی اوشان پطرس و یوحنا شجاعت بیده‌ییدی و بفهمستیدی کی مردومان ساده و بی‌سواد ایسیدی، تعجب بوکودیدی و بدانستیدی کی اوشان عیسی یاران بید. ۱۴ ولی چون او مرداکی کی شفا پیدا بوکوده‌بو او دو نفر ورجه ایسه‌بو، د گبی ناشتیدی کی به ضد اوشان بزید. ۱۵ اوشان دستور بدیدی کی جه مجلس شورا بیرون بشید و خودشان، مشورت وستی بینشتیدی. ۱۶ همدیگر امرأ بوگفتیدی: «آ دو نفر امرأ چی بوکونیم؟ چونکی همه‌ی مردوم اورشلیم دانیدی کی ایتا پيله معجزه اشان دس جا آشکار بوسته و امان نتانیم منکر بییم. ۱۷ پس بایید تا کی مردومان ویشتری واخبر نوبوستیدی، اوشان وادار بوکونیم د هیکس امرأ دربارہ‌ی آ نام گب نزنید.»

۱۸ او وخت اوشان دوخوادیدی و حکم بوکودیدی کی د هرگز به عیسی نام هیچی نیگید و تعلیمی ندید. ۱۹ ولی پطرس و یوحنا جواب بدیدی، بوگفتیدی: «شومان خودتان بیگید، آیا درسته کی خودای بنیم، شیمی جا ایطاعت بوکونیم؟ ۲۰ چونکی امان نتانیم اونچی کی بیده‌ییم و بیشنوستیم، به زبان ناوریم.»

۲۱ هن وستی او دو نفر بعد تهدید کودن زیاد ول کودیدی، چونکی اوشان مجازات کودن ره راهی نیافتیدی، چره کی تومام مردوم، او شفا وستی کی انجام بوبوسته‌بو، خودای شکر کودیدی. ۲۲ او مردای کی معجزه امرأ شفا پیدا بوکوده‌بو، ویشتر جه چهل سال داشتی.

ایمانداران دعا

۲۳ وختی پطرس و یوحنا آزاد بوستیدی، بقیه‌ی ایمانداران ورجه بوشوییدی و جه هرچی کی قوم پيله کاهنان و پيله آدمان بوگفته‌بید اوشان واخبر بوکودیدی. ۲۴ وختی اوشان بیشنوستیدی کی چی پیش بمو، همه‌تان همدیگر امرأ خوشان دسان به خودا درگاه بوجور ببردیدی، بوگفتیدی: «ای خوداوندی کی بر تومامی کاران حاکمی، ای خالق آسمان و زمین و دریا و هرچی کی اوشان دورون وجود داره، ۲۵ تو خودت روح القدس امرأ به زبان آمی پتر، داوود کی تی خادم بو بوگفتی:

«چره غیریهودیان شورش کونیدی

و مردومان دنیا بیخودی نقشه کشیدی؟

۲۶ پادشایان دنیا و حکمرانان همدیگر مره همدست بیدی

و لشکرکشی کونیدی به ضد خوداوند و اون زای مسیح.*

۲۷ به راستی کی هه شهر میان، هیرودیس پادشاه و پنتیوس پیلاطس حاکم، غیریهودیان و قوم اسرائیل امرأ به ضد تی خادم مقدس، عیسی کی اون مسح بوکودی، همدس بوستیدی ۲۸ تا هرچی کی تی دس و تی اراده مقدر بوکوده‌بو، بر قرار به. ۲۹ هسه ای خوداوند، اوشان زورگویی بی‌دین و تی خادمان شهامت فدن تا تی کلام شجاعت امرأ مردوم

بیگید، ۳۰ و تی دس دراز کون و تی قدرت شفابخش امر فدن تا به نام تی خادم مقدس، عیسیٰ مسیح، پیلہ دانه معجزه یان و کاران عجیب انجام بدیم.»

۳۱ وختی اوشان دوعا بوکودیدی، جایی کی اوشان دور هم جمع بوسته بید به لرزه دکفته و همه تان روح القدس جا پور بوستیدی و شجاعت امرأ جه خدا کلام مردوم ره گب زه بیدی.

ایمانداران یک دلی و صمیمیت همدیگر امره

۳۲ تومای ئ ایمانداران همدیگر مره یک دیل و یک جان بید و هیچکی نوگفتی من صاب مال و منالم بلکی هرچی کی داشتیدی همدیگر امرأ شریک بید. ۳۳ رسولان قوت زیادی امرأ شهادت دیدی کی خوداوند عیسی مسیح جه دنیا ئ مُرده یان ویریزه و خودایم اوشان فیض و برکت فراوانی فدیی. ۳۴ هیچ کدام اوشان محتاج مال و منال نیبید، چره کی هرچی ملک و املاک داشتیدی فروختیدی هو پول فروش آوردیدی، ۳۵ رسولان پا جیر فوکودیدی کی بسته به هر کس نیاز، اوشان میان تقسیم بیه. ۳۶ یوسفم کی جه قبیلہ ئ لاوی و قبرس شین بو و رسولان اون برنابا، یعنی «تشویق کننده» نام بنه بید، ۳۷ باغی ئ کی داشتی بوفروخته و پول باورده، رسولان پا جیر فوکوده.

حنانیا و سفیره

۱ اینفر کی حنانیا نام داشتی خو زن سفیره مره، ملکی ئ بوفروختیدی. ۲ خو زن امرأ دس به یکی بوکوده، ایچه جه او پول اوسده، الباقی ئ باورده فوکوده رسولان پا جیر. ۳ پطرس اون بوگفته: «ای حنانیا، چره وهستی شیطان تر گول بزنه کی روح القدس دروغ بیگی و ایچه جه او پول فروش باغ تر اوسدی؟ ۴ مگر قبل اونکی اون بوفروشی، او باغ تی شین نوبو؟ بزین کی اون بوفروختی او پولم تی شین بو. پس چی تر وادار بوکوده کی آکار بوکونی؟ تو نه تنها مردومان ورجه دروغ بوگفتی، بلکی خودایم دروغ بوگفتی!»

۵ وختی حنانیا آگبان بیشنوسته، در جا بکفته، بمرده! همه ئ اوشانی یم کی ایتفاق بیشنوستیدی، خیلی بترسه بیدی. ۶ هو وخت، جوانان جلو بموییدی، اون کفن دوکودیدی، بریدی بیرون و دفن کودیدی.

۷ حدود سه ساعت جه ماجرا بوگذشته بو کی اون زنا سفیره آیه بودورون، بی خبر جه اونچی پیش بمو بو. ۸ پطرس اون جا وورسه: «مر بوگو، آیا زمین به هه قیمت بوفروختیدی؟» سفیره جواب بده: «بله، به هه قیمت.» ۹ پطرس اون بوگفته: «چره همدیگر مره دس به یکی بوکودیدی کی روح القدس امتحان بوکونید؟ هسه اوشانی کی تی مرداک دفن کودیدی در جلو ایسه بیدی تا تر هم بایید برید.» ۱۰ هو لحظه، سفیره بکفته پطرس پا جیر، بمرده. وختی جوانان بموییدی بودورون، اونم بمرده بو. پس اون اوسدیدی بریدی بیرون و اون مرد ورجه دفن کودیدی. ۱۱ تومای ئ ایمانداران، و مردومانی کی ماجرای بیشنوستیدی وحشت بوکودید.

رسولان مریضان شفا دھیدی

۱۲ نیشانہ یان و معجزات فراوانی جہ رسولان دس، مردومان رہ آشکار بوستی و ایمانداران ہمہ تان یکدیل سلیمان ایوان میان، دوز ہم جمع بوستیدی. ۱۳ ولی ہیچکی جز خودشان جرأت نوکودی اوشان نزدیک بہ، هرچند تومام مردوم، اوشان خیلی احترام قائل بوستیدی ۱۴ و مرداکان و زناکان فراوانی بہ خوداونڈ عیسی ایمان باوردیدی، ۱۵ تا اویہ کی مریضان، شہر میدانان میان آوردیدی و اوشان رختخوابان و تختان سر خوشانہ بیدی تا امید امرأ وختی پطرس او راہ دوارستی، جہ قدرت خوداونڈ، اقلکن اون سایہ بعضی یان سر دکفہ تا شفا فیگیرید. ۱۶ مردوم دستہ دستہ جہ شہران اطراف اورشلیم آمویدی و خوشان مریضان و اوشانی کی جہ ارواح پلید در عذاب بید، آوردیدی و ہمہ تان شفا پیدا کودیدی.

رسولان دسگیری و زندانی بوستن

۱۷ کاهن اعظم و تومام اون همکاران کی جہ صدوقیان فرقہ بید، حسادت جا پور بوستیدی و ویریشیدی ۱۸ رسولان دسگیر بوکودیدی و شہر زندان عمومی میان تاودہ بیدی. ۱۹ ولی ہو شب خوداونڈ فرشتہ، زندان دران واکودہ و اوشان بیرون باورده ۲۰ و بوگفتہ: «بیشید معبد میان و اویہ خوداونڈ کلام حیات بخش مردوم رہ گب بزید.»

۲۱ بزین صبح دم، هطو کی خودا فرشتہ رسولان بوگفتہ بو، بوشویدی معبد و مردوم تعلیم بدیدی. بزین کاهن اعظم خو همکاران امرأ بمو، شورا اعضا و تومامی اسرائیل مشایخ دوخوآدیدی و چند نفر اوسہ کودیدی تا رسولان زندان جا باورید. ۲۲ ولی وختی ماموران بوشویدی زندان میان، رسولان نیسہ بید. پس واگردستیدی، خبر بدیدی ۲۳ و بوگفتیدی: «زندان در حُب دوسہ بو، نگهبانانم زندان در سر ایسہ بید ولی وختی در واکودیم هیکس زندان میان پیدا نوکودیم.» ۲۴ وختی معبد نگهبانان فرماندہ و پیلہ کاهنان آخبر بیشنوستیدی، پریشان بوستیدی و خوشان پهلو فکر بوکودیدی «اکار آخر عاقبت چی بہ؟» ۲۵ کی اینفر آیہ و اوشان خبر دہہ، گہ: «مرداکانی کی زندانی بوکودہ بید، معبد میان ایسہ بیدی و مردومان تعلیم دهن درید.» ۲۶ پس معبد نگهبانان فرماندہ، ماموران امرأ بوشو و رسولان باوردیدی ولی نہ زوز امرأ، چونکی ترسہ بیدی مردوم اوشان سنگ واران بوکونید.

۲۷ بزین کی رسولان باوردیدی، اوشان شورا جلو بہ پا بداشتیدی. او وخت کاهن اعظم اوشان جا وورسہ: ۲۸ «مگہ شمر قدغن نوکودہ بیم کی د بہ عیسی نام موعظہ نوکونید؟ ولی شومان اورشلیم شیمی تعلیم امرأ پور کودیدی و خوآبیدی امرأ ک خون تاودید آمی گردن.»

۲۹ پطرس و بقیہ رسولان جواب بدیدی: «امان وا خودا جا ویشتر ایطاعت بوکونیم تا آدمی جا. ۳۰ آمی پئران خودا، عیسی کی شومان بہ صلیب فکشہ بیدی و بوکوشتیدی، مُردہ یان جا ویریزانہ. ۳۱ بزین خودا عیسی آسمان جور بیردہ

و خو راست دس بینشأنه و سرور و نجات دهنده چا کوده کی قوم اسرائیل فرصت بدآرید تا توبه بوکونید و اوشان گوناها نم بخشیده بیه. ۳۲ امان رسولان آ واقعه ای شاهدیم هطو کی روح القدس شاهده، هو روح پاک کی خودا خو ایطاعت کننده یان فده.»

۳۳ وختی شورا اعضا اگبان بيشنوستیدی، آنقدر اوشان غیظ گيفته کی خواستیدی رسولان بوکوشید. ۳۴ ولی اینفر جه فریسیان، گاملائیل نام، کی شریعت معلّم و توماّم قوم میان محترم بو، شورا مجلس دورون ویریشه، دستور بده رسولان چند لحظه اویه جا بیرون ببرید. ۳۵ بزین اوشان بوگفته: «ای اسرائیلیان، مواظب بیید کی اشان ره چی تصمیمی گيفتن دریدی. ۳۶ چونکی پیشترم، ایتا مردای تئوداس نامی ویریشه بو و گفتمی کی من مره کسی ایسم و حدود چهارصد نفرم اون طرفدار بوبوستید. دولتم اون بوکوشته، او طرفدارانم همه پخش و پلا بوبوستیدی و تومامی اون نقشه یان، نقش بر آب بوبوسته. ۳۷ بعد اون، سرشماری موقع، یهودای جلیلی ویریشه کی طرفدارانی هم داشتی. اونم بوکوشیدی، اون طرفدارانم پخش و پلا بوبوستیدی. ۳۸ هن وستی شمّر گم کی جه اشان دس بکشید و اشان به خوشان حال بنید. اگه هرچی گیدی و هر کاری کونیدی، خودا اراده امرأ نه، نتانیدی موفق بیید. ۳۹ ولی اگه جه خودا طرف بیه، شومان نتانیدی اوشان جه میان ببرید، چونکی در آ صورت خودا امرأ جنگستان دریدی!»

۴۰ اوشان قوبیل بوکودیدی و رسولان دوخوآیدی، شلاق بزهیدی و قدغن بوکودیدی کی د به عیسی نام گب نزنید. بزین وهشتیدی کی اوشان بیشید. ۴۱ رسولان شورا جا بیرون بوشویدی و خوشحال بید کی انتخاب بوبوسته بید کی عیسی نام وستی توهین بیید. ۴۲ تومامی روزان، چی معبد میان و چی خانه یان میان، تعلیم و بشارت دیدی کی عیسی هو مسیح موعوده.

هفت نفر انتخاب بوبوستیدی خدمت کودن ره

۱ او روزان کی ایمانداران تعداد اضافه بوستی، ایمانداران یونانی زبان، جه ایمانداران عبرانی زبان گله و شکایت کودیدی کی «جیره ای روزانه ای غذا به امی بیوه زناکان فرسه.» ۲ هن وستی اون دوازده تا رسول، تومامی ایمانداران دوخوآیدی و بوگفتیدی: «شایسته نی یه کی امان غذا فدن وستی خودا کلام تعلیم جا دس بکشیم تا مردوم غذا فدییم. ۳ پس ای براران، شیمی میان هفت نفر انتخاب بوکونید کی موردا اعتماد بیید و حکمت و روح القدس جا پوریدی تا خدمت اوشان فدییم ۴ و امان، خودمان وقف دوعا بوکونیم و خودا کلام تعلیم بدیم.»

۵ همه تان آپشنهاد قوبیل بوکودیدی. پس استیفان، کی جه بقیه ایمانداران غیرت ویشتری نشان دبی و روح القدس جا پور بو با فیلیپس، پروخروس، نیکانور، تیمون، پرمیناس و نیکولائوس امرأ، کی ایتا غیریهودی انطاکیه شین بو کی به دین یهودیت بیوسته بو و بعدش هم ایمان باورده و مسیحی بوبوسته، انتخاب بوکودیدی. ۶ ایمانداران او مرداکان باوردیدی رسولان ورجه و رسولان اوشان ره دوعا بوکودیدی و بر اوشان دس بنهیدی. ۷ بزین خودا کلام

اعلام بوستی و روز به روزم ایمانداران تعداد، اورشلیم میان اضافہ بوستی و کاهنان زیادہ ہم به عیسی مسیح نام ایمان آوردیدی.

استیفان دسگیر به

۸ استیفان، خودا فیض و قدرت جا پور بو و معجزات و نیشانہ یان زیادہ ی، مردومان ره آشکار کودی. ۹ ولی چند نفر جہ اعضای کنیسه یی کی «آزاد بوسته یان» نام داشتیدی، جہ یہودیان قیروان و اسکندریہ و کیلیکیہ و آسیا، بموییدی اون امرأ مشاجرہ بوکودیدی. ۱۰ ولی استیفان مرہ کی روح القدس و حکمت امرأ گب زہی، نتانستیدی کاری بوکونید. ۱۱ هن وستی خلوتی چند نفر وادار بوکودیدی کی بیگید: «امان بیشنوستیم کی استیفان به موسای نبی و خودا کفر گفتن دبو.»

۱۲ اوشانم، مردوم و پیلہ آدمان قوم و دین علمای تحریک بوکودیدی و استیفان سر فووستیدی، اون بیگفتیدی و بریدید شورا. ۱۳ چند نفرم بأوردیدی، اوشانم شہادت دروغ بدیدی و بوگفتیدی: «ا مردای، جہ کفر گفتن بر ضد ا معبد مقدس اورشلیم و موسی شریعت دس نکشہ. ۱۴ چونکی امان بیشنوستیم کی گفتی: (عیسای ناصری امی معبد مقدس خراب کونہ و احکامی کی موسای پیغمبر، امر بیسپردہ، تغییر دہہ.)» ۱۵ او وخت تومام اوشانی کی شورا میان ایسہ بید، استیفان خیرہ بوبوستیدی و استیفان دیم کی فرشتہ یان دیمان مانستن بوبوستہ بو، بیدہ ییدی.

استیفان، شورا میان خو جا دفاع کونہ

۱ او وخت کاهن اعظم وورسہ: «استیفان، اشان گبان حقیقت دارہ؟» ۲ استیفان بوگفتہ: «شومان براران و پئران، می گبان گوش بدید! وختی کی امی جد، ایبراهیم، بین النهرین میان زندگی کودی و هنوز به شہر حران کوچ نوکودہ بو، خودای پور جلال اون آشکار بوسته ۳ و اون بفرمأستہ: (تی وطن و تی فامیلان بنہ، بوشو او سرزیمینی کی تر نشان دہم.)

۴ «بزین ایبراهیم جہ کلدانیان سرزیمین بوشو و حران میان ساکن بوبوستہ. وختی اون پئر بمردہ، خودا اون اوسہ کودہ ہہ سرزیمین میان کی ایمروز شومان آہہ زندگی کونیدی. ۵ خودا اسرزمین دورون اون ہیچ ارثی فندہ بو، حتی اگہ ایتا وجب؛ ولی اون وعدہ بدہ بو کی خودش و بعد اون مردن، اون زاگان، مالک اسرزمین بیدی، ہرچند کی او زمان ایبراهیم زاکی ناشتی. ۶ خودا اون بفرمأستہ: (تی نسل، بیگانہ سرزیمین دورون غریبانہ زندگی کونہ. اوشان چہارصد سال به بردگی بریدی و اوشان ظلم کونیدی.) ۷ و ہطویم بفرمأستہ: (من او قومی کی اوشان به بردگی بریدی، مجازات کونمہ و بعد اون، می قوم او سرزیمین جا آزاد بیدی و آیدی مرہ یہ پرستش کونیدی.) ۸ خودا، ختنہ

به نیشانه‌ی عهد، ابراهیم فدہ۔ اسحاق ہشت روز دأستی کی ابراهیم اون ختنہ بوکودہ و اسحاقم هطو خو زای یعقوب و یعقوبم خو دوازدهتأ پسرأَن ختنہ بوکودہ۔

۹ «یوسف برأران، اون جہ حسادت بو فروختیدی مصری یان۔ ولی خودا اون امرأ بو ۱۰ و یوسف جہ تومام اون گرفتاریان نجات بدہ و اون حکمت فدہ و فرعون ورجہ عزیز کودہ، اطو کی اون یوسف مصر دورون فرمانروا و درباریان رئیس چاکودہ۔

۱۱ «هو وخت بو کی سرتاسر مصر و کنعان سرزمین دورون پیلہ قحطی بمو و امی آباجداد، سختی میان دکفتید و بی آذوقہ بوبوستہ بید۔ ۱۲ یعقوب بیشنوستہ مصر میان گندم پیدا بہ۔ پس اولین بار خو پسران اوسہ کودہ اویہ۔ ۱۳ دومین بار یوسف خودش بہ خو برأران بشناسانہ و خو برأران فرعون معرفی بوکودہ۔ ۱۴ پس یوسف، اوشان اوسہ کودہ تا بیشید خو پتر، یعقوب ورجہ و تومامی اون فک و فامیلانی کی ہفتاد و پنج نفر بید، بأورید۔ ۱۵ اطو بوبوستہ کی یعقوب و اون زاکان مصر دورون زندگی بوکودیدی و اویہ ہم بمردیدی۔ ۱۶ بعد مردن یعقوب و اون زاکان مصر دورونی، اوشان جسد بہ شہر شکیم کی کنعان دورون نہہ بو بأوردیدی و مقبرہ میان کی ابراهیم جہ حمور زاکان بیہہ بو دفن کودیدی۔

۱۷ «هطو کی خودا وعدہیی کی ابراهیم بدہ بو نزدیک بوستن دویو، امی قومانم مصر میانی زیاد بوستی۔ ۱۸ بزین آخر سر، ایتا پادشاہ کی یوسف نشناختی، او سرزمین حاکم بوبوستہ۔ ۱۹ اون امی مرداکان و زناکان امرأ بد رفتار کودی و امی آباجداد وادار کودی شیرخورہ زاکان راہ سر بنید کی زندہ نمائید۔

۲۰ «هو روزان بو کی موسی بہ دنیا بمو۔ موسی زاک خیلی قشنگی بو و اون سہ ماہ خودش پتر خانہ میان قایم کودہ بدأشتیدی۔ ۲۱ بزین موسی، سبد قیراندود بوکودہ میان بوخوسانہ ییدی و روخان دورون تاودہ ییدی۔ فرعون دوختر اون روخان جا اوسدہ و خو پسر مانستن پیلہ کودہ۔ ۲۲ موسی مصریان حکمت و دانش امرأ پیلہ بوستہ و اون کردکاران پیلہ آدمان مانستن بو۔

۲۳ «وختی موسی چہل سالہ بوبوستہ، خورہ فکر بوکودہ کی بشہ خو برأران اسرائیلی بیدینہ۔ ۲۴ وختی بیدہ ایتا مصری ایتا اسرائیلی ظلم کودن درہ، مرد مصری کوشہ تا اون نجات بدہ۔ ۲۵ موسی خورہ فکر کودی کی اون برأران اسرائیلی فہمیدی کی خودا اون، وسیلہ نجات اوشان قرار بدہ، ولی اوشان نفہمستیدی۔ ۲۶ فردای او روز، دوتأ اسرائیلی بیدہ کی ہمدیگر امرأ جنگ و جدل کودن دیبید۔ واگردستہ او دو نفر بوگفتہ: (ای مرداکان، شومان ایتا قوم شینیدی۔ چرہ ہمدیگر امرأ دعوا گیفتن دریدی؟)

۲۷ «ولی اونی کی بہ نظر آمویی مقصر او دعواہ، موسای هل دہہ و اون گہ: (کی تر امی حاکم و داور چاکودہ؟
۲۸ خیال داری مر ہم بوکوشی، هوطو کی او مصری دیروز بوکوشتی؟) ۲۹ وختی موسی اون گبان بیشنوستہ، بہ

سرزمینی کی اون نام مدیان بو فرار بوکودہ۔ اویہ ایتا غریبہ مأنستن زندگی بوکودہ و ہویہ عروسی بوکودہ و صاحب دوتا پسر بو بوستہ۔

۳۰ «چهل سال بوگذشتہ بو ایروز بیابان میان، کوہ سینا نزدیکی، ایتا کوجہ دانہ درخت آتش شوالہ دورونی ایتا فرشتہ موسیٰ آشکار بہ۔ ۳۱ موسیٰ جہ اونچی کی آشکار بوستہ بو تعجب بوکودہ و هطو کی جولوتر شوئون دوبو تا جہ نزدیک بیدینہ چی بو بوستہ، ندای خوداوند ایشنہ کی گہ: ۳۲ (من تی آبا جداد خودایم، ایبراهیم خودا، اسحاق خودا و یعقوب خودا) موسیٰ جان پرکستی و جرأت نوکودی او آتش شوالہ نیگاہ بوکونہ۔

۳۳ «خوداوند اون بوگفتہ: (کفش تی پا جا بیرون باور، چونکی آیہ کی بہ پا ایسہیی، زمین مقدسی ایسہ۔ ۳۴ من، مصریان بدرفتاری کی می قوم امرأ کودن دریدی، بیدم. اوشان نالہی بیشنوستم و اوشان نجات وستی بموم. ہسہ ویریز تا تر دووارہ مصر دورون اوسہ کونم)۔

۳۵ «ہہ موسیٰ بو کی امی قوم اون قوبیل نوکودہ بید و بوگفتیدی: (کی تر امی حاکم و داور چاکودہ؟) خودا بہ وسیلہی فرشتہیی کی آتش شوالہ میان آشکار بوستہ بو، اون اوسہ کودہ کی اوشان داور و نجات دہندہ بہ۔ ۳۶ ہہ موسیٰ بو کی نیشانہ یان و معجزہ یان امرأ امی قوم جہ مصر بیرون باورده و جہ رائی دریای سرخ رد کودہ و چهل سالم اوشان بیابان دورون ہدایت بوکودہ۔

۳۷ «ہہ موسیٰ بنی اسرائیل بوگفتہ: (خودا، جہ شیمی براران یهودی میان، پیغمبری می مأنستن شمرہ اوسہ کونہ)۔ ۳۸ اون بو کی بیابان میان بنی اسرائیل قوم ورجہ بیسہ و کوہ سینا دورون، خودا کلام زندہی فرشتہ جا فیگفتہ و امر فارسانہ۔ ۳۹ ولی امی آبا جداد اون جا ایطاعت نوکودیدی و اوشان دیلان خواستی و اگر دید مصر دورون۔ ۴۰ اوشان، ہارون کی موسیٰ برار بو، بوگفتیدی: (امرہ خودایانی چاکون کی بتانید رائی نیشان بدید، چونکی موسیٰ، ہمہ تان امر مصر جا بیرون باورده و جہ امی ورجہ بوشو و نانیم کی چہ بلایی اون سر بمو کی تا ہسہ کی و انگردستہ!) ۴۱ ہو روزان بو کی ایتا بت گوسالہ مأنستن چاکودیدی و اون رہ قربانی بوکودیدی و خوشان ہہ کار وستی ایتا جشن بر پا بوکودید۔ ۴۲ ہن وستی خودایم خو روی اوشان جا و اگر دانہ و اوشان بہ خودشان حال بنہ کی آفتاب، ماہ و ستارہ یان آسمان پرستش بوکونید؛ ہوطو کی پیامبران کیتاب میان، خودا بفرمأستہ:

«ای قوم بنی اسرائیل، شومان او چهل سال بیابان میان،

می وستی قربانی بوکودیدی؟ و مرہ ہدیہ باوردیدی؟

۴۳ شومان بت ملوک خیمہ و شیمی خودا، «رمفان» ستارہی بر پا بدآشتیدی

و امجسمہ یان پرستش کودن رہ، چاکودیدی۔

پس شمر دورتر جہ بابل تبعید کونم)۔*

۴۴ استيفان ادامه بده: «آمی پٿران، بيابان ميانم خيمه ي عبيادت خوشان امرأ دأشتیدی، خيمه يی کی موسی به فرمان خودا و عين هو نمونه ي کی بیده بو، چأكوده. ۴۵ آمی پٿران، يوشع رهبری امرأ کنعان سرزمين دورون، قومأ ستمگر امرأ بجنگستیدی و خودا هم اوشان جه آمی پٿران راه سر اوسده. او خيمه تا داوود نبی زمان اويه بمأنسته. ۴۶ خودا داوود مورد لطف قرار بده و داوود خودا جا خواهش بوکوده کی: (ای خودای يعقوب، مر اجازہ دهی ايتأ خانه تره چأکونم. ۴۷ ولی سليمان، داوود نبی زای بو کی خودا ره خانه چأکوده. ۴۸ ولی خودای متعال خانه يانی میان کی به انسان دس چأکوده ببه، ساکن نييه، هوطویی کی اشعیای نبی بوگفته:

۴۹ «خوداوند بفرمأسته:

«آسمان می پادشاهی تخت ایسه و زمينم ايتأ چهارپایه می پا جیر!

چی خانه يی مره چأکونیدی؟ می جاجیگاه کویه ایسه؟

۵۰ مگر می دس امرأ همه ي آسمان و زمين خلق نوکودم؟»*

۵۱ «ای قومی کی نافرمانی کونیدی، نه شیمی دیل خودای بیسپردیدی و نه شیمی گوش! شومانم شیمی پٿران مأنستن همیشه روح القدس جلو مقاومت کونیدی. ۵۲ کویتأ پیغمبر ایسه کی شیمی آباجداد دس جا آزار و اذیت نوبوسته بی؟ پیغمبرانی بموییدی کی او عادل یکتا، عیسی مسیح آمون پیشگویی بوکوده بید. شیمی اجداد اوشانم بوکوشتیدی و هسه شومان عیسای خیانت بوکودیدی و اون قاتل بوبوستیدی، ۵۳ شومانی کی شریعت فرشته يان کومک امرأ فیگفتیدی، بزین اون جا ایطاعت نوکودید.»

استيفان سنگسار بوستن

۵۴ شورا اعضا چون آگبان بیشنوستیدی، غیظ جا اوشان دندآن قروچه بیگفته. ۵۵ ولی استيفان، پور جه روح القدس سر به آسمان بولند کوده، خودا جلال و عیسای کی خودا راست دس ایسه بو، بیده ۵۶ و بوگفته: «هسه آسمان واز بوسته، انسان پسر دینم کی خودا راست دس به پا ایسه.»

۵۷ اوشان خوشان گوشان بیگفتید، ایجگره بزه يیدی و همه تان اون طرف حمله بوکودیدی. ۵۸ پس اون فکش فکش امرأ شهر جا بیرون بریدید و سنگ واران بوکودیدی. اوشانی یم کی بر علیه اون شهادت بده بید خوشان لباسان ايتأ مرد جوان پا جیر بنه يیدی کی اون نام شائل بو.

۵۹ وختی استيفان سنگسار کودن دیبید، اون دوعا بوکوده، بوگفته: «ای عیسای خوداوند، می روح قوبیل بوکون!» ۶۰ و زانو بزه، فریاد بوکوده و بوگفته: «خوداوند، آگنای اشان پا نینیویس.» هطو کی آن دوعا تومام بوسته، شهید بوبوسته.

اذیت و آزارِ شائول به کلیسا و ایمانداران

۱ شائولم جزو او اشخاصی بو کی موافق کوشتن استیفان بو. جہ هو روز آزار و شکنجه اورشليم ایمانداران میانی شروع بو بوسته. همه تان اوشان سراسر یهودیه و سامره میان پراکنده بوستیدی، بجز رسولان. ۲ مرداکان خوداترس استیفان ببردیدی، دفن کودید و اونره عزاداری بزرگی بیگفتید. ۳ ولی شائول، بی رحمی امرأ مسیحیان حمله کودی و خانه به خانه گردستی، مرداکان و زناکان بیرون فکشی و زندان میان تاودهیی.

فیلیپس استان سامره میان بشارت دهه

۴ اوشانی کی فرار بوکوده بید، هر جا کی شویدی، خودا کلام بشارت دیدی. ۵ فیلیپس به ایتا جہ شهران استان سامره کی شومال اورشليم نهه بو، بوشو و پیغام مسیحی [خوداوند/پیغام عیسی مسیح] مردوم ره موعظه بوکوده. ۶ تومام مردوم وختی فیلیپس گبان ایشنوستیدی، اونچی کی گفتی دقت امرأ گوش کودیدی، چونکی به عیسی مسیح نام معجزاتی کی آشکار بوستی دهیدی؛ ۷ کی جہ اون دس ارواح پلید فریادکونان جہ خیلی آدمانی کی دیوزده بید، بیرون آمویدی و خیلی یانم کی ایفلج و شل بید شفا پیدا کودیدی. ۸ هن وستی بو کی شادی و خوشحالی بزیادی هو شهر میان دکفته.

شمعون جادوگر

۹ هو شهر میان ایتا مردای زندگی کودی کی شمعون نام داشتی و مردوم سامره، خو جادوگری امرأ حیران کوده بو و خودش گفتی کی خوره ایتا پيله کسی ایسه. ۱۰ همه تان، کوجدانه و پيله دانه، اون گبان گوش دیدی و گفتیدی: «ا مردای ایتا اوشان پيله خودایان قوته، کی اون نام (قدرت عظیم) ایسه.» ۱۱ همه تان اون احترام زیادی کودیدی، چونکی سالیان سال بو کی خو جادوگری امرأ مردوم حیران کودی. ۱۲ ولی وختی فیلیپس بشارت دربارهی خودا پادشاهی و عیسای مسیح باور بوکودیدی، همه تان جہ مرداکان و زناکان تعمیم بیگفتیدی. ۱۳ حتی شمعون ایمان باورده و غسل تعمیم بیگفته. اون همیشه فیلیپس امرأ بو و جہ معجزاتی کی آشکار بوستی، در عجب و حیرت بو. ۱۴ وختی رسولان، اورشليم میان بيشنوستیدی کی سامریان، خودا کلام قوبیل بوکودیدی، پطرس و یوحنا اوسه کودیدی اوشان ورجه. ۱۵ پطرس و یوحنا بمویدی سامره و اوشان ره دوعا بوکودیدی تا روح القدس دریافت بوکونید، ۱۶ چونکی هنوز هیچ کدام جہ مردوم سامره روح القدس ناشتیدی، بلکی فقط به عیسای مسیح خوداوند نام غسل تعمیم بیگفته بید. ۱۷ پس پطرس و یوحنا اوشان سر، دس بنه بیدی و اوشانم روح القدس دریافت بوکودید.

۱۸ وختی شمعون بیده کی ایمانداران، رسولان دس نهن امرأ روح القدس دریافت کونیدی، خو پول باورده پطرس و یوحنا ورجه ۱۹ و رسولان بوگفته: «مرأ قدرت فدید تا هر کس سر دس بنم، روح القدس دریافت بوکونه.» ۲۰ پطرس بوگفته: «تی پول تی امرأ نابود به! چونکی فکر بوکودی خودا عطای شه پول امرأ هئن. ۲۱ تو خدمت میان هیچ سهمی ناری، چونکی تی دیل خودا ورجه صاف نی. ۲۲ تی شرارت جا توبه بوکون و دوعا بوکون بلکی خوداوند اونچی کی تی دیل میان فکر بوکودی بیخشه؛ ۲۳ چونکی دینم زهر تلخی به دیل داری و شرارت زنجیر جا اسیری.»

۲۴ شمعون بوگفته: «شومان مره خوداوند ورجه دوعا بوکونید کی هرچی بوگفتیدی می سر نایه.» ۲۵ وختی پطرس و یوحنا، خوداوند کلام بوگفتیدی و شهادت بدیدی، و اگر دستیدی اورشلیم میان و هطو خوشان راه سر، سامره دیهاتان میانی بشارت دهیدی.

فیلیپس و خواجه سرای حبشی

۲۶ او وخت خوداوند فرشته، فیلیپس بوگفته: «ویریز، بوشو سمت جنوب، جه او بیابانی راه کی اورشلیم جا شه غزه.»

۲۷ بزین اون ویریشه راه دکفته بوشو. خو راه سر خواجه سرای حبشی بیده کی ملکه حبشه، «گنداکه»، خزانه دار بو و نفوذ فراوانی داشتی و عبادت ره به اورشلیم بمو بو. ۲۸ و اگر دستن ره خو ارابه میان نیسته بو و اشعیای نبی کیتاب خواندن دبو. ۲۹ او وخت روح القدس، فیلیپس بوگفته: «او ارابه نزدیک بو و اوشان امرأ همراه بوبو.»

۳۰ فیلیپس ارابه طرف بودو وسته و بیشنوسته کی خواجه سرای حبشی، اشعیای نبی کیتاب خواندن دره. پس اون بوگفته: «اونچی کی خواندن دری، متوجه بی؟» ۳۱ خواجه سرای حبشی و اگر دسته بوگفته: «چوطو تانم بفهمم، اگه کسی مره راهنمایی نوکونه؟» و فیلیپس دعوت کونه سواژ ارابه ببه، اون ورجه بینیشینه.

۳۲ قسمتی جه خودا کلام خواندن دبو کی گفتی:

«اون گوسفند مانستن بو، کی کوشتن ره بریدی

و ایتا بره مانستن بو کی پشم چینان ورجه آرام ایسه و گبی زنه.

۳۳ اون فروتن بو، هن وستی هر جور بی عدالتی اون ره روا بداشتید.

اون زاکی ناشتی، پس کی تانه اون نسل جا گب بزنه؟

چونکی اون حیات، جه زمین سر قطع بوسته.»*

۳۴ خواجه سرا و اگر دسته، فیلیپس بوگفته: «خواهش کونم مره بوگو کی اشعیای نبی راجع به خودش گب زئن دره، یا جه اینفر دیگه؟» ۳۵ پس فیلیپس شروع کونه به گب زئن و جه هو قسمت خودا کلام و قسمت های دیگه کی مربوط به عیسی مسیح بو بشارت دهه. ۳۶ هطو کی شوئون دبید، به آب فارسه ییدی و خزانه دار بوگفته: «بیدین آب نهه. هسه

دِ مشکلی وجود ناره، تانی مَرِ غسلِ تعمید بدی؟» ۳۷ فیلیپس بوگفته: «اگه تی توماّم دیلّا امرأ ایمان بأوردی، مشکلی نی.یه.» خواجه سرا بوگفته: «ایمان دارم کی عیسی مسیح، خودا پسره.» ۳۸ پس خواجه سرا فرمان بده ارا بهی بدآرید و فیلیپس و خواجه سرا، هر دو تا شیدی آبّ دورون و فیلیپس اونّ تعمید دهه. ۳۹ وختی آبّ جا بیرون بمویدی، ایدفعه یی روح القدس فیلیپس اوسده ببرده. بزین خزانه دار دِ اونّ نیده و خوشحالی امرأ راه دکفه، بوشو. ۴۰ اما فیلیپس، اشدو دِ شهر میان بیده ییدی. اون توماّم او دور و بز شهران میان گردستی و بشارت دیی کی به قیصریه فارسه.

شائول ایمان آوردن

۱ شائول هوطویی کی به تهدید و کوشتن خوداوند عیسی پیروان، ادامه دیی، کاهن اعظم ورجه بوشو ۲ و اونّ جا بخواسته نامه یانی فیگیره دمشق یهودیان کنیسه یان ره تا اگر کسی جه عیسی پیروان بیافه، جه زناکان و مرداکان، دسگیر بوکونه و باوره اورشلم. ۳ شائول هنوز به دمشق فرسه بو کی ایدفعه یی نزدیکی شهر، نوری جه آسمان اونّ دور و بز روشن کوده ۴ و اون، زمین سر بکفته، صدایی بیشنوسته کی اونّ گفتن دبو: «شائول، شائول، چره مَر آزار دهی؟» ۵ شائول جواب بده: «تو کیسی، سرورم؟» جواب بیشنوسته: «من هو عیسایم کی تو مَر آزار رسانی. ۶ هسه، ویریز بوشو شهر میان، او به تر گیدی کی چی وا بوکونی.» ۷ شائول همسفران ساکت ایسه بید. اوشان صدای ایشنوستیدی ولی هیکس نیده ییدی. ۸ شائول جه زمین سر ویریشه ولی وختی کی خو چومان واکوده، هیچی نیده یی. پس اونّ دس بیگفتیدی، بریدی دمشق. ۹ اون سه روز نتانستی بیدینه و آب و غذایم نوخوردی.

۱۰ دمشق میان اینفر زندگی کودی کی به عیسی مسیح ایمان داشتی کی اونّ نام حانیا بو. خوداوند، رویا میان اونّ آشکار بوسته و بوگفته: «ای حانیا!» اون واکردسته بوگفته: «بله خوداوندا.» ۱۱ خوداوند اونّ بوگفته: «ویریز بوشو او کوچه میانی کی (راست) نام داره، یهودا خانه دورون، شائول تارسوسی ره وورس، کی مشغول دوعا کودن ایسه ۱۲ و خو رویا میان ایتا مرداک بیده، حانیا نام، کی آیه اونّ سر دس نهه تا اونّ چومان واز به.» ۱۳ حانیا جواب بده: «خوداوندا، جه خیلی یان بیشنوستم کی ا مرد تی ایمانداران اورشلم میان آزار و شکنجه کودی ۱۴ و جه پيله کاهنان طرف اختیار داره، و بمو آیه تا هر کی کی به تی نام ایمان داره، دسگیر و زندانی بوکونه.» ۱۵ ولی خوداوند، حانیا بوگفته: «بوشو، ا مرد انتخاب بوکودم تا کی می نام غیریهودیان و اوشان پادشایان و بنی اسرائیل قوم اعلام بوکونه. ۱۶ من اونّ نشان دهم کی می نام وستی چی رنجی وا بکشه.»

۱۷ پس حانیا بوشو هو خانه میان و خو دسان شائول سر بنه و بوگفته: «برار جان، خوداوند، هو عیسی یی کی وختی امون دیبی شهر دمشق میانی راه میان تر آشکار بوسته، مَر اوسه کوده کی دوواره تی چومان واز به و تا روح القدس جا پور بی.» ۱۸ هو لحظه ایچی فلس مانستن جه شائول چومان سر بکفته و اون دوواره بیده و ویریشه تعمید بیگفته. ۱۹ او وخت غذا بوخورده و قوت پیدا کوده.

شائول کی خو قلب بہ عیسیٰ مسیح بیسپردہ ہو مردوم دمشق و اورشلیم بشارت دہہ

شائول چند روزی دمشق ایمانداران ورجہ بیسہ ۲۰ و فوری ہمہ کنیسہ یان دورون موعظہ کودی کی عیسیٰ، خودا پسر ایسہ. ۲۱ توامی مردوم کی ایشنوستیدی تعجب کودیدی، گفتیدی: «مگر آن ہو کسی نی یہ کی اورشلیم دورون هرکی بہ عیسیٰ نام ایمان آوردیدی، اوشان اذیت و آزار کودی؟ لابود بمو آہ کی ایمانداران دسگیر بوکونہ و پیلہ کاهنان ورجہ ببرہ.» ۲۲ ولی قوت شائول گبان هر روز ویشتر بوسی و توام یهودیان دمشق رہ ثابت کودی کی عیسیٰ، ہو مسیح موعود ایسہ.

۲۳ خلی روزان بوگذشتہ و یهودیان ہمدیگر امرأ نقشہ بکشہ ییدی کی شائول بوکوشید. ۲۴ ولی شائول جہ اوشان نقشہ واخبر بوستہ. یهودیان حتی شب و روز شہر دروازہ یان جلو نگہبانی دیدی. ۲۵ بزین اون دوستان ایتا شب اون زبیل میان بنہ ییدی و جہ دیوار شہر جور روانہ کودیدی بیجیر.

۲۶ وختی شائول فارسہ اورشلیم، ایمانداران دونبال گردستی کی بشہ اوشان ورجہ ولی ہمہ اون جا ترسہ ییدی، چونکی باور نوکودیدی کی اونم ایماندارہ. ۲۷ ولی برنابا اون اوسدہ ببردہ رسولان ورجہ، بوگفتہ کی اون شوئون دوبو دمشق، خوداوند بیدہ و خوداوند اون امرأ گب بزہ و اونم دمشق میان شجاعت امرأ بہ عیسیٰ نام موعظہ کودی. ۲۸ پس شائول اوشان ورجہ بیسہ و آزادانہ اورشلیم میان شوئون امون کودی و شہامت امرأ بہ خوداوند نام بشارت دی. ۲۹ اون یهودیان یونانی زبان امرأ کل گب زہی ولی اوشان، اون قتل رہ نقشہ بکشہ ییدی. ۳۰ وختی ایمانداران نقشہ قتل بفہمستیدی، شائول اوسدیدی بریدیدی قیصریہ و جہ اویہ اون اوسہ کودیدی کی بشہ شہر تارسوس.

۳۱ ہطوی بو کی توامی کلسیایان سرتاسر یہودیہ و جلیل و سامرہ آرامش پیدا بوکودیدی و پا بیگفتیدی و ہمہ تان ایمانداران، خوداترسی امرأ زندگی کودیدی و روح القدس یاری امرأ اوشان نفرت اضافہ بوستیدی.

پطرس خدمت کودن لڈہ و یافا دورون

۳۲ پطرس توامی منطقہ یان گردستی و ایبار ہم ایمانداران لڈہ سرکشی بوکودہ. ۳۳ اویہ اینفر بیدہ کی اینیاس نام داشتی و ہشت سال ایفلیج و زیمینگیر بو. ۳۴ پطرس اون بوگفتہ: «اینیاس، عیسیٰ مسیح تر شفا دہہ. ویریز، تی رختخواب جمع کون!» اون ایدفعہ جہ خو جاجیگاہ ویریشتہ. ۳۵ توام مردومی کی لڈہ و شارون میان زندگی کودیدی ا معجزہ بیدہ ییدی و بہ خوداوند عیسیٰ ایمان باوردیدی.

۳۶ یافا دورون، ایمانداری زندگی کودی کی طابیتا نام داشتی، کی اون ایسم معنی «غزال» بو. آ زن خودش وقف کاران حُب بوکودہ بو و فقیران کومک کودی. ۳۷ ہو روزان طابیتا مریض بوستہ، بمردہ. پس اون بوشوستیدی، بریدیدی بنہ ییدی بالاخانہ میان. ۳۸ لڈہ، یافا نزدیکی نہہ بو. هن وستی وختی اویہ ایمانداران بیشنوستیدی کی پطرس لڈہ میان

ایسہ، دو نفر اوسہ کودیدی اونؑ دونبال و اونؑ جاؑ خواہش بوکودیدی کی «فوری ویریز، بیآ امی ورجہ»۔ ۳۹ پطرس ویریشته اوشانؑ امرأ بوشو۔ وختی فارسہییدی اویہ، اونؑ ببردیدی بوجور، بالاخانہ میان۔ توماؑ بیوہزنآکانؑ گریہ کونان بموییدی جُلُو و لیباسانیؑ کی طابیتا وختی زندہ بو اوشانؑ رہ بودوختہ بو، نیشانؑ بدیدی۔

۴۰ پطرس اوشانؑ اطاقؑ جاؑ بیرونؑ کودہ و زانو بزہ، دوعا بوکودہ۔ پس رو بوکودہ بہ طابیتا جنازہ بوگفتہ: «ای طابیتا، ویریز!» طابیتا خو چومانؑ واکودہ۔ وختی پطرسؑ بیدہ، جہ خو جیگا ویریشته و بینیشته۔ ۴۱ پطرس اونؑ دسؑ بیگفتہ، بہ پا بدآشتہ و ایماندارانؑ و بیوہزنآکانؑ دوخوآدہ و اونؑ زندہ بہ اوشانؑ بیسپردہ۔ ۴۲ آ خبر سرتاسرؑ یافا میانؑ پخشنؑ بوستہ و خیلیؑ یانؑ بہ خوداوند عیسیؑ ایمانؑ باوردیدی۔ ۴۳ پطرس چند روزی یافا میانؑ شمعونؑ ورجہ کی ایماندار بو و اونؑ کار دَبَاغی بو، بیسہ۔

پطرس گرنلیوسؑ رومی امرأ ملاقات کونہ

۱ قیصریہ شہرؑ میانؑ ایتاؑ مردایؑ زندگی کودی، گرنلیوسؑ نام، کی ہنگؑ رومیانؑ افسر بو۔ اونؑ ہنگؑ معروف بہ «ہنگؑ ایتالیایی» بو۔ ۲ اونؑ ایتاؑ پارساؑ مردای بو و توماؑ اونؑ خانوادہ درستکار و خوداترس بید۔ گرنلیوسؑ دس و دیل باز بو و نیازمندانؑ صدقہ فدیی و ہمیشہ بہ درگاہؑ خودا دوعا کودی۔ ۳ ایتاؑ روز بعدؑ ظہر حدودؑ ساعتؑ سہ، رویا دورونؑ خودا فرشتہؑ آشکارا دینہ کی بمو اونؑ ورجہ، بوگفتہ: «ای گرنلیوسؑ!» ۴ گرنلیوسؑ ترسؑ امرأ اونؑ نیگاہ بوکودہ و جواب بدہ: «بلہ، سرور!» فرشتہ بوگفتہ: «تی ہدایا و دوعایانؑ، خودا ورجہ مورڈ قوبیل بیگفتہ۔ ۵ ہسہ چند نفر اوسہ کونؑ بیشید شہرؑ یافا و شمعونؑ کی اونؑ (پطرس) دوخوآندی، باورید آیہ۔ ۶ اونؑ ایتاؑ دَبَاغؑ ورجہ، بہ نامؑ شمعونؑ کی دریا کنار خانہ دارہ، مہمانہ۔»

۷ وختی فرشتہیی کی اونؑ امرأ گب زئنؑ دوبو بوشو، گرنلیوسؑ دو نفرؑ جہ خو خادمآنؑ و ایتاؑ جہ خودشنؑ سپاہیانؑ مخصوصؑ کی ایتاؑ پارساؑ مردای بو، دوخوآدہ ۸ و توماؑ ماجرائؑ اوشانؑ رہ بوگفتہ و اوشانؑ اوسہ کودہ کی بیشید یافا۔ ۹ فردا ظہرؑ موقع بو، وختی راہ میانؑ ایسہ بید و شہرؑ نزدیکؑ بوستن دیبید، پطرس بوشو خانہ پشتؑ بامؑ جور کی دوعا بوکونہ۔ ۱۰ اویہ اونؑ ویشته کودہ و بخوآستہ ایچی بوخورہ۔ وختی غذایؑ آمادہ کودن دیبید، خلسہ دورونؑ بوشو۔ ۱۱ ہو حالؑ میانؑ بیدہ کی آسمانؑ وازؑ بوستہ، ایتاؑ پیلہ سُفرہ بوچہ مأنستنؑ، جہ چہار گوشہ آویزانہ، زمینؑ طرف بیجیر آمون درہ۔ ۱۲ او سُفرہ، ہمہ جور چارپایانؑ و خزندہ یانؑ و پرنندہ یانؑ جاؑ پور بو۔ ۱۳ صدایی بیشنوستہ کی گفتی: «پطرس، ویریز، اوشانؑ سرؑ ووین و بوخور!»

۱۴ پطرس بوگفتہ: «حاشا خوداوندا، من ہرگز ایچیؑ کی نجست و ناپاک بہ لب نزم۔»

۱۵ دووارہ صداؑ بمو کی «اونچیؑ خودا حلال بوکودہ، تو حرام نوا دانستن۔» ۱۶ سہ دفعہ تکرار بو بوستہ، بزین سُفرہ

آسمانؑ جور بوشو۔

۱۷ ہو وخت کی پطرس تعجباً امرأ به خو رویا فکر کودن دبو، هو کسانئی کی گرنلیوس اوسه کوده بو، شمعون خانہی پیدا بوکودید و اون خانہ دژ سر فارسہ یید۔ ۱۸ اوشان صدائی بلند امرأ وورسه ییدی: «آیا شمعون کی اون پطرس دوخوآندی آیه مهمانه؟»

۱۹ پطرس به خو رویا فکر کودن دبو کی روح القدس بوگفته: «بیدین، سه نفر تی دونبال گردیدی۔ ۲۰ ویریز، بوشو بیجیر، شک نوکون کی اوشان امرأ وا بیشی، چره کی من اوشان اوسه کودم.» ۲۱ پطرس بوشو بیجیر و اوشان بوگفته: «من هونم کی اون دونبال گردیدی۔ چی وستی بموییدی آیه؟»

۲۲ اوشان بوگفتیدی: «فرمانده گرنلیوس امرأ اوسه کوده۔ اون مردی عادل و خوداترسه، کی توام مردوم یهود اون به خوبی شناسیدی۔ فرشتهی مقدس خودا اون دستور بده امرأ اوسه کونه تا تر بیریم اون خانہ کی تی گبان بیشنوه.» ۲۳ پس پطرس اوشان ببرده شمعون خانہ و اوشان جا پذیرایی بوکوده۔

فردا روز ره ویریشته کی اوشان امرأ بشه۔ چند نفر جه ایمانداران شهر یافیم اون امرأ بوشوییدی۔ ۲۴ پس فردا روز ره فارسہ ییدی قیصریه۔ گرنلیوس خو فامیلان و رفیقان کی دعوت بوکوده بو، همه تان اوشان رافا ایسه بید۔ ۲۵ وختی پطرس فارسہ، گرنلیوس بوشو اون پیشواز، بگفته اون پا جیر و اون پرستش بوکوده۔ ۲۶ ولی پطرس اون به پا بدآشته، بوگفته: «ویریز؛ منم ایتا انسانم.»

۲۷ هوطو کی اوشان امرأ گب زئن دبو، شه خانہ دورونی۔ اویه مردوم زیادی امرأ روبرو به۔ ۲۸ پطرس اوشان بوگفته: «شومان خودتان دانیدی کی یهودیان بر طبق شریعت اجازه نأریدی غیر یهودیان امرأ معاشرت بوکونید یا اوشان خانہ بیشید۔ ولی خودا مَر نیشان بده کی هیکس نجست یا ناپاک ندانم۔ ۲۹ هن وستی وختی می دونبال اوسه کودیدی، هیچی نوگفتم، فوری بموم۔ هسه مَر بیگید، چی وستی مَر باوردیدی آیه؟»

۳۰ گرنلیوس بوگفته: «چهار روز پیش، ساعت سهی بعد ظهر، هو وختی کی می خانہ میان دوعا کودن دبو، ناخبر بیدم ایتا مردای کی اون لیباس نورانی بو، می روبرو ایسه ۳۱ و بوگفته: (گرنلیوس، خودا تی دوعای بیشنوسته و تی کومک های کی فقیر مردومان ره کونی، قوبیل بوکوده۔ ۳۲ چند نفر اوسه کون، بیشید یافا کی پطرس باورید آیه۔ اون مهمان شمعونی یه کی اون شغل دباغی ایسه و اون خانہ دریا کنار نهه.) ۳۳ پس منم فوری اوسه کودم تی دونبال کی تر باورید و تونم آمی سر منت بنهیی بمویی آمی ورجه۔ هسه امان همه تان در حضور خودا حاضریم کی هرچی خوداوند تر بوگفته، بیشنویم.»

پطرس پیغام گرنلیوس خانہ میانی

۳۴ پطرس خو گبان هطویی شروع بوکوده و بوگفته: «من ا حقیقت بفهمستم کی خودا خو مردومان میانی هیچ فرقی ننه، ۳۵ بلکی هر قوم میان، هر کس اون جا بترسه و عدالت به جا باوره، خودا اون قوبیل کونه۔ ۳۶ هطویی کی

دائیدی، خودا خو پیغام صلح و سلامتی اسرائیل قومہ توسط عیسای مسیح، کی ہمہ تان خوداوند ایسہ، اوسہ کودہ. ۳۷ شومان خودتان جہ او پیلہ دانہ ایتفاقی کی سرتاسر یهودیہ دکفتہ خبر داریدی و دائیدی کی ہمہ ای چیزان بعد یحییٰ تعلیم در مورد تعمیم جہ جلیل استان شروع بوبوستہ. ۳۸ خودا عیسای ناصری، روح القدس قوت امرأ مسح بوکودہ، جوری کی ہمہ جا گردستی و بہ نیکویی رفتار کودی و توما اوشانی کی اسیر شیطان بید، شفا دی، چہ کی خودا اون امرأ بو.

۳۹ «امان ہمہ تان شاہدان تومامی عیسی کارانیم، کی سرزمین یهود و اورشلیم میان انجام بدہ. ولی او قوم اون مصلوب بوکودیدی و بوکوشتیدی. ۴۰ خودا اون، سومی روز رہ جہ مردہ یان میان ویریزانہ و خیلی یان اون بیدہ بیدی، ۴۱ ولی نہ ہمہ کس، بلکی شاہدانی کی خودا خودش بیشتر انتخاب بوکودہ بو. وختی عیسی جہ مردہ یان ویریشته بو، امان ہمہ تان اون امرأ غذا و آب بوخوردیم. ۴۲ اون امرأ دستور بدہ قومہ موعظہ بوکونیم و آشکارا شہادت بدیم کی خودا اون داوڑ زندہ یان و مردہ یان قرار بدہ. ۴۳ ہمہ ای پیامبرانم ہن شہادت دیہیدی کی ہر کس بہ عیسی مسیح ایمان باورہ، اون گوناہان بخشیدہ بہ.»

۴۴ پطرس اوشان امرأ گب زن دبو کی روح القدس بر ہمہ ای اوشانی کی کلام ایشنوستن دیید، نازل بوستہ. ۴۵ توما ایمانداران جہ قوم یهود کی پطرس امرأ بمو بید، وختی بیدہ بیدی کی غیر یهودیانم روح القدس جا پور بوستید، تعجب بوکودیدی، ۴۶ چہ کی بیشنوستیدی اوشان بہ زبانان جورواجور گب زہ بیدی و خودای پرستش کودیدی. پس پطرس بوگفتہ: ۴۷ «ہسہ دچہ کسی تانہ بگہ کی اشان نتائیدی اب امرأ تعمیم بیگیرید؟ چون روح القدس امی مانستن دریافت بوکودیدی.» ۴۸ ہن وستی دستور دہہ اوشان بہ عیسی مسیح نام تعمیم بدید. اوشانم پطرس جا خواہش بوکودیدی تا چند روزی اوشان ورجہ بیسہ.

پطرس اورشلیم کلیسا رہ گزارش دہہ

۱ رسولان و براران ایمانداری کی یهودیہ ایسہ بید، بیشنوستیدی کی غیر یهودیانم بہ خودا کلام ایمان باوردیدی. ۲ وختی پطرس واگردستہ اورشلیم، ایمانداران کی ختنہ بوبوستہ بید اصرار داشتیدی غیر یهودیانم ختنہ بیید. اوشان پطرس امرأ بحث و گفتگو بوکودیدی و بوگفتیدی: ۳ «چوطو بتانستی بیشی مرداکان خانہ بی کی ختنہ نوبوستیدی و اوشان امرأ ہمسفرہ بیی؟»

۴ پطرس توما ماجرای جہ اول، اوشان رہ تعریف بوکودہ و بوگفتہ: ۵ «من شہر یافا میان دوعا کودن دوبوم کی رویا میان بیدم ایتا پیلہ سفرہ بوقچہ مانستن کی جہ چہار گوشہ آویزان بو آسمان جا بیجیر بمو، فارسہ می ورجہ. ۶ او سفرہ دورون، چہار پایان و جانوران و خزندہ یان و پرنده یان آسمان بیدم ۷ و صدایی بیشنوستم کی مر گفتی: (ای پطرس، ویریز، اوشان سر وین و بوخور.)

۸ «جواب بدم: هرگز خوداوندا، من هيچ وخت ايچي كي حرام يا نجست بيه نوخوردم.»

۹ «دوواره آسمان جا ندا بمو كي: (هرچي خدا پاك بوكوده، تو نجست نوكون.) ۱۰ سووم مرتبه تكرر بوبوسته و هو دم سوفره بوشو آسمان جور.»

۱۱ «هو وخت سه نفر كي جه قيصره مي ورجه اوسه كوده بيد، بموييد او خانه ميان كي من ايسه بوم. ۱۲ روح القدس مر بوگفته كي وا او سه نفر امرأ بشم و شك نوكونم. امانم واگردستيم، بموييم گرنليوس خانه ميان و اشيش نفر ايمانداران كي يافا شين بيد امي امرأ بمويدي. ۱۳ اون امره تعريف بوكوده كي چوطو خو خانه ميان فرشتهي بيده كي اون بوگفته: (چند نفر اوسه كون، بيشيد يافا و شمعون كي اون «پطرس» دوخوانيدي، آيه باوريد. ۱۴ اون پيغامی تره اوره كي تر و تومامي او شاني كي تي خانه ميان زندگي كونيدي نجات دهه.)

۱۵ «وختي شروع به گب زن در مورد نجات جه طريق عيسي مسيح بوكودم، اوشان روح القدس دريافت بوكوديدي، اوجور كي امان پيشتر روح القدس فيگيفته بيم ۱۶ و من خوداوند كلام به ياد باوردم كي بفرماسته بو: (يحيي اب امرأ تعميد ديي ولي شومان به روح القدس تعميد گيريدي.) ۱۷ اگه خدا هو عطاي اوشان ببخشه، كي بعد امي ايمان آوردن به عيساي مسيح خوداوند، امر فده، پس من كيسم كي بتانم خدا كار جولوي بيگيرم؟»

۱۸ وختي ايمانداران يهودي اگبان بيشنوستيدي، آرام بوستيدي، خدا نام جلال بديدي و بوگفتيدي: «راس راسي كي خدا توبه حيات بخش غيريهوديان ره هديه بوكوده!»

انطاكيه كليسا

۱۹ بعد اونكي استيفان سنگسار بوكوديدي، ايمانداران شكنجه و آزارم شروع بوبوسته بو، جه خاطر ايمانداران پخش و پلا بوبوستيد و به فينيقيه و قبرس و انطاكيه بوشويدي و خدا كلام جز يهوديان هيكس ديگر بشارت نديدي.

۲۰ ولي اوشان ميان، مرداكاني جه قبرس و قيروان ايسه بيد كي وختي به انطاكيه فارسه بيد، بوشويدي غيريهوديان ورجه و اوشان ره بشارت بديدي كي ايسه. ۲۱ خوداوند دسم اوشان امرأ بو و تعداد زيادي ايمان باورديدي و خوداوند طرف بمويدي.

۲۲ وختي آخبر به اورشليم ايمانداران فارسه، اوشان برناباي اوسه كوديدي كي بشه انطاكيه. ۲۳ وختي اويه فارسه و نجات ايمانداران كي جه خدا فيض بو، بيده خوشحال بوسته و اوشان تشويق بوكوده كي تومام ديل و جان امرأ به خوداوند عيسي مسيح وفادار بمانيد. ۲۴ چونكي ايتا مرد نيكوكار و خدا ترس بو و پري روح القدس داشتي، مردومان زيادي اون بشارت امرأ به خوداوند ايمان باورديدي.

۲۵ بزین برنابا جہ اویہ راہ دکفتہ، بوشو تارسوس شہر میانی کی شائول پیدا بوکونہ. ۲۶ وختی شائول پیدا کودہ، اون خو امرأ بأورده انطاکیہ. اوشان اویہ یک سال تومام ایمانداران زیادتی تعلیم بدیدی. انطاکیہ شہر میانی بو کی اولی مرتبہ پیروان عیسای خوداوند «مسیحی» دوخوآدیدی.

۲۷ او روزان، چند نفر ایمانداری کی عطایای نبوت داشتیدی جہ اورشلیم بموییدی انطاکیہ. ۲۸ اینفر جہ اوشان کی آگابوس نام داشتی، ویریشته و روح القدس الهام امرأ، ایتا پیلہ قحطی پیشگوی بوکودہ کی روم سرزمین میانی ایتفاق دکفتی. آقحطی گلودیوس حکومت زمان رخ بدہ. ۲۹ ایمانداران تصمیم بیگفتیدی کی هر کی خودش بضاعت امرأ مسیحیان ساکن یهودیہ رہ کومک روانہ کونید. ۳۰ پس آکار بوکودیدی و هدایای برنابا و شائول دس فدیدی تا اوشانم اورشلیم کلیسا مشایخ فدید.

پطرس نجات جہ زندان خودا فرشته کومک امرأ

۱ هو وختان، هیروڈیس پادشاه اذیت و آزار و شکنجہی مسیحیان شروع بوکودہ. ۲ اون فرمان بدہ یوحنا برار، یعقوب کی ایتا جہ دوازده تا رسول بو، شمشیر امرأ بوکوشید. ۳ وختی بیدہ کی آکار، یهودیان خوشحال کودہ، ایام عید فصیح میانی پطرس دسگیر بوکودیدی. ۴ هیروڈیس بعد پطرس گيفتن، اون تاودہ زندان دورون و چهار دستہی چهار نفری نگهبان بنہ تا اون بپایید و تصمیم داشتی کی بعد عید فصیح، تومامی مردوم ورجہ اون محاکمہ بوکونہ. ۵ پس پطرس زندان میان بداشتیدی ولی ایمانداران تومام قوت امرأ اون رہ دوعا کودیدی. ۶ ای شب قبل او روز کی هیروڈیس تصمیم داشتی پطرس محاکمہ بوکونہ، اون بہ دوتا زنجیر دوستہ و بین دوتا سرباز نگهبان بوخوفتہ و نگهبانانم زندان در جلو نگهبانی دیدی. ۷ ایدفعہی خوداوند فرشتہ آشکار بوستہ و نوری زندان میان بتابستہ. فرشتہ پطرس پهلوی بزه و اون خواب جا ویریزانہ، بوگفتہ: «فوری ویریز!» هو وخت زنجیرانم اون دسان جا بکفتیدی زمین سر. ۸ فرشتہ اون بوگفتہ: «تی کمر دود و تی کفش دوکون.» پطرس هو کار بوکودہ. فرشتہ اون بوگفتہ: «تی ردای دوکون و می دونبالسر بیا.» ۹ بزین پطرس اون دونبالسر زندان جا بیرون بوشو. اون باور نوکودی او کاری کی فرشتہ انجام دتن درہ واقعیہ، بلکی فکر کودی رویا دتن درہ. ۱۰ اوشان جہ اولی و دومی نگهبانان چومان جلو بوشویدی و فارسہ ییدی دروازہی آہنی کی رو بہ شہر وار بوستی. دروازہ خورہ خورہ اوشان جلو وار بوستہ. پس بوشویدی بیرون تا آخر کوچہ فارسہ ییدی و فرشتہ ناخبر ایدفعہی غیب بوستہ.

۱۱ او وخت پطرس بہ خودش بمو خو امرأ بوگفتہ: «ہسہ دیقین دارم کی خوداوند خو فرشتہی اوسہ کودہ کی مر جہ ہیروڈیس دس و اونچی کی قوم یهود اینتظار داشتیدی، نجات بدہ.» ۱۲ وختی بفہمستہ، بوشو مریم خانہ کی یوحنا مار بو، هو یوحنایی کی اون «مرقس» ہم دوخوآدیدی. خیلی یان بمو بید اویہ کی دوعا بوکونید. ۱۳ وختی پطرس در بزه، دوختری کی رودا نام داشتی و اویہ خدمتکار بو بمو کی در واکونہ. ۱۴ هو وخت کی پطرس صدای بشناختہ،

جہ خوشحالی ہول کودہ و در و آنکودہ، بوشو اطاق دورون و اوشان بوگفته کی: «پطرس در سر ایسہ!» ۱۵ اوشان، اون بوگفتید: «مگہ تی عقل جہ دس بدیی؟» ولی وختی بیدہ بیدی اون تاکید کونہ، بوگفتیدی: «شاید اون فرشتہ ی محافظ ایسہ کی بمو.»

۱۶ پطرس ہطو در زئن ادامہ دئی. وختی در واکودیدی، پطرس بیدہ بیدی و ہمہ تان تعجب بوکودید. ۱۷ ولی پطرس خو دس امرأ اشارہ بوکودہ کی ساکت بید و اوشان رہ تعریف بوکودہ کی چوطویی خوداوند اون زندان جا نجات بدہ. بزین بوگفته: «یعقوب و ایمانداران دیگرم خبر بدید». بزین جہ اوشان پہلو بوشو جای دیگر.

۱۸ فردا صبح رہ، نگہبانان دیل زالہ ترکستن دبو، چونکی نانسیدی پطرس سر چی بمو. ۱۹ ہیرودیس دستور بدہ ہمہ جا پطرس دونبال بگردید و چون اون نیافتیدی نگہبانان جا بازجویی بوکودہ، بزین فرمان بدہ اوشان بوکوشید. بزین ہیرودیس جہ یہودیہ بہ قیصریہ بوشو و مدتی اویہ پیسہ.

ہیرودیس مردن

۲۰ ہیرودیس مردوم صور و صیدون کینہی بہ دیل داشتی. هن وستی مردومان او دوتا شهر ہمدیلی امرأ بوشویدی ہیرودیس پیشکار ورجہ کی «بلاستوس» نام داشتی. اون خوشان امرأ ہمراہ بوکودیدی کی پادشاہ امرأ آشتی بوکونید، چونکی اشهران آذوقہ ہیرودیس سرزمین جا فراہم بوستی.

۲۱ او روزی کی ہیرودیس تعیین بوکودہ بو، لیاس پادشاہی دوکودہ، تخت پادشاہی سر بینشہ و ہمہ تان رہ گب بزہ. ۲۲ مردوم کی پادشاہ گبان بیشنوستیدی فریاد بزہ بیدی، بوگفتیدی: «اگبان ایتا جہ خودایان گبانہ، نہ جہ ایتا آدم!» ۲۳ ہو وخت، چون ہیرودیس مردوم و ہاشتہ کی بہ جائی خودا اون پرستش بوکونید، خوداوند فرشتہ ایم اون زمینگیر کودہ و اون جان دورون کرم دکفتہ و اون ایچہ ایچہ بوخوردہ، بزین اون بمردہ. ۲۴ ولی خودا کلام ہمہ روزان مردومان دورون رشد کودی و پخش بوستی.

برنابا و شائول رسالت

۲۵ چون برنابا و شائول خوشان خدمت اورشلیم میانی بہ انجام فأسانیدی، جہ اورشلیم بہ انطاکیہ و اگر دستیدی و یوحنایم کی «مرقس» نام داشتی خوشان امرأ باوردیدی.

۱ ہو وختان انطاکیہ کلیسا دورون، چندتا نبی و معلّم ایسہ بید کی اشان نام: برنابا، شمعون کی ان «نیجر» دوخوآیدی، لوکیوس قیروانی و منائن کی ہیرودیس ناباری بو و شائول تارسوسی ہم اوشان امرأ بو. ۲ ایتا روزی کی اوشان روزہ گیفتن دبید و خوداوند عیادت کون دبید، روح القدس اوشان بوگفته: «برنابا و

پولس انتخاب ہوکونید بہ خاطر کی من اوشان خدمتی رہ دوخوادم۔» ۳ او وخت بعد روزہ و دعا، او دو نفر خدمت رہ دس گذاری ہوکودید و اوشان اوسہ کو دیدی جزیرہی قبرس۔

بشارت دئن پولس و برنابا جزیرہی قبرس میانی

۴ روح القدس شائل و برنابای اوسہ کودہ کی بیشید بندر سلوکیہ و جہ رای دریا فارسہ ییدی قبرس۔ ۵ وختی اوشان وارد بندر سالامیس ہو بوستیدی، یہودی کنیسہ یان دورونی خودا کلام موعظہ کو دیدی۔ یوحنا ایم کی معروف بہ «مرقس» ہو، اوشان امرأ خدمت کودی۔

۶ آسہ نفر سرتاسر او جزیرہی بگردستیدی تا فارسہ ییدی شہر پافوس دورونی۔ او یہ اینفر بیدہ ییدی کی یہودی جادوگر و نبی دروغی ہو کی بازیشوع نام داشتی و اون «علیما» ہم دوخوآ دیدی۔ ۷ اون ایتا جہ دوستان والی ای او شہر، سرگیوس پولس، ہو۔ والی کی مردی دانا ہو شائل و برنابای دوخوآدہ، چونکی خواستی خودا کلام بیشنہ۔ ۸ ولی علیما، کی اون نام بہ معنی جادوگر ایسہ، اوشان امرأ مخالفت کودی کی ونالہ سرگیوس پولس ایمان باورہ۔ ۹ شائل، کی اون پولس دوخوآ دیدی، روح القدس جا پور بوستہ بہ اون چومان خیرہ ہو بوستہ، ہوگفتہ: ۱۰ «ای ابلیس زای، ای دشمن توما خویان، کی پور مکر و حیلہ ایسی! نخوایی جہ گمراہ کودن مردومان جہ راہ راست خوداوند دس بکشی؟ ۱۱ بدان کی ہسہ خوداوند دس امرأ تی چومان کور بہ و چند روزی نتانی آفتاب بیدینی۔» ہو وخت علیما چومان کور بوستہ و نتانستی چیزی بیدینہ۔ ا طرف او طرف گردستی و مردوم جا کومک خواستی کی اون رای نیشان بید۔

۱۲ وختی والی اونچی کی پیش بمو بیدہ، ایمان باورہ چونکی جہ اوشان تعلیم دربارہی خوداوند، حاج و واج بمانستہ ہو۔

پولس موعظہ کونہ کی عیسی مسیح، قوم اسرائیل کتاب مقدس تکمیل کودہ

۱۳ او وختان پولس خو ہمراہان امرأ جہ رای دریا، جہ پافوس بہ پرچہی پامفیلیہ ہوشویدی۔ ولی او یہ یوحنا اوشان جا سیوا ہو بوستہ و واگردستہ اورشلیم۔ ۱۴ اوشان جہ پرچہ شہر ہوگودشتیدی و فارسہ ییدی انطاکیہ کی ایتا جہ شہران استان پیسیدیہ ہو۔ روز* سبت کی یہودیان رہ روز استراحت و پرستش خوداوند ہو، ہوشویدی کنیسہ میان، بینشتیدی۔ ۱۵ بعد خواندن موسی کتاب تورات و پیغمبران دیگر، کنیسہ رہبران اوشان ہوگفتید: «براران، اگہ پیام دیلگرم کونندہ مردوم رہ داریدی، بیگید۔»

* ۱۴:۱۳ کتاب تورات دورون بینشتہ ہو بوستہ کی سبت، ہفتمی روز ہفتہ بی ایسہ کی او روز میان وستی یہودیان کار نوکونید و توما روز عیادت و استراحت ہوکونید۔

۱۶ پولس به پا پیسه و خو دسِ امرأ اوشان اشاره بوکوده و بوگفته: «ای مرداگان اسرائیلی، ای خوداترسان، گوش بدید! ۱۷ خودا، امی پتران، یعنی قوم بنی اسرائیل، انتخاب بوکوده و اوشان امرأ عهد و پیمان دَوسته و او قوم زمانی کی مصر میان اسیر بید سربولند کوده. خو قدرتِ عظیمِ امرأ اوشان او سرزمینِ جا بیرون باورده ۱۸ و نزدیک چهل سال بیابان میان اوشان تحمل بوکوده. ۱۹ اون هفت تا قوم کی کنعان میان ایسه بید، نابود کوده و خودش قوم، وارث او سرزمین بوکوده. ۲۰ توام اشان مدت زما ت اسارت مصر دورون، تا به دس آوردن سرزمین موعود، چهار صد و پنجاه سال طول بکشه. تا سموئیل نبی زمان، رهبران زیادی خودا قدرت امرأ او قوم اداره بوکودیدی. ۲۱ بعد رهبران، امی قوم آرزوی ایتا پادشاه داشتیدی و خودا شائول اوشان فده کی قیس زای جِه بنیامین قبیلہ بو و اون چهل سال پادشاهی بوکوده.

۲۲ «وختی خودا پادشاهی شائول جا فیگفته، داوود انتخاب بوکوده کی اوشان پادشاه به و بر اون شهادت بده، بوگفته: (من یسا زای، داوود کی مورڈ پسند من ایسه انتخاب بوکودم؛ اون کسی ایسه کی توام می کار، دیل و جان امرأ انجام دهه.)

۲۳ «جِه نسل داوود نبی، هوطو کی خودا وعده بده بو، عیسای اوسه کوده تا اسرائیل ره نجات دهنده بیه. ۲۴ قبل ان کی عیسی بایه، یحیی قوم بنی اسرائیل ره موعظه کودی کی توبه بوکونید و تعمید فیگیرید. ۲۵ وختی یحیی خو دوران به آخر رسان دبو، بوگفته: (فکر کونیدی کی من کی ایسم؟ من مسیح نییم؛ بلکه اون بعد من آیه کی من لایق نییم اون کفش بند و اکونم.)

۲۶ «ای بران، ای ایبراهیم زاکان و ای غیریهودیان خوداترس کی آیه ایسه بیدی، و ابدانید امی وستی بو کی خودا، خو زای عیسی مسیح نجات دهنده اوسه کوده. ۲۷ مردوم اورشلیم و اوشان پیلہ کسان، عیسای نشناختیدی و پیغمبرانی کی اوشان کتاب دورون پیشگویی بو بوسته بو و همه سبت روزان میانی اون خواندیدی، نفهمستیدی. اوشان عیسی محکوم کوندا امرأ انبیا پیشگوی به انجام برسانیدی ۲۸ و هر چند هیچ گوناھی عیسی مسیح کوشتن ره پیدا نوکودیدی جِه پیلاطس حاکم بخواستیدی کی اون بوکوشه. ۲۹ وختی هرچی کی خودا کلام میانی درباره اون بینویشته بو بوسته بو به انجام برسانه بیدی، اون صلیب جا بیجیر باوردیدی و قبر دورون بنه بید. ۳۰ ولی خودا اون، جِه مُرده یان دورونی زنده کوده ۳۱ و عیسی مسیح خیلی روزان خودش به شاگردانی کی جِه سفر جلیل به اورشلیم اون امرأ بمو بید آشکار کوده. هسه اوشان امی قوم میان اون شاهدان ایسیدی.

۳۲ «امان شمر بشارت دیمی کی خودا به خو وعده بی کی امی پتران فده بو ۳۳ عمل بوکوده و امی وستی، کی اوشان زاکان ایسیم، عیسای جِه دنیای مُرده یان زنده کوده، هوطو کی مزموژ دوّم میان بینویشته بو بوسته:

«تو می پسر ایسی؛

ایمروز، من تر می زای چاکو دم.*

۳۴ «و خودا اون جہ مُردہ یان ویریزانہ کی ہرگز اون جسم فاسد نہ، ہوطو کی اشعیا کتاب دورون بمو:

«من او برکات مقدس و ایطمینان بخشی»

کی داوود قول بدہ بوم، تر بخشم.*

۳۵ ہن وستی جائی دیگرم کتاب زبور میانی بوگفته بو بوستہ کی خودا ایجازہ نده کی اون زاک بدن مقدس قبر میانی
بپوسہ:

(تو می پتر، ونالی کی تی زای کی قدوسہ بعد مردن جہ میان بشہ).*

۳۶ «چونکی داوود، بعد اون کی خودا ارادہ امرأ مردوم خو زمانہی خدمت بوکودہ بو، بمرده و خو آبا جداد ورجہ بوشو

و اون جسم فاسد بوستہ. ۳۷ عیسی مسیح، کی خودا اون جہ دنیای مُردہ یان ویریزانہ اون جسم فاسد نو بوستہ.

۳۸ «پس، ای براران، وستی بدانید کی آمرزش گوناہان، عیسی مسیح، امرہ فراہم بوکودہ. ۳۹ ہسہ ہر کی بہ عیسی

نام ایمان باورہ، جہ گوناہان آزاد بہ، کی موسی شریعت نتانستی اون رہ او کار بوکونہ. ۴۰ پس مواظب ببید پیغمبران

گبان در مورڈ شومان نہ کی بفرمأستیدی:

۴۱ «بیدینید، ای شومانی کی ہمہ چی مسخرہ کونیدی،

تعجب بوکونید و بزین ہلاک بید،

چون شیمی زمان میان کاری کونم

کی ہر کس ہم اون شمر واگویا بوکونہ

بازم باور نوکونید.»*

۴۲ وختی پولس و برنابا جہ کنیسہ بیرون شوئون دبید، مردوم اوشان جا خواہش بوکودیدی کی ہفتہی دیگرم

ہہ کلام اوشان رہ بیگید. ۴۳ وختی کی مردوم کنیسہی ترک کودیدی، خیلی جہ یہودیان و غیر یہودیانی کی یہودی

بو بوستہ ببید، پولس و برنابا دونبالسر راہ دکفتیدی. پولس و برنابا اوشان تشویق بوکودیدی کی قوت امرأ خودا فیض

دورون ببسید.

۴۴ ہفتہی بعدم شنبہ روز رہ کی ہو سبت ایسہ، تقریباً تومام مردوم شہر دور ہم جمع بوستہ ببید کی خوداوند کلام

بیشنوید. ۴۵ ولی وختی یہودیان، زیاد بوستن مردوم بیدہ ببیدی جہ حسودی و مخالفت، پولس بی حرمتی بوکودید.

* ۳۳:۱۳ مزمو ر ۲، آیہ ۷

* ۳۴:۱۳ اشعیا نبی کتاب، باب ۵۵، آیہ ۳

* ۳۵:۱۳ مزمو ر ۱۶، آیہ ۱۰

* ۴۱:۱۳ حَقوق نبی کتاب، باب ۱، آیہ ۵

۴۶ ولی پوئس و برنابا، شجاعتِ امرأ بوگفتیدی: «لازم بو خودا کلامِ اوّل شمَرِ فآرسائیم. ولی چون شومان اون قوبیل نوکودیدی و خودتان لایقِ زندگیِ ابدی نآستیدی، پس هسه امان شیمی غیریهودیآن ورجه. ۴۷ چونکی خوداوند امر بفرماسته کی:

«(تر غیریهودیآن ره نوری قرار بدم، کی نجات به گوشه و کنارِ زمینِ فآرسائی.)»*

۴۸ وختی غیریهودیآن بیشنوستیدی، خوشحال بوستیدی و خوداوند کلامِ ستایش بوکودیدی؛ و اوشانی کی پیشتر زندگیِ ابدی ره انتخاب بوبوسته بید، ایمان باوردیدی.

۴۹ خوداوند کلام، سرتاسر اطرافِ شهرِ انطاکیه پسیدیہ پخش بوسته. ۵۰ ولی یهودیان حسادتِ جا، او شهر پولداز زناکان کی یهودی بوبوسته بید و با نفوذ بید و هطو سرشناس مرداگان تحریک بوکودیدی تا پوئس و برنابای اذیت و آزار بوکونید. اوشان پوئس و برنابای جِه او شهر و دور اطراف بیرون کودیدی. ۵۱ پوئس و برنابا اکاژ وستی خوشان خاک پای اویہ بتکنه بیدی و به شهرِ قونیه بوشو بیدی. ۵۲ ولی انطاکیه ایمانداران جِه شادی و روح القدس پور بید.

پوئس و برنابا قونیه شهر میان

۱ قونیه میانم پوئس و برنابا به کنیسه یهودیان بوشو بیدی و ایجور جِه خودا کلامِ گب زهیدی کی مردومان زیادی جِه یهودیان و غیریهودیآن ایمان باوردیدی. ۲ ولی یهودیانی کی ایمان نأورده بید، غیریهودیآن تحریک کودیدی و اوشان فکر بر ضد ایمانداران خراب کودیدی. ۳ پس پوئس و برنابا زمان زیادی اویہ بیسه بیدی و شجاعتِ امرأ در مورد خوداوند عیسی مسیح گب زهیدی. خوداوند اوشان قوت انجام آیات و معجزات فدیی و خو کلام فیض تأیید کودی. ۴ او شهر مردوم دو دسته بوبوستیدی؛ ایتا دسته جِه یهودیان طرفداری کودیدی، ایتا دسته یم رسولان طرفدار بید. ۵ وختی یهودیان و غیریهودیآن، خوشان قوم پیله دانه آدمان امرأ همدمس بوبوستیدی کی پوئس و برنابای اذیت و آزار و سنگسار بوکونید، ۶ اوشان واخبر بوستیدی، به لیکائونیه شهران، یعنی لِسْتره و دربه و اون اطراف، فرار بوکودیدی ۷ و اویہ خودا کلام بشارت دَیید.

پوئس و برنابا لِسْتره و دربه شهران میان

۸ لِسْتره میان ایتا مردای شل مادرزاد نیشته بو کی نتانستی خو پایان تکان بده و هرگز راه نوشو بو. ۹ وختی کی پوئس جِه خودا کلام گفتن دبوو، اون پوئس گبان حُب گوش دیی. پوئس کی بیده اون گبان دقت امرأ گوش دتن دره، بفهمسته کی اون ایمان داره کی تانه شفا پیدا بوکونه. ۱۰ پس صدای بلند امرأ اون بوگفته: «ویریز تی پایان سر به پا بیس!» اون هو موقع جِه خو جا سر ویریشته، به راه دکفته.

۱۱ وختی مردوم، اونچی کی پولس انجام بده بو بیده بیدی، به خوشان زبان لیکائونی فریاد بزه بیدی: «خودایان انسان مأنستن بوبوستیدی، امی وستی بیجیر بمویدی!» ۱۲ اوشان برنابای «زئوس»، رئیس خوشان خودایان، دانستیدی و پولس کی بهتر تانستی گب بزنه، «هرمس» کی اوشان سخنگوی خودایان بو. ۱۳ کاهن زئوس کی اون معبد بیرون شهر دروازه نه بو، چندتا نر گاب و چندتا تاج گل مردوم امرأ بأوردیدی شهر دروازه دورونی تا پولس و برنابا ره قربانی بوکونید چونکی اوشان خوشان خودا دانستیدی.

۱۴ وختی برنابا و پولس بیشترتیدی، خوشان لیاسان چاک بزه بیدی، بودووستیدی مردوم میان و فریاد بزه بیدی، بوگفتیدی: ۱۵ «ای مردومان، چره آکار کونیدی؟ امان شیمی مأنستن انسانیم و شمر بشارت دئن دریم کی جه ابتان پوچ دس بکشید و به خودای زنده رو بأورید کی آسمان و زمین و دریا و هر اونچی کی اوشان میان نهه خلق بوکوده. ۱۶ خودا در گذشته اجازه بده کی توماق قومان غیریهودی هر کدام خوشان رای بشید. ۱۷ خودا خو حرم کاران مره خو وجود همیشه ثابت بوکوده و خو رحمت امرأ آسمان جا شمر واران، فصلان پور محصول و خوراک فراوان فده و شیمی دیلان شادی مره پور کونه.» ۱۸ آخر سر اگبان امرأ، مردوم به زحمت آرام کودیدی کی اوشان ره قربانی نوکونید. ۱۹ ولی بعد اون، یهودیانی جه انطاکیه و قونیه بمویدی، مردوم خوشان امرأ همدس بوکودیدی و پولس سنگسار بوکودید. چون خیال بوکودیدی کی بمرده، اون فکشه بیدی، بریدی بیرون تاوده بیدی. ۲۰ اما وختی ایمانداران اون دور جمع بوستیدی، ویریشته و به شهر واگردسته. فردای او روز، اون و برنابا به شهر دربه بوشویدی.

پولس و برنابا واگردستن به انطاکیه سوریه

۲۱ اوشان دربه شهر میانم بشارت بدیدی و خیلی یان اوپه ایماندار چاکودیدی. جه اوپه واگردستیدی، بوشویدی لستره و قونیه و انطاکیه. ۲۲ او شهران میان ایمانداران تقویت و تشویق بوکودیدی کی خوشان ایمان دورون قایم بسید و اوشان نصیحت بوکودیدی کی «امان سختی زیادتی و پوشت سر بنیم تا به خودا پادشاهی فارسیم.» ۲۳ اوشان، هر کلیسا میان، مشایخی ایمانداران ره انتخاب بوکودیدی و دوعا و روزه امرأ اوشان به خوداوند عیسی کی به اون ایمان بأورده بید بیسپردیدی. ۲۴ بزین جه پیسیدیه سرزمین دواستیدی، فارسه بیدی پامفیلیه. ۲۵ وختی شهر پرجه میان خودا کلام موعظه بوکودید، جه اوپه به شهر بندری آتالیه بمویدی.

۲۶ پولس و برنابا جه شهر آتالیه کشتی امرأ واگردستیدی بوشویدی انطاکیه سوریه، انطاکیه هو شهری بو کی پولس و برنابا اوپه به فیض الهی بیسپرده بوبوسته بید، تا خدمتی شروع بوکونید کی الان دوما کودیدی. ۲۷ وختی فارسه بیدی اوپه، ایمانداران کلیسای دوز هم جمع کودیدی و اوشان ره بوگفتیدی کی خودا اوشان دس جا چی کارانی انجام بده و چوطو غیریهودیان ره رای ایمان نشان بده ۲۸ و زمان زیادی اوپه ایمانداران امرأ بیسه بیدی.

اورشلیم شورا

۱۵

۱ چند نفر یہودیہ جا بموییدی انطاکیہ شہر میانی و ایمانداران تعلیم غلط دیدی کی: «اگہ بہ موسیٰ سنت ختنہ نبید، نتائیدی نجات دریافت بوکونید.» ۲ وختی پولس و برنابا اوشان امرأ بہ مخالفت ویریشیدی، قرار بر ان بوبوستہ کی پولس و برنابا چند نفر جہ ایمانداران امرأ بیشید اورشلیم و خوشان اختلاف، رسولان و مشایخ امرأ در میان بنید. ۳ بزین کلیسا اعضا، اوشان بدرقہ بوکودیدی و ہطوی کی بہ طرف اورشلیم جہ رائے فینیقیہ و سامرہ بوشویدی، خبر ایمان آوردن غیر یہودیان بوگفتیدی و توما ایمانداران خوشحال بوستیدی.

۴ وختی پولس و برنابا فارسہ ییدی اورشلیم، ایمانداران و رسولان و مشایخ بموییدی اوشان پیشواز و پولس و برنابا ہرچی کی خدا اوشان دس جا انجام بدہو، اشان رہ بوگفتیدی. ۵ چند نفر جہ فرقہ فریسیان کی ایمان باوردہ بید، ویریشیدی، بوگفتیدی: «غیر یہودیان کی مسیحی بوبوستیدی لازمہ کی ختنہ ببید و اوشان دستور بدیم کی موسیٰ شریعت بجا باورید.»

۶ پس رسولان و مشایخ دوز ہم جمع بوستیدی تا مسئلہ رسیدگی بوکونید. ۷ آخر سر بعد گبان زیادی، پطرس ویریشہ و اوشان بوگفتہ: «ای براران، شومان دانیدی کی پیشتر، خودا مر جہ شیمی میان انتخاب بوکودہ تا غیر یہودیان می جا خبر خوش انجیل بیشنوید و ایمان باورید. ۸ خودا کی جہ ہر کس قلب باخبرہ روح القدس کی ہطو امر ببخشہ، بہ غیر یہودیانم فدہ تا ثابت بوکونہ کی اوشانم امی مانستن قوبیل کونہ. ۹ اون امی میان و اوشان میان ہیچ فرقہ نہ. ہطو کی ایمان امرأ، امی دیل پاک کودہ، اوشان دیل پاک بوکودہ. ۱۰ ہسہ چرہ خوآیدی خودا صبر آزمایش بوکونید و باری کی نہ امان و نہ امی پتران، تحمل اون نأشتیم، بہ دوش ایمانداران غیر یہودی بنید؟ ۱۱ ہمہ تان امان ایمان داریم کی مجانی فیض خوداوند عیسی مسیح امرأ نجات پیدا بوکودیم و غیر یہودیانم ہطوی.»

۱۲ ہمہ تان ساکت بوستیدی و بہ اونچی کی برنابا و پولس گفتن دبید گوش دیدی، کی چوطو خودا نشانہ یان و معجزاتی اوشان دس جا غیر یہودیان رہ آشکار کودہ بو. ۱۳ ولی وختی اوشان گبان توما بوستہ، یعقوب کی اورشلیم کلیسا رہبر بو، واگردستہ بوگفتہ: «ای براران، گوش بدید! ۱۴ شمعون پطرس، امر بوگفتہ کی چوطو خودا پیشتر، غیر یہودیان رحمت بوکودہ کی جہ اوشان میانی خو قوم انتخاب بوکونہ. ۱۵ ا گبان، پیامبران گبان امرأ برابری کونہ، ہوطو کی عاموس نبی کتاب دورونی بینویشہ بوبوستہ:

۱۶ «خودا بفرمأستہ: «بعد اون واگردم

و داوود سلطنت کی جہ بین بوشو، دووارہ بر پا کونم

و اون خرابہ یان آباد کونم

۱۷ تا بقیہ کی کسان کی زمین رو زندگی کونیدی،

یعنی تو مامیٰؑ غیر یہودیّان کی می نام اوشانؑ رو نہہ،

ہمہ تان خوداوندؑ طلب بوکونید۔*

ہن چیزانی ایسہ کی خوداوند فرمایہ، ۱۸ خوداوندی کی او کارانی کی جہ قبلان آشکار بوستہ بو، بہ انجام برسآنہ۔
۱۹ «پس من یعقوب، می عقیدہ آنہ کی نوستی غیر یہودیّانی کی خودا طرف آیدی اصرار بوکونیم کی حتماً
یہودیّانؑ تو مامؑ قانونانؑ رعایت بوکونید، ۲۰ بلکی غیر یہودیّانؑ رہ بینیوسیم کی جہ خوردنؑ قربانیؑ بتانؑ، بی عفتی
آدمانؑ، حیواناتی کی خفہ بوستیدی و خون، دوری بوکونید۔ ۲۱ چونکی موسی شریعت جہ قدیم ایام و تا ہسہ ہر
شہرؑ دورونی موعظہ بوستی و اونؑ کیتابؑ تورات سبتؑ روزانؑ دورونی کنیسہ یانؑ میانی بخواندہ بوستی و ہطویم ادامہ
دارہ۔»

شورا نامہ بہ غیر یہودیّانی کی ایماندار بید

۲۲ بزین رسولانؑ و مشایخؑ، تو مامؑ کلیسا اعضاؑ امرآؑ تصمیم بیگفتیدی کی جہ خوشانؑ میان مردا کانیؑ انتخاب
بوکونید کی پولسؑ و برناباؑ امرآؑ اوسہ کونید انطاکیہ۔ سیلاسؑ و یہودایؑ کی برسابا نام داشتی انتخاب بوکودیدی کی
ایماندارانؑ میانی رہبر بید۔ ۲۳ پس ایتا نامہ اورشلیمؑ شورا رہ بینیوشتیدی و فدیدی پولسؑ و اونؑ ہمراہانؑ دس کی
متنؑ نامہ اطویبی بو:

«جہ آمانؑ رسولانؑ و مشایخؑ، شیمی برآنؑ، بہ برآنؑ ایماندارؑ غیر یہودیؑ انطاکیہ، سوریہ و کیلیکیہ، سلام!
۲۴ بیشنوستیم کسانیؑ جہ آمی میان بدونؑ ان کی دستوری جہ آمان بدآرید، بموییدی خوشانؑ غلطؑ گبانؑ امرآؑ شمرؑ
دیل نیگرانؑ و پریشان خاطر بوکودیدی۔ ۲۵ ہنؑ وستی آمان یکدیلی امرآؑ یہودا و سیلاسؑ انتخاب بوکودیم و اوشانؑ آمی
عزیزانؑ، برنابا و پولسؑ امرآؑ شیمی ورجہ اوسہ کودیم، ۲۶ پولسؑ و برنابا کی خوداوند مسیحؑ نامؑ وستی، جہ خوشانؑ جانؑ
بوگوذشتیدی۔ ۲۷ پس یہودا و سیلاسؑ اوسہ کودیم کی شمرؑ خوشانؑ گبانؑ امرآؑ آگاہ بوکونید۔ ۲۸ روح القدسؑ کومکؑ
امرآؑ، آمانؑ اطو مصلحت بیدہیم کی شیمی دوشؑ سر، باری نیمہ جز چیزانی کی شومانؑ و دوری بوکونید: ۲۹ جہ
خوردنؑ قربانیؑ بت پرستانؑ و خون و گوشتؑ حیواناتی کی خفہ بوستیدی و بی عفتیؑ آدمانؑ۔ آگہ ا کارانؑ نوکونید،
کارؑ پسندیدہ بوکودیدی۔ خودا ہمہ تانؑ شمرؑ بدآرہ۔»

۳۰ پس اوشانؑ راہ دکفتیدی، بوشویدی بہ انطاکیہ۔ اویہ کلیسا اعضاؑ دورؑ ہم جمعؑ کودید و نامہؑ فدیدی اوشانؑ
دس۔ ۳۱ کلیسا اعضاؑ، نامہؑ دیلگرم کوندہؑ بخواندیدی و اشانؑ دیلانؑ شادؑ بوستہ۔ ۳۲ یہودا و سیلاسؑ کی جہ
روح القدسؑ عطایؑ نبوتؑ داشتیدی، گبانؑ زیادؑ امرآؑ، ایماندارانؑ تشویق و تقویت بوکودیدی۔ ۳۳ پس ایتا مدتؑ انطاکیہ
بیسہ ییدی و بعدؑ اونؑ ایماندارانؑ انطاکیہ، اوشانؑ بہ سلامتی اوسہ کودیدی کی واگردید بیشید اورشلیمؑ ایماندارانؑ

ورجہ، کسانى كى اوشان مأموریت فدہ بید۔ ۳۴ ولى پوئس و برنابا انطاكيہ میان بیسہ ییدی ۳۵ و انطاكيہ ایمانداران امرأ به تعلیم و بشارت خوداونڈ کلام مشغول بوستیدی۔

پوئس و برنابا میان اختلاف دکفته

۳۶ مدت زماتی كى انطاكيہ میان بیسہ ییدی پوئس، برناباى بوگفته: «واگردیم بیشیم به شهرانى كى اویہ خوداونڈ کلام موعظه بوکودیم، دیداری ایمانداران امرأ بدآریم و بیدینیم اوشان چى کودن دریدی.» ۳۷ برنابا خواستی یوحناى كى مرقس نام داشتى، خوشان امرأ ببره. ۳۸ ولى پوئس مخالفت بوکوده، بوگفته: «کسى كى پامفیلیہ میان امی امرأ همکاری نوکوده و امر تنها بنه، صلاح نی یه كى امی امرأ ببریم.» ۳۹ اختلاف سختی اوشان میان دکفته، كى جہ یکدیگر سیوا بو بوستیدی۔ برنابا، مرقس اوسده و جہ راي دریا بوشو قبرس؛ ۴۰ ولى پوئس، سیلاس انتخاب بوکوده و ایمانداران، اوشان ره دوعا بوکودیدی و به خوداونڈ فیض بیسپردیدی۔ او وخت راه دکفتید بوشوید سوریہ و کیلیکیہ، كى جز اوستانان روم بید۔ ۴۱ وختى كى جہ او اوستانان بوگوذشتیدی، کلیسا ایمانداران خوشان گبان امرأ قوت قلب فدیدی۔

تیموتائوس ملحق بوستن به پوئس و سیلاس

۱ پوئس به شهر دربه بمو۔ بزین بمو لستره۔ اویہ ایتا ایماندار تیموتائوس نام زندگی کودی كى اون مار ایتا بانوی یهودی ایماندار ولى اون پتر یونانی بو۔ ۲ ایمانداران شهر لستره و قونیہ جہ اون به خوبی و نیکی یاد کودیدی۔ ۳ پوئس خواستی اون خو امرأ سفر ببره۔ پس به احترام یهودیانی كى او منطقه میان زندگی کودیدی، اول تیموتائوس ختنه بوکوده، چون همه دانستیدی كى اون پتر یونانی یه۔ ۴ اوشان هطو كى جہ شهری به شهر دیگر شویدی، تصمیماتی كى رسولان مسیح و کلیسا مشایخ اورشلیم دورون بیگفته بید، مردومان ره اعلام کودیدی تا اطاعت بوکونید۔ ۵ پس کلیسایان اعضا، در ایمان مسیح رشد کودیدی و روز به روز ایماندارانی تازه به اوشان اضافه بوستی۔

پوئس رویا دربارہی مقدونی مردای

۶ پس پوئس و اون همراهان جہ منطقهی فریجیہ و غلاطیہ رد بوستیدی، چون روح القدس اوشان قدغن بوکوده بو كى آسیا میان خودا کلام موعظه نوکونید۔ ۷ پس به نزدیکی ایالت میسیہ فارسہ ییدی، تلاش بوکودیدی كى بیشید بیطینیہ ولى روح القدس اوشان اجازه فنده۔ ۸ هن وستى، میسیہ جا بوگوذشتیدی و بوشویدی شهر بندری ثرواس۔ ۹ شب، پوئس رویا میان ایتا مقدونی مرداک دینه كى به پا ایسه و اون التماس كونه: «بیأ مقدونیہ، امر کومک بوکون.»

لوقا کی ماجرائی نقل کودن دره، پولس و اون همراهان امرأ شه شهر فیلیپی مقدونیه

۱۰ وختی پولس آ رویای بیده، فوری آمان آماده بوستیم و راه دکفتیم بیشیم مقدونیه، چونکی بفهمستیم خودا آمر دوخوآده کی اوشان بشارت بدیم. ۱۱ بزین شهر بندری ثروآس جا، کشتی امرأ یکراست به جزیره ای ساموٹراکی بوشویم و فردای او روز به شهر بندری نیاپولیس فارسه ییم. ۱۲ جه اویه، راهی ای فیلیپی بو بوستیم کی مستعمره ای روم و ایتا جه شهران عمدہ ای بخش مقدونیه بو. چند روزی او شهر میان بیسه ییم.

۱۳ سبت روز ره، شهر جا بیرون بوشویم فارسه ییم هو روخان کناری کی فکر کودیمی یهودیان دوعا کودن وستی آمویدی. اویه بینشتیم و زناکائی ای کی اویه جمع بوسته بید جه خوداوند کلام اوشان ره گب بزه ییم. ۱۴ اوشان میان زنی خودا پرست ایسه بو، لیدیه نام، کی شهر تیاتیرا شین بو و پرچه یان ارغوان فروختی. اون آمی گبان گوش دبی و خوداوند اون قلب واز کوده تا پولس پیغام قوبیل بوکونه. ۱۵ وختی اون خو خانواده امرأ غسل تعمید بیگیفته، خواهش بوکوده، بوگفته: «اگه ایطمینان دآریدی کی من به خوداوند عیسی مسیح ایمان باوردم، پس بائید و می خانه میان بیسید.» سر آخر آمان اون خواسته ای قوبیل بوکودیم.

پولس و سیلاس زندان میان

۱۶ ایتا روز کی شوئون دبییم روخان کنار کی محل دوعا کودن بو، ایتا کنیز بیده ییم کی اسپر روح ناپاک بو و طالع بینی امرأ خو اربابان سوڈ فراوان فارسانه یی. ۱۷ اون، آمان و پولس دونبالسر راه دکفتی و فریاد زهی: «آ مرداگان خادمان خودای متعال ایسیدی و شمر، نجات رای موعظه کونیدی.» ۱۸ اون همه تا روز آ کار کودی. سر آخر پولس د صبر نوکوده، و اگر دسته بوگفته: «ای روح، به عیسی مسیح نام تر فرمان دهم کی جه اون بیرون بائی!» در جا روح اون جا خارج بوسته.

۱۹ او کنیز اربابان، چون بیده ییدی کی آ کار امرأ اوشان امید پول به دس آوردن باطل بوسته، پولس و سیلاس بیگیفیدی و فکش فکش امرأ بریدی میدان شهر و تحویل دادگاه بدیدی تا محاکمه بیید. ۲۰ بزین اوشان قاضیان ورجه باوردیدی و بوگفتید: «آ مرداگان یهودی ایسید و آمی شهر به آشوب فکشید. ۲۱ اوشان، رسم و روسومی ای تبلیغ کونیدی کی آمان، رومیان ره غیر قابل قوبوله.»

۲۲ مردوم، اوشان امرأ همدس بو بوستیدی. قاضیان فرمان بدیدی کی اوشان لیباسان بکنید و پولس و سیلاس چوب امرأ بزید. ۲۳ وختی پولس و سیلاس بزه ییدی، زندان میان تاوده ییدی و زندانان دستور بدیدی خب مراقب به. ۲۴ زندانانم چون اطو دستور بیگیفته، اوشان ایتا سلول میانی تاوده و اوشان پای ایتا پيله کونده سر دوسته کی نتانید فرار بوکونید.

۲۵ نزدیک نصف شب بو کی پوئس و سیلاس دوعا کونان و سرود خوانان خودای ستایش کودید و زندانیان دیگرم گوش دتن دیید، ۲۶ کی ایدفعی، ایتا پیلہ زمین لرزه بمو. توما م ساختمان زندان به لرزه دکفته و او لحظه زندان دران واز بوسته و زنجیرانم جه همه تان دس بیجیر بکفتیدی. ۲۷ رئیس زندان بیدار بوسته و بیده زندان دران بازه. شمشیر فکشه تا خوره بوکوشه، چون فکر کودی کی زندانیان فرار بوکودید. ۲۸ ولی پوئس فریاد بزه، بوگفته: «تر زخم و زیلی نوکون، امان همه تان آیه ایسه ییم!» ۲۹ رئیس زندان دستور بده مشعل بأورید و سراسیمه بوشو زندان دورون، ترسان و لرزان پوئس و سیلاس پا جیر بکفته. ۳۰ اوشان بأورده بیرون وورسه: «ای بزرگواران، چی و ا بوکونم کی نجات پیدا بوکونم؟»

۳۱ اوشان جواب بدیدی: «به خوداوند عیسای مسیح ایمان بأور کی تو و تی خانواده نجات پیدا کونیدی.» ۳۲ بزین خوداوند کلام اون ره و توما م اون اهل خانه ره موعظه بوکودیدی. ۳۳ رئیس زندان فوراً اوشان زخمان بوشو بوسته و خودش و توما م اون خانواده تعمیم بیگفتیدی. ۳۴ پوئس و سیلاس خو خانه میان برده و سفره تاوده؛ اون و توما م اون خانواده به خودا ایمان آوردن وستی خیلی خوشحال بید.

۳۵ وختی روز بو بوسته قاضیان، مأموران ای اوسه کودیدی زندانان ورجه و بوگفتیدی: «او مردا کان آزاد کون!» ۳۶ زندانان پوئس جه ا پیغام و اخبر کوده و بوگفته: «قاضیان دستور بدیدی کی شمر آزاد کونم. پس بائید بیرون و به سلامتی بیشید.» ۳۷ ولی پوئس و اگردسته اوشان بوگفته: «شومان، امر کی رومی ایسیم بی محاکمه همه کس ورجه شلاق بزهیدی و زندانی بوکودید. هسه امر مخفیانه آزاد کون دریدی؟ آ کار نوکونیمی! هسه خودشان بائید و امر جه آیه بیرون بأورید.»

۳۸ مأموران، قاضیان بوگفتید و اوشان چون بیشنوستیدی کی پوئس و سیلاس رومی ایسیدی، بترسه ییدی ۳۹ و بموییدی، اوشان جا عذرخواهی بوکودید و تا زندان بیرون بدرقه بوکودید و اوشان جا بخواستیدی کی شهر ترک کونید. ۴۰ پوئس و سیلاس، زندان ترک کودید و بوشوییدی لیدیه خانه و او یه ایمانداران دیلگرمی بدیدی، بزین جه او یه بوشویید.

آشوب، تسالونیکی میان

۱ پوئس و سیلاس، جه شهران آمفیپولیس و آپولونیا بوگودشتیدی و به تسالونیکی فارسه ییدی کی یهودیان او یه کنیسه داشتیدی. ۲ پوئس طبق خو عادت بوشو کنیسه دورون و سه تا سبت روز ره جه کتاب مقدس اوشان امرأ بحث بوکوده ۳ و توضیح بده و دلیل بأورده کی لازم بو امی گوناها ن کفاره وستی مسیح رنج بکشه و جه مُرده یان ویریزه. اون گفتی: «آ عیسای کی در مورد اون شمره گب زئن درم، هو مسیح ایسه.» ۴ بعضی

جہ اوشان و افرادِ زیادیم جہ یونانیانِ خوداپرست و زناگانِ سرشناس قوبیل بوکودیدی و پولس و سیلاسِ امراً ہمراہ بوبوستید۔

۵ ولی یهودیانِ حسودی بوکودیدی و چند نفرِ شریزِ مرداکانِ جہ بازارِ سر جمعِ کودیدی، ایتا گروہ چاکودیدی و شہرِ میانِ آشوب بہ پا بوکودید۔ اگروہ، پولس و سیلاسِ پیدا کونِ وستی بہ یاسونِ خانہ حملہ بوکودید تا اوشانِ جہ او خانہ دورونی بربید او جماعتِ ورجہ کی اوہ جمع بوبوستہ بید۔^۶ ولی وختی رسولانِ پیدا نوکودیدی، یاسون و چند نفر جہ ایماندارانِ دیگر فکش فکشِ امراً بربیدی مقاماتِ شہرِ ورجہ و فریاد بزه بیدی: «آ مرداکان، دونیای بہ آشوب فکشیدی۔ ہسہ بموییدی آیہ ہم ہو کار بوکونید^۷ و یاسونم اوشانِ بربدہ خو خانہ۔ اشانِ ہمہ تان جہ قیصرِ دستورانِ نافرمانی کونیدی، چونکی ادعا کونید اینفرِ دیگر ہم پادشاہ ایسہ کی عیسی نام دارہ۔»^۸ وختی مردوم و مقاماتِ شہرِ اگبانِ بیشنوستیدی، پریشان بوستید۔^۹ بزین یاسون و دیگرانِ جا ضمانت فیگفتیدی و اوشانِ آزاد کودید۔

پولس و سیلاس بیرہ شہرِ میان

۱۰ ایماندارانِ ہو شبِ میان، پولس و سیلاسِ اوسہ کودیدی کی بیشید بیرہ۔ اوشانِ وختی کی اوہ فارسہ بیدی، بہ کنیسہ یهودیانِ بوشوید۔^{۱۱} کسانِ کی بیرہ میانِ زندگی کودیدی جہ مردومانِ تسالونیکی روشن فکرتر بید، چون خوداوند عیسی کلام، اشتیاقِ امراً قوبیل بوکودیدی و ہر روز خودا کلامِ بررسی کودیدی تا بہ حقیقتِ پولسِ گبانِ پی بربید۔^{۱۲} اطوی خلی جہ یهودیانِ و زناگانِ و مرداکانِ سرشناسِ غیر یہودی ایمان باوردیدی۔

۱۳ ولی وختی یهودیانِ تسالونیکی بفہمستیدی کی پولس بیرہ شہرِ میانم خوداوند عیسی کلامِ موعظہ کونہ، اوہ بوشویدی و مردومِ تحریک و بر ضدِ اوشانِ بوشورانہ بیدی۔^{۱۴} ایماندارانِ ہو موقعِ پولسِ اوسہ کودیدی کی جہ دریا راہ بشہ، ولی سیلاس و تیموتائوس بیرہ شہرِ میانِ بیسہ بیدی۔^{۱۵} پولسِ ہمراہان، اون تا آتن ہمراہی بوکودید و اوہ جہ پولس دستور فیگفتیدی کی سیلاس و تیموتائوس وا ہرچی زودتر پولسِ ورجہ بیشید۔ بزین ہمراہانِ آتن ترک کودید۔

پولس آتنِ میان

۱۶ وختی پولس آتنِ میان سیلاس و تیموتائوسِ منتظر ایسہ ہو، مجسمہ ی بُتان کی شہرِ دورون بیدہ، پریشان بوستہ۔^{۱۷} ہن وستی کنیسہ میان، یهودیانِ و یونانیانِ خوداپرستِ امراً و ہطو ہر روز شہرِ میدانِ دورون رہگذرانِ امراً گب زہی۔^{۱۸} چند نفر جہ فیلسوفانِ اپیکوری و رواقی یم اونِ امراً شروع بہ بحث بوکودید۔ بعضی یان بوگفتیدی: «آ یاوہ گو چی خوابہ بگہ؟» چند نفرِ دیگرم بوگفتیدی: «شاید جہ خودایانِ غریبہ گب زن درہ»، چونکی پولس جہ عیسی و اونِ زندہ بوستن جہ دنیایِ مُردہ یان بشارتِ دکنِ دوبو۔^{۱۹} بزین اونِ اوسدیدی، بربیدی «آریوپاگوس» شورا و اوہ اون

بوگفتیدی: «تأنیم بدأنیم کی آ تعلیم جدید کی تو دیھی، چی ایسه؟ ۲۰ تی گبان آمی گوشأن ره غریبه یه. پس خواییم بدأنیم آ گبان چی معنی دهه.» ۲۱ تومام اوشانی کی آتن میان زندگی کودیدی و اوشانی کی آتن میان غریبه بید، هیچ کار دیگری ناشتیدی، مگر گفتن و ایشنوستن عقاید جدید امرأ خوشأن وخت بوگذرانید.

۲۲ پس پولس «آریوپاگوس» شورا میان ویریشته و بوگفته: «ای آتن مردأکان، من دانم کی شومان در مورد دین و مذهب خیلی دقیق ایسید، ۲۳ چونکی وختی شهر میان گردستن دوبوم و شیمی معبدأن دئن دوبوم، ایتا مذبح پیدا بوکودم کی اون رو بینویشته بو: (تقدیم به خودای ناشناخته). شومان نشناخته اون پرستش کونیدی. هسه من جه او خودا شمی ره گب زنم.

۲۴ «خودایی کی جهان و هر اونچی کی آن میان وجود دأره خلق بوکوده، مالک آسمان و زمین ایسه و معبدأن میانی، کی بشر دس امرأ چأکوده بو بوسته، ساکن نیبه ۲۵ و چیزی کی آدمأن خوشأن دس مره چأکونیدی نیازی نأره، چونکی خودا نفس زن و حیات و همه چی چیزان خودش آدمأن فده. ۲۶ اون جه ایتا انسان، تومام بشر و قومأن به وجود بأورده تا کی سرتاسر زمین سر ساکن بیید. اوشأن ره زمان و محل سکونت محدودی برقرار بوکوده، ۲۷ کی اوشأن، خودا دونبال بگردید، اون پیدا بوکونید و شاید اون لمس بوکونید، هرچند کی خودا جه هیچکدام امان دور نی یه. ۲۸ چونکی اون جا زندگی و حرکت و هستی دأریمی، هطو کی بعضی جه شیمی شاعرأن بوگفتیدی: (امان اون زاکان ایسیمی.)

۲۹ «چونکی جه نسل خوداییم، شایسته نی یه کی فکر بوکونیم خودا ذات الهی، مجسمه ای طلا، نقره یا سنگی امرأ برابر ایسه کی به دس هنرمند و سازنده ای ایتا انسان اختراع یا چأکوده بو بوسته. ۳۰ خودا پیشترأن کارانی کی آدمأن جه روی نادانی انجام دیدی تحمل کودی ولی هسه همه جا، تومام مردومأن حکم کونه کی و ا توبه بوکونید. ۳۱ چونکی خودا روزی بر قرار بوکوده کی جهان جه جانب ایتا مرد کی اون انتخاب بوکوده، عدالت امرأ داوری کونه. خودا اون دونیای مُرده یان جا ویریزانه تا آ کار امرأ، آ حقیقت ثابت بوکونه.»

۳۲ وختی کی موضوع کی کسانی کی میریدی و دوواره زنده بیدی بیشنوستیدی، بعضی یان مسخره بوکودیدی ولی چند نفر بوگفتیدی: «امان خواییم ایتا فرصت دیگر جه اونچی کی بوگفتی بیشنویم.» ۳۳ اطوی پولس او جمع ترک کوده. ۳۴ ولی چند نفر اون امرأ همراه بو بوستید و ایمان بأوردیدی: دیونیسوس، عضو آریوپاگوس شورا، ایتا زناکی کی داماریس نام داشتی و چند نفر دیگر کی اون امرأ بید.

پولس، قُرُنُس میان

۱ بزین پولس آتن ترک کوده و بوشو قُرُنُس. ۲ او یه ایتا یهودی مردأک امرأ کی اون نام آکیلا بو و استان پونتوس میان به دونیا بمو بو، آشنا بو بوسته. آکیلا، خو زناک امرأ کی پُریسکیلا نام داشتی، تازه جه

ایتالیا بمو بید، چونکی کلودیوس قیصر فرمان بدہ بو کی تو مام یهودیان و آجہ روم بیشید بیرون. پولس اوشان ورجہ بوشو ۳ و چون اونم اوشان مانستن خیمہ دوز بو، اوشان ورجہ بیسہ و مشغول بہ کار بوبوستہ. ۴ اون ہر سبت، کنیسہ دورون یهودیان و غیر یهودیان امرأ کلہ گب زہی و تو مام خو سعی کودی کی اوشان قانع بوکونہ.

۵ وختی سیلاس و تیموتائوس جہ مقدونیہ بمویدی، پولس تو مام خو وجود وقف موعظہ کلام بوکودہ و کنیسہ میان یهودیان شہادت دی کی عیسی ہو مسیحہ. ۶ ولی چون اون امرأ مخالفت بوکودیدی و اون ناسزا بوگفتیدی، اعتراض کونان خو لیاس خاک بتکانہ و اوشان بوگفتہ: «شیمی خون شیمی گردن دکفہ! من اون جا مبرایم. بزین غیر یهودیان ورجہ شم تا اوشان رہ گب بزیم.»

۷ پولس کنیسہ ترک کودہ، بوشو ایتا غیر یهودی ورجہ کی اون نام تیتوس یوستوس بو. اون مردی خوداپرست بو و کنیسہ ورجہ ہم خانہ داشتی. ۸ گریسپوس، کنیسہ رئیس و تو مام اون خانہ آدمان بہ عیسای خوداوند ایمان باوردیدی و خیلی جہ قرنتس مردوم کی کلام بیشنوستہ بید، ایمان باوردیدی و غسل تعمید بیگفتیدی.

۹ ولی ایتا شب عیسای خوداوند، رویا میان پولس آشکار بوستہ و بوگفتہ: «نوا ترسن، تی گب بزین و ساکت نوا ایسن! ۱۰ من تی امرایم و ہیکس نتانہ تر اذیت و آزار بوکونہ، چونکی ا شہر میان خیلی کسان بہ من تعلق داریدی.» ۱۱ پس پولس یک سال و نیم اوہ بیسہ و خودا کلام اوشان تعلیم بدہ.

۱۲ وختی کی «گالیو» والی استان آخائیہ بو، یهودیان ہمدیگر امرأ ہمدس بوبوستیدی، فووستیدی پولس سر و اون ببردیدی دادگاہ، ۱۳ بوگفتیدی: «أ مرد، مردوم وادار کونہ خودای بر خلاف شریعت عبادت بوکونید.»

۱۴ ولی وختی پولس بمو گب بزینہ، گالیو یهودیان بوگفتہ: «ای یهودیان، اگہ جرم و جنایتی در کار بو، شیمی شکایت ایشنوستیم. ۱۵ ولی چون شیمی دعوا مرافہ، شیمی دین و شریعت وستی ایسہ، شیمی مشکلات خودتان ورجہ حل بوکونید. من نخوایم دخالت بوکونم.» ۱۶ تو مامی اوشان جہ تخت داوری اوسہ کودہ بیرون. ۱۷ ہمہ اوشان، کنیسہ رئیس کی اون نام سوستنس بو، حملہ بوکودیدی و اون والی چوم جلو بزہیدی. ولی گالیو اوشان ہیچی نوگفتہ.

پولس و اگرده بہ انطاکیہ

۱۸ پولس ایتا مدت قرنتس میان بیسہ. بزین ایمانداران امرأ خودا حافظی بوکودہ و پریسکیلا و آکیلا امرأ جہ دریا راہ بوشو سوریه. اون کنخریہ میان فارسہ، چونکی خو امرأ عہد دوستہ بو بہ خودا نزدیکتر بہ، خو سر موی تراشتہ.

۱۹ وختی پولس خو ہمسفران، پریسکیلا و آکیلا امرأ بہ افسس فارسہ ییدی، اوشان ترک کودہ، خودش بوشو کنیسہ میان کی یهودیان امرأ گب بزینہ. ۲۰ یهودیان اون جا خواہش بوکودیدی ایتا پیچہ ویشتر اوشان ورجہ بیسہ ولی پولس قوبیل نوکودہ. ۲۱ اوشان امرأ خودا حافظی بوکودہ، بوگفتہ: «اگہ خودا ارادہ بہ، و اگر دم ایم شیمی ورجہ.» بزین کشتی سوار بوستہ و افسس ترک کودہ. ۲۲ قیصریہ کی فارسہ، جہ کشتی بیجیر بمو، بوشو اورشلیم کلیسا ایمانداران بیدینہ

و جہ اویہ بوشو بہ انطاکیہ. ۲۳ چند روزی اویہ بیسہ و دووارہ راہ دکفتہ و سرتاسر غلاطیہ و ہمہئ مناطق فریجیہئ دوارستی و توماّم ایماندارانّ او منطقہئ تقویت روحانی کودی.

۲۴ او روزان، ایتا یہودی مردای کی اسکندریہ شین بو و آپولس نام داشتی بمو بہ افسس. اون ایتا ماہر سخنور بو و جہ خودا کلام خیلی دانستی. ۲۵ آپولس راہ و روشی کی ایتا مسیحی و ابدانستہبی، تعلیم بیدہبو و روح القدسّ ہدایتّ امرآ گب زہیی. دقتّ امرآ در مورڈ عیسایّ خوداوند تعلیم دئی، ہر چند کی فقط جہ یحیی تعمید آگاہی داشتی. ۲۶ اون شجاعتّ امرآ کنیسہ میان مردومانّ رہ بشارت دئی، ولی وختی پریسکیلا و اکیلا اونّ گبانّ بیشنوستید، اونّ خوشانّ خانہ بررید تا خودا کلام بہتر اونّ یاد بدید.

۲۷ چون آپولس تصمیم بیگفتہ کی بہ آخائیہ سفر بوکونہ، ایماندارانّ افسس، اونّ تشویق بوکودیدی و اوشانّ ایماندارانّ او منطقہ رہ نامہ بینویشتیدی کی اونّ جا بہ گرمی پذیرایی بوکونید. وختی آپولس اویہ فارسہ، اوشانیّ کی بہ واسطہئ خودا فیض ایمان باورده بید خیلی کومک بوکودہ، ۲۸ چونکی ہمہ تانّ ورجہ، یہودیانّ امرآ گفتگو کودی، اوشانّ عقاید، دلائل قوی امرآ ردّ کودی و کتاب مقدسّ امرآ ثابت کودی کی عیسی، ہو مسیح ایسہ.

پولس افسس شہر میان

۱ وختی کی آپولس قرنتس میان ایسہبو، پولس بعد آنکی جہ او منطقہ کویانّ جور دوارستی، فارسہ افسس. اویہ تازہ ایماندارانی پیدا کودہ ۲ و اوشانّ جا وورسہ: «وختی کی ایمان باوردید، روح القدسّ دریافت بوکودید؟»

اوشانّ بوگفتیدی: «آمان حتی نیشنوستیم کی روح القدسّ یم وجود دارہ.»

۳ اوشانّ بوگفتہ: «پس تعمید چی بیگفتیدی؟» بوگفتیدی: «یحیی تعمید.»

۴ پولس بوگفتہ: «یحیی تعمید، نشانہئ توبہ بو، کی قوم گفٹی: (وآ بہ اونی کی بعد من آیہ ایمان باورید) یعنی بہ عیسی.» ۵ چون انّ بیشنوستیدی، بہ خوداوند عیسی نام تعمید بیگفتید ۶ و وختی کی پولس بر اوشان، دس بنہ، روح القدس بر اوشان نازل بو بوستہ و بہ زبانانّ روح القدس گب بزہیدی و خودا پیغام بوگفتیدی. ۷ او مرداکان، در حدود دوازده نفر بید.

۸ بزین پولس اویہ سہ ماہ سبتّ روزان کنیسہ میان شویی، شجاعتّ امرآ جہ خودا پادشاہی گب زہیی و ہمہ تانّ رہ دلیلّ محکم آوردی. ۹ ولی بعضیان سرسختی کودیدی، ایمان ناوردیدی و ہمہ کسّ ورجہ، جہ «مسیح راہ و روش» بد گفتیدی. پس پولس خو یارانّ اوسدہ و جہ اوشانّ ورجہ سیوا بوکودہ. ہمہ تا روز تالار سخنرانیّ تیرانوسّ دورون مردومّ رہ گب زہیی. ۱۰ دو سالّ توماّم بوگودشتہ و توماّم یہودیان و غیر یہودیانی کی آسیا منطقہ میان زندگی کودیدی، خوداوند کلام بیشنوستیدی.

۱۱ خودا پوئس قدرت فدہ کی پیلہ دانہ معجزہ یان انجام بدہ. ۱۲ مردوم دستمالان و پیشبندانی اوئ بدن واسه ییدی و بردیدی مریضان سر نہیدی و اوشان مریضی حُب بوستی و ارواخ پلید اوشان جا بیرون شویدی.

۱۳ پس چند نفر جہ جادوگران دورہ گرد یهودی یم ہہ کار بوکودیدی، بوشویدی کسانئ ورجہ کی ارواخ پلید داشتیدی، خوداوند عیسی نام دوخوآدیدی و گفتیدی: «به نام عیسی کی پوئس به اون موعظہ کونہ، شمر بیرون کونیمی!» ۱۴ اوشانی کی اٹو کودیدی، اسکیوا ہفتا پسران بید. اسکیوا ایتا جہ پیلہ کاهنان یهود بو. ۱۵ ولی روخ پلید، اوشان بوگفتہ: «عیسای شناسم، پوئسم شناسم، ولی شومان کیسیدی؟» ۱۶ بزین او مردای کی روخ پلید داشتی اوشان جان دکفتہ، طوری اوشان بزه کی لخت و زخمی، او خانہ جا فرار بوکودید.

۱۷ چون توما ساکنانی کی افسس میان زندگی کودیدی، چی یهودی و چی غیر یهودی، بفہمستیدی، بترسہ ییدی اٹویی کی بعد اون عیسای خوداوند نام احترام نہیدی. ۱۸ خیلی جہ اوشانی کی ایمان باورده بید، بموییدی جُلو، آشکارا به خوشان کاران اقرار بوکودیدی ۱۹ و خیلی جہ اوشانی کی بیشتر جادوگری کودیدی، خوشان کیتابان باوردیدی و ہمہ تان جُلو بسوجانہ ییدی. وختی حساب بوکودیدی کیتابان قیمت، پنجاہ ہزار سکہ ئ نقرہ بوستی. ۲۰ اٹویی، خوداوند کلام ہمہ جا پخش بوستی و قوت گیتی.

۲۱ وختی ہرچی کی پیش بمو بو به آخر برسہ، پوئس جہ روح القدس ہدایت بو بوستہ کی جہ رای مقدونیہ و آخائہ، به اورشلیم واگرده و بوگفتہ: «وختی اویہ فارسم، و اوم جا دیداری بوکونم.» ۲۲ پس دو نفر جہ خودش ہمکاران، تیموتائوس و اراستوس اوسہ کودہ کی بیشید مقدونیہ و خودش وخت ویشتری آسیا میان بیسہ.

بلوا افسس میان

۲۳ ہو وخت «مسیح راہ و روش» وستی، پیلہ بلوایی بپا بو بوستہ. ۲۴ شورشی کی بپا بو بوستہ بو، باعث و بانیش اینفر بو کی دیمتریوس نام داشتی، کی اوئ شغل نقرہ کار بو و مجسمہ یان مختلفی جہ الہ «آرتیمیس» چاکودی و صنعتگران دیگر امرأ درآمد فراوانی به دس آوردیدی. ۲۵ دیمتریوس، اشان و صاحبان آجور حرفہ یان جمع کودہ و اوشان بوگفتہ: «ای عزیزان، شومان دانیدی کی تومامی ئ امی سرمایہ ہہ صنعتی ایسہ کی داریم. ۲۶ ولی هوٹو کی دینیدی و ایشویدی، پوئس نہ فقط افسس میان، بلکی سرتاسر آسیا میان، خیلی یان واگردانہ و گمراہ بوکودہ. اون گہ خودایانی کی بشر دس جا چاکودہ بو بوستہ، اون د خودا نشہ گفتن. ۲۷ پس نہ فقط آخطر وجود دارہ کی امی کاسبی جہ رونق دکفتہ، بلکی امی پیلہ الہ آرتیمیس معبدم کوچیک بہ و خو جلال جہ دس دہہ، اون کی آسیا و سرتاسر دونیا میان پرستش بہ.»

۲۸ اوشان وختی دیمتریوس گبان در مورد پوئس بیشوستیدی، اوشان غیظ گیتہ و ایجگرہ زنان بوگفتیدی: «آرتیمیس افسسیان پیلہ دانہ ایسہ!» ۲۹ توما شہر میان آشوبی بپا بو بوستہ! مردوم ہمدیگر امرأ میدان مسابقہ طرف، هجوم بردیدی

و گایوس و آریستارخوس جہ اہالی مقدونیه کی ہمراہان پوٹس بید، فکش فکش خوشان امرأ به تماشاخانہی شہر ببردیدی. ۳۰ پوٹس خواستی کی جمعیت جلو ظاہر بہ، ولی ایمانداران اون و ناشتیدی ۳۱ و چند نفر جہ مقامات ایالت آسیا کی پوٹس دوستان بید، اون رہ پیغام اوسہ کودیدی، خواہش بوکودید کی بہ میدان مسابقہ نشہ.

۳۲ جمعیت آشفته بو. ہمہ داد و فریاد زہییدی و ہر کس خورہ ایچی گفتی. ویشتر مردوم نانتیدی چرہ دور ہم جمع بوستیدی. ۳۳ یہودیان، اسکندر پیش تاودہییدی و بعضیان جہ جمعیت میان اون دستورانی دیدی. اون خو دس تکان بدہ کی مردوم ساکت بید تا اوشان رہ جوابگو بہ. ۳۴ ولی وختی مردوم بفہمستیدی اسکندر ہم یہودی ایسہ، ہمہ ایتا صدا امرأ، نزدیک بہ دو ساعت فریاد زہییدی: «پیلہ دانہ ایسہ، افسسیان آرتمیس!»

۳۵ آخر سر، وختی شہر داروغہ، مردوم ساکت کودہ، بوگفتہ: «ای افسس مرداکان، کیسہ کی ندانہ امی شہر، نگہبان معبد پیلہ دانہ آرتمیسہ و اون تمثال کی جہ آسمان بیجیر بمو، محافظت کونہ؟ ۳۶ پس وختی کی امی الہہ آرتمیس، ہمہ کسان رہ قابل قبیل ایسہ، و آرام ببید و عجلہ امرأ کاری نوکونید. ۳۷ مرداکان کی آیہ باوردیدی، نہ جہ امی معبد دوزدی بوکودیدی و نہ بہ امی الہہ کفر بوگفتیدی. ۳۸ پس اگہ دیمتریوس و اون ہمکاران صنعتگر جہ کسی شکایتی داریدی، دادگاہ در بازہ و قاضیانم حاضریدی. تانیدی خوشان شکایت اوہہ ببرد. ۳۹ ولی اگہ چیز دیگر دونبال گردستن دریدی، اون وا جلسہیان رسمی انجمن شہر میان حل و فصل بوکونید، ۴۰ چونکی ترسم ایروز، آ ناآرامی وستی بہ شورشگری متہم ببیم. اگہ ہطوی پیش بشہ، ہیچ دلیلی نتانیم باوریم بہ خاطر ایتفاق.» ۴۱ آ گبان بوگفتہ و مردوم مرخص کودہ کی بیشید.

پوٹس سفر بہ مقدونیه و یونان و ہمراہ بوستن لوقای پزشک اون امرأ

۱ چونکی جینجال بہ آخر فارسہ، پوٹس ایمانداران دوخوآدہ و بعد تشویق، خوداحافظی بوکودہ بوشو منطقہی مقدونیه. ۲ اون خورہ میان بہ ہر دیاری کی شوی، ایمانداران خو گبان امرأ دیلگرمی زیادی دبی تا یونان میان فارسہ ۳ و سہ ماہ اوہہ بیسہ. وختی کی خواستی کشتی امرأ بشہ سورہ، یہودیان بر ضد اون نقشہ بکشہییدی. ہن وستی تصمیم بیگفتہ کی جہ رائی مقدونیه واگردہ. ۴ اوشانی کی پوٹس امرأ ہمراہ بید: سوپاتروس پیروس زای کی جہ مردومان بیرہ بو، آریستارخوس و سکوندوس کی جہ مردومان تسالونیکی بید، گایوس درہہ سین، تیخیکوس و ثروفیموس آسیا سین، و تیموتائوس. ۵ اوشان پیشتر بوشوییدی و ثرواس میان امی منتظر ایسہ بید. ۶ ولی امانم پوٹس امرأ بعد ایام عید فطیر، جہ شہر فیلیپی کشتی سوار بوستیم و بعد پنج روز، بندر ثرواس میان بوشویم و اوشان ورجہ ہفت روز بیسہ بیم.

زندہ بوستنِ مردِ جوانِ عشائِ ربانی دورون

۷ اولین روزِ ہفتہ کی دوڑ ہم جمعِ بوستیم، مراسمِ عشائِ ربانی داشتیمی۔ پولس، چون تصمیم داشتی فردا ترواس ترک کونہ، اون موعظہ تا نصف شب طول بکشہ۔ ۸ خانہ بوجور کی جمع بوستہ بیم، چراغ زیاد نہہ بو۔ ۹ جوانی کی ایتیحوس نام داشتی پنجرہ کنار نیشتہ بو۔ هوطو کی پولس گب زئن طولانی بو بوستہ، اون چورت گیتہ و بوخوفتہ۔ اون خواب سنگین بوستہ و ایوارکی طبقہی سوّم جا بکفتہ بیجیر و بمرده۔ ۱۰ پولس بوشو بیجیر، او جوان مرداک بغل کودہ و خو بدن بچسبانہ بہ اون بدن و اون رہ دوعا بوکودہ، بوگفتہ: «نترسید، اون زندہیہ!» ۱۱ وختی پولس بوشو بوجور، ادامہی مراسمِ عشائِ ربانی وستی نان تیکہ تیکہ بوکودہ و بوخوردیم۔ اون تا سحر اوشان امرأ گب بزہ و جہ اویہ راہ دکفتہ، بوشو۔ ۱۲ مردوم او جوان زندہی بہ خانہ بریدیدی و اشان خیال راحت بوستہ۔

پولس افسس کلیسا مشایخ امرأ خودا حافظی کونہ

۱۳ امانم کشتی سوار بوستیم تا بیشیم آسوس شہر طرف۔ هوطو کی پولس امرأ قرار بنہ بیم، اویہ اون باوریم کشتی میان، چونکی خواستی جہ رائ خشکی بشہ تا شہر آسوس فارسہ۔ ۱۴ پس وختی پولس آسوس میان بیدہ بیم، اون باوردیم کشتی میان و بوشویم بندر میتلینی۔ ۱۵ فردای او روز جہ اویہ کشتی امرأ بوشویم و جزیرہی خوس ورجہ فارسہ بیم۔ دوّمی روز جزیرہی ساموس بوشویم و سومی روز فارسہ بیم بندر میلیتوس۔ ۱۶ پولس تصمیم داشتی کی جہ رائ دریا جہ کنارہی افسس دووارہ کی آسیا میان وخت کوشی نوکونہ، چونکی عجلہ داشتی کی اگہ بتانہ، روز پنتیکاست بہ اورشلیم فارسہ۔

۱۷ اون جہ شہر میلیتوس، پیغامی مشایخ کلیسای افسس رہ اوسہ کودہ کی اوشان باورہ خو ورجہ۔ ۱۸ وختی بمویدی، اوشان بوگفتہ: «شومان دانیدی جہ هو روز اول کی بموم آسیا، چوطو شیمی امرأ رفتار بوکودم، ۱۹ چوطو فروتنی و چومان گریہ مرہ خوداوند خدمت بوکودم و توما سختی یان و دسیسہ یان و بدرفتاری کی یہودیان می سر باوردیدی، تحمل بوکودم ۲۰ و دانیدی کی جہ هر اونچی کی شمرہ سودمند بو، چیزیی دریغ نوکودم، بلکی پیام شمرہ موعظہ بوکودم، چی مردوم ورجہ و چی خانہ میان شمرہ تعلیم بدم۔ ۲۱ یہودیان و غیر یہودیان اعلام بوکودم کی وا توبہ کودن امرأ بہ سمت خودا واگردید و بہ امی خوداوند عیسای مسیح ایمان باورید۔

۲۲ «بہ الهام روح القدس شوئون درم اورشلیم و نانم اویہ مرہ چی پیش آیہ۔ ۲۳ فقط ان دانم کی روح القدس هر شہر دورون کی شمرہ، مر ہشدار دہہ کی زندان و سختی می منتظرہ۔ ۲۴ ولی می جان، مرہ ارزشی نارہ، مگر بتانم می

مسابقہ یٰ بہ آخر برسائِم و خدمتیٰ کی خوداوند عیسیٰ مرّ بیخشہ، بہ کمال فآرسائِم، خدمتیٰ کی هو اعلام بشارت فیضِ خودایہ.

۲۵ «ہسہ دائِم هوطو کی من ایتا مدتی شیمی میان ایسہ بوم و خودا پادشاهیٰ موعظہ بوکودم، ہیچ کلام د مرّ نیدینیدی. ۲۶ پس ایمروز شیمی امرأ ایتما حجت کونم کی کسی جہ شیمی میان ہلاک بہہ می تقصیر نی، یہ، ۲۷ چون خودا مقصد و اون ارادہیٰ اعلام کودن وستی شمرہ کوتاہی نوکودم. ۲۸ مواظب خودتآن و توما گله یی کی روح القدس شمر ناظر اوشآن قرار بدہ بیید، چونکی خودا او جمع ایماندارآن بہ قیمت خو خون بیہہ. بزین شومان وستی اوشآن حُب چوپانی بوکونید. ۲۹ من دائِم بعد می شوئون، گرگان درندہ شیمی میان آیدی کی بہ گلہ رحم نوکونیدی. ۳۰ جہ شیمی میان کسان آیدی و حقیقت کلام خودای ایجوز دیگر گیدی تا ایماندارآن خوشآن دونبال بیرید و اوشآن جہ راہ بہ در کونید. ۳۱ شیمی حواس جمع بہہ، بہ یاد بأورید کی من سہ سال تومام، شب و روز، تک تک شمر می اشک چومان مرہ تعلیم و ہوشیاری بدم.

۳۲ «ہسہ شمر بہ خودا و اون کلام فیض ایسپریم کی اون تانہ شیمی ایمان قوت فدہ و ہم شمر ایماندارانی امرأ کی تقدیس بوہوستیدی بہ نام خوداوند عیسیٰ مسیح، ہم ارث بوکونہ. ۳۳ ہیچ چشمداشتی بہ طلا و نقرہ و لیاس کسی نآرم. ۳۴ شومان خودتآن دانیدی کی خودم دس و کار کودن امرأ، می احتیاجات و می ہمراہان احتیاجات فراہم بوکودم. ۳۵ جہ ہہ لحاظ من شمر نیشان بدہ بوم کی و سخت کار بوکونیم تا بتانیم ضعیفان کومک بوکونیم و خودمان خوداوند عیسیٰ گبان بہ یاد بدآریم کی بفرماستہ: (فدن جہ فیگفتن بہترہ.)»

۳۶ وختی خو گبان تومام کودہ، اوشآن ہمہ تآن امرأ زانو بزہ و دوعا بوکودہ. ۳۷ ہمہ صدای بلند امرأ گریہ بوکودیدی و اون بغل کودیدی و ماچی بدیدی. ۳۸ اونچی کی جہ ہمہ چی ویشتر اوشآن ناراحت کودہ، گبی بو کی بوگفتہ: «د می روی نیدینیدی.» پس اون تا کشتی بدرقہ بوکودید.

پولس رسول و لوقا و اوشآن ہمراہان شیدی اورشلیم

۱ وختی اوشآن جا سیوا بوہوستیم، جہ رای دریا سفر بوکودیم، بہ جزیرہی «کاس» فآرسہ ییم. فردای او روز، بہ جزیرہی «رودس» و جہ او یہ بہ «پاتارا» فآرسہ ییم. ۲ او یہ ایتا کشتی پیدا بوکودیم کی شوئون دوبو فینیقیہ. پس سوار بوہوستیم و راہ دکفتیم. ۳ قبرس امی چپ دس بیدہ ییم و جہ او یہ دوارستیم، سور یہ سمت پیش بوہوستیم و کشتی باز خالی کودن وستی، صور میان پیادہ بوہوستیم. ۴ بزین او یہ ایماندارانی پیدا بوکودیم و ہفت روز اوشآن ورجہ بیسہ ییم. روح القدس اوشآن آشکار کودہ بو کی پولس کی شہ اورشلیم میانی چی بلایی اون سر آہ. ۵ ہن وستی جہ پولس بخواستیدی و بوگفتیدی کی نوا شوئون اورشلیم. وختی ہفت روز بہ آخر فآرسہ، راہ دکفتیم

بيشيم. ايمانداران همه تان خوشان زن و زاکان امرأ تا بيرون شهر، امر بدرقه بوکودیدی و امان دریا کنار زانو بزهيم و دوعا بوکوديم. ۶ بعد خود احافظی، کشتی سوار بوسيم و اوشانم و اگر دستیدی، بوشويیدی به خانه.

۷ امی سفر دریایی جه بندر صور، پتولامائیس میان به آخر فارسه. اویه ايماندارانی بیدهيم و اوشان جا احوالپرسی بوکوديم و ايروز اوشان ورجه بيسهيم. ۸ فردای او روز، راه دکفتيم، فارسهيم قيصريه بوشوييم فيلیس خانه و اویه بيسهيم. فيلیس خدمت فارسانن خبر خوش انجیل به مردوم بو و ایتا جه او هفت نفر بو کی رسولان کومک کودی. ۹ اون چهارتا دوختر عذب داشتی، کی خودا اون دوختران عطایای نبوت و پیشگویی فده بو.

۱۰ چند روزی کی اویه ايسه بيم، ایتا نبی کی آگابوس نام داشتی جه منطقه ي يهوديه بمو اویه. ۱۱ اون بمو امی ورجه و پولس کمر بند اوسده، خو دس و پای اون امرأ دوسته و بوگفته: «روح القدس گه: (مردی کی ا کمر بند اون شينه، يهوديان اون اورشليم میان هطویي دودیدی و به دس غير يهوديان ايسپریدی.»)

۱۲ وختی ان بيشنوستيم، امان و مردومان اویه پولس جا التماس بوکوديم کی به اورشليم نشه. ۱۳ ولی پولس و اگر دسته بوگفته: «ان چی کاری ايسه کی کونیدی؟ چره شیمی گريه امرأ می ديل اشکنیدی؟ من آمادهيم، نه فقط زندان بشم بلکی اورشليم میان، خوداوند عیسی نام وستی بيميرم.» ۱۴ وختی بیدهيم کی قوبیل نوکونه، د اون جا اصرار نوکوديم، بوگفتيم: «هرچی کی اراده ي خوداوند ايسه، انجام بيه.»

۱۵ چند روز دیگر، آماده ي سفر بو بوسيم، راه دکفتيم بوشوييم اورشليم. ۱۶ چند نفر جه ايمانداران قيصريه امی امرأ بمويیدی و امر بریدی ایتا جه قبرس قدیم ايمانداران خانه کی مناسون نام داشتی، تا اویه مهمان بيميم.

پولس امون به اورشليم

۱۷ وختی به اورشليم فارسهيم، اویه ايمانداران خوشحالی امرأ، امر قوبیل بوکودیدی. ۱۸ فردای او روز، پولس امرأ بوشوييم يعقوب ورجه کی رهبر کلیسای اورشليم بو. مشايخم همه تان بمويیدی اویه. ۱۹ پولس اوشان سلام بوگفته و اوشان ره تعريف بوکوده کی خودا کومک امرأ غير يهوديان ره چی کارانی انجام بده.

۲۰ وختی اوشان بيشنوستیدی، خودای شکر بوکودیدی و پولس بوگفتیدی: «برار جان، هوطو کی دانی هزاران يهودی ايمان باوردیدی و همه تان غيرت امرأ موسی شريعت قوبیل داریدی. ۲۱ تی پشت سر گیدی، توما ي يهوديانی کی غير يهوديان میان زندگی کونیدی، تعليم دیهی کی جه موسی شريعت رو و اگر دانید و اوشان گی کی خوشان زاکان ختنه نوکونید و يهود قوم رسم بجا ناورید. ۲۲ هسه چی وا بوکونيم؟ شک ناريم کی اوشان فهمیدی کی تو بمویی.

۲۳ پس هرچی کی تر گيم، و انجام بدی. آيه امی ورجه چهارتا مردای ايسه يیدی کی نذر بوکودیدی. ۲۴ اوشان تی امرأ بير و اوشان امرأ رسم تطهير بجا باور و اوشان خرج فدن تا بتانید خوشان سران بتراشید. اطویی همه فهمیدی کی او چیزانی کی تی پشت سر بيشنوستیدی حقيقت ناره، بلکی تونم شريعت قوبیل داری و اون اطاعت کونی. ۲۵ ولی

امان ایمانداران غیر یہودی رہ ایتا نامہ میان حکم بوکودیم و بوگفتیم کی نحوایہ شومان پاییند آداب و رسوم قوم یہود ببید۔ فقط جہ اوشان بخوآستیم کی گوشت حیواناتی کی قربانی ئ بُتان بیدی و مورده خون و گوشت حیواناتی کی خفہ بوستیدی نوخوری و جہ زنا کون ہم دوری بوکونید۔»

۲۶ پس فردای او روز، پولس او مرداگان خو امرأ برده و اوشان امرأ آداب و رسوم تطہیر بجا باورده۔ بزین بوشو معبد میان تا تاریخ آخرین روز تطہیر، کی ہر کدام جہ اوشان رہ قربانی تقدیم بہ، اعلام بوکونہ۔

پولس گرفتار بہ

۲۷ چیزی بہ آخر ہفت روز تطہیر نمآستہ بو کی چند نفر یہودی جہ منطقہ ئ آسیا، پولس معبد میان بیدہ ببیدی۔ اوشان مردوم میان شورش بر پا بوکودیدی و اون بیگفتیدی، ۲۸ فریاد زہ ببیدی: «ای اسرائیلیان، کومک بوکونید؛ آن، ہونہ کی ہمہ کس، ہمہ جا بر ضد امی قوم و امی شریعت و بر ضد امکان تعلیم دہہ، ہطویم غیر یہودیآن آورہ معبد دورون و امکان مقدس نجست کونہ۔» ۲۹ اوشان پیشتر، ثروفیموسن افسسی کی یہودی نوبو شہر میانی پولس امرأ بیدہ ببید و فکر کودیدی پولس اون خو امرأ برده معبد دورون۔

۳۰ شہر میان آشوب بر پا بوہوستہ! مردوم جہ ہر طرف ہجوم باوردیدی و پولس بیگفتیدی، فکشہ ببیدی جہ معبد ببردیدی بیرون و فوری معبد درآن اون پوشت سر دوستیدی تا پولس نتانہ واگرده معبد دورون۔ ۳۱ اوشان سعی داشتیدی اون ببید بوکوشید۔ بہ روم سپاہیان فرماندہی خبر فارسہ کی تومام اورشلیم میان آشوب بر پا بوہوستہ۔ ۳۲ اون فوری خو سربازان و افسران امرأ بوشو مردوم میان۔ وختی مردوم، فرماندہی کی خو سربازان امرأ بو، بیدہ ببیدی جہ پولس زتن دس بکشہ ببیدی۔

۳۳ فرماندہ نزدیک بوستہ و پولس دسگیر بوکودہ و خو سربازان دستور بدہ کی اون دوتا زنجیر امرأ دودید و بزین وورسہ کی اون کیسہ و چی بوکودہ؟ ۳۴ چند نفر فریاد زہ ببیدی ایچی گفتیدی، چند نفر فریاد زہ ببیدی ایچی دیگر گفتیدی۔ فرماندہ کی داد و فریاد فراوان میان نتانستی حقیقت بفہمہ، فرمان بدہ پولس ببید قلعہ دورون۔ ۳۵ وختی پولس فارسہ قلعہ راہرو پلہ ورجہ، مردوم ہجوم باوردیدی کی اون بوکوشید۔ سربازان مجبور بوہوستیدی کی اون خوشان سر دس جور، ببید۔ ۳۶ مردومی کی اوشان دونبالسر امون ببید، فریاد زہ ببیدی: «اون بوکوشید!»

پولس مردوم امرأ گب زنہ

۳۷ ہنوز پولس قلعہ دورون نبرده ببید کی پولس، فرماندہی بوگفتہ: «اجازہ دیہیدی شمر ایچی بگم؟» فرماندہ بوگفتہ: «تو یونانی گب زنی؟ ۳۸ مگر تو ہو مصری نی بی کی چندی پیش آشوب بر پا بوکودیدی و چہار ہزار نفر آدمکش تی امرأ ببیدی بیابان میان؟»

۳۹ پوئس بوگفته: «من ايتاً يهودى، شهر تارسوس كيليكه شين ايسم، شهري كى بى نام و نيشان نى يه. خواهش كونم ايجازه بديد مردوم امراً گب بزنم.»

۴۰ وختى فرمانده ايجازه بده، پوئس بوشو پله جور به پا بيسه، خو دس مردوم طرف دراز كوده. وختى همه ساكت بوستيد، به زبان عبرانى اوشان بوگفته:

۱ «اى براران و اى پئران، دفاع كودن جه خودم كى هسه شيمى خدمت عرض كونمه، گوش بديد.»
۲ وختى مردوم بيشنوستيد كى اوشان امراً به زبان عبرانى گب زن دره، همه تان ساكت بوستيدى.
بزین پوئس بوگفته:

۳ «من ايتاً يهودى يم كى تارسوس كيليكه ميان به دنيا بموم، ولى اورشليم ميان پيله بوبوستم. مى اجدا شريعت تومام و كمال، گاملائيل* اوستاد ورجه، ياد بيگيفتم و خودا ره غيرت داشتيم، شيمى مانستن، هوطو كى ايمروز شومان همه تان ايسيدى. ۴ من عيسى پروان تا حد مرگ آزار ديم و مرداكان و زناكان گيفتم، تاوده يم زندان دورون. ۵ هوطو كى كاهن اعظم و تومام اعضاي شوراي يهود شاهد ايسيدى كى جه اوشان نامه فيگيفتم، شوييم دمشق اوشان براران يهودى ورجه، كى اويه مردوم بيگيرم، زندانى بوكونم و باورم اورشليم، كى مجازات بييد. ۶ «ولى وختى شوئون دوبوم، دمشق نزديكى، راه ميان، زواله دم، ناخبر ايتاً پيله دانه نور، شبق زنان آسمان جا مر دتاوسته. ۷ بگفتم زمين سر، ايتاً صدا بيشنوستم كى مر بوگفته: (شائول! شائول! چره مر آزار ديهي؟) ۸ «ورسم: (اى سرور، تو كيسى؟)

«جواب بده: (من هو عيساي ناصري يم كى تو اون آزار ديهي.) ۹ اوشانى كى مى امراً همراه بيد، نور بيديهيدى ولى صداى او كسى كى مى امراً گب زن دوبو، نيشنوستيدى. ۱۰ بوگفتم: (سرورم، چى و او بوكونم؟) «خوداوند بوگفته: (ويريز، بوشو دمشق. اويه هر چى كى و انجام بدى، تر گفته به.) ۱۱ من جه روشنايى او نور، هيچى نتانستيم بيديم. پس اوشانى كى مى امراً بيد مى دس بيگيفتيدى، مر بيرديدى دمشق.

۱۲ «دمشق دورون ايتاً يهودى زاده مرداى كى به عيسى مسيح ايمان باورده بو، كيتاب تورات موسى دقت امراً ايطاعت كودى. اون نام حنانيا بو، كى يهوديان ميان نيك نام بو. ۱۳ اون بمو مى ورجه، مر بوگفته: (برار شائول، بينا بوبو!) هو لحظه بينا بوبوستم و اون بيدم. ۱۴ اون بوگفته: (امى پئران خودا تر انتخاب بوكوده كى اون ارادهى بدانى، عيساي عادل بيدنى و اون گبان بيشوى. ۱۵ پس تو تومام مردوم ورجه اون شاهد بى و بر هر چى كى بيديهى و بيشنوستى، شهادت ديهي. ۱۶ هسه منتظر چى ايسه يى؟ ويريز و غسل تعميد بيگير و خوداوند نام دوخوان، كى تى گوناهاان جا پاك بى!»

۱۷ «وختی واگردستم اورشلیم، معبد میان دوعا کودن دوبروم کی جہ حال بوشوم ۱۸ و رویا میان عیسای خوداوند بیدم کی گفٹی: (عجلہ بوکون و ہرچی زودتر اورشلیم جا بوشو بیرون، چونکی اوشان تی شہادت در مورد من قوبیل نوکونیدی.)

۱۹ «بوگفتم: (خوداوندا، اشان دانیدی کی من ہمہ یہودیآن کنیسہ یان دورون شویم و فرمان دیم تا اوشانی کی تر ایمان داشتیدی، بزید و زندانی بوکونید. ۲۰ ہو وختان کی خون تی شاہد، استیفان، فوکودن دبید، اون قاتلان کاران قوبیل داشتیم و حتی اون کوشتن موقع جہ اون قاتلان لباسان مواظبت بوکودم.)

۲۱ «خوداوند عیسی مر بوگفٹہ: (بوشو، چونکی من تر اوسہ کونم، بیشی ایتا جای دور غیریہودیآن میان.)»

پولس کی ایتا رومی بو

۲۲ مردوم کی تا ایہ پولس گبان گوش دتن دبید، هطو کی بیدہ بیدی در مورد غیریہودیآن گب بزہ، فریاد بزہ بیدی، بوگفٹیدی: «آ مرداک بیگیرید بوکوشید. آ جور آدم نوستی زندہ بمأنہ.»

۲۳ هطو کی اوشان فریاد زہ بیدی و خوشان ردایان هوا دورون تکان دہ بیدی و خاک بولند کودیدی، ۲۴ فرماندہ دستور بدہ پولس برید قلعه دورون و اون شلاق بزید و اون جا بازجویی بوکونید کی بفہمید چہ اطوی بر ضد اون فریاد زہ بیدی. ۲۵ وختی اون دوستن دبید کی شلاق بزید، پولس افسری کی اوہہ ایسہ بو، بوگفٹہ: «آیا قانون شمر اجازہ دہہ کی اینفر رومی محاکمہ نوکودہ، شلاق بزید؟»

۲۶ افسر رومی وختی آ گبان بیشنوستہ، بوشو فرماندہ ورجہ، اون بوگفٹہ: «چی کودن دری؟ دانی کی آ مردای روم امپراطوری تبعہ ایسہ؟»

۲۷ فرماندہ بوشو پولس ورجہ، وورسہ: «بوگو بیدینم، آیا تو رومی ایسی؟» پولس جواب بدہ: «بلہ من روم تابعیت دارم.»

۲۸ فرماندہ واگردستہ بوگفٹہ: «روم تابعیت فیگفٹن وستی، بہای زیادہ پرداخت بوکودم.» پولس واگردستہ اون بوگفٹہ: «ولی من خودم آ تابعیت امرأ بہ دونیا بموم!»

۲۹ اوشانی کی قرار بو پولس بازجویی بوکونید، خوشان کنار فکشہ بیدی. فرماندہ ہم کی بفہمستہ بو ایتا رومی اسیر بوکودہ، سخت دس پاچہ بو بوستہ.

پولس شورای یہود میان

۳۰ فردا روز رہ کی فرماندہ خواستی بفہمہ کی چہ یہودیآن پولس جا شکایت دآریدی، اون آزاد کودہ و فرمان بدہ و پیلہ کاهنان و توما اعضای شورای یہود جلسہ بی تشکیل دبید و بزین پولس باوردید اوشان جلو.

۱ پوئس، شورا اعضائِ ننگاہ بوکودہ بوگفته: «براران، من تا ایروز خودا ورجہ وجدان پاکِ امرأ زندگی بوکودم و بازم کونم.» ۲ وختی آن بوگفته، کاهن اعظم، حنایا، دستور دہہ کسانِی کی پوئس ورجہ ایسہ بید، اون دہان میان بزئید. ۳ پوئس واگردستہ، حنایای بوگفته: «خودا ترزنہ، ای خوش ظاہر بد باطن! تو او تخت سر نیشته یی کی مر محاکمہ بوکونی، ولی خلاف شریعت، دستور دیہی تا مر بزئید؟»

۴ کسانِی کی پوئس نزدیکی ایسہ بید، بوگفتیدی: «خودا کاهن اعظم ناسزا گی؟»

۵ پوئس بوگفته: «ای براران، نانسٹیم کی اون کاهن اعظم ایسہ؛ چونکی کیتاب تورات میان بینویشته: (تی قوم حاکمان ناسزا نوا گفتن.)»*

۶ پوئس دانستی کی اجمع میان بعضی یان صدوقی و بعضی یان فریسی ایسیدی. هن وستی صدای بولند امرأ، شورا میان بوگفته: «ای براران، من فریسی و فریسی زادہیم. بہ امید زندہ بوستن مُردہ یان در روز قیامت وستی ایسہ کی محاکمہ بوستن درم.»

۷ وختی آن بوگفته، فریسیان و صدوقیان میان اختلاف دکفته و مردوم دو دستہ بوبوستیدی، ۸ چونکی صدوقیان منکر قیامت و فرشتہ و روح بید، ولی فریسیان بہ تومام اوشان اعتماد داشتیدی.

۹ اوشان دورونی جینجال دکفته. چند نفر جہ علمای فرقی فریسی ویریشتیدی و اعتراض کونان بوگفتیدی: «امان امرأ دورون خطایی نیدینیم. جہ کویہ معلومہ کی روح یا فرشتہ یی، اون امرأ گب نزہ بی.» ۱۰ وختی فرماندہ بیدہ کی اطو، فریسیان و صدوقیان میان اختلاف شدید دکفته، بترسہ کی نوکونہ پوئس تیکہ پارہ بوکونید. دستور بدہ سربازان بیشید و اون، جہ اوشان میان بیرون باورید و ببرید قلعه دورون.

۱۱ ہو شب، خوداوند عیسی بمو پوئس ورجہ و اون امرأ گب بزہ، بوگفته: «نوا ترسن، شجاع بوبو! هو طو کی اورشلیم میان مر شہادت بدی، روم میانم و مر شہادت بدی.»

نقشہ ی قتل پوئس

۱۲ فدای او روز، یہودیان ہمدیگر امرأ نقشہ بکشہ ییدی، قسم بوخوردیدی تا پوئس نوکوشتیدی ہیچی نوخوردید.

۱۳ ویشتر جہ چہل نفر بید کی ہمدیگر امرأ ہم پیمان بوبوستید. ۱۴ اوشان بوشویدی پیلہ کاهنان و مشایخ ورجہ و بوگفتیدی: «امان قسم بوخوردیم کی تا پوئس نوکوشیم، ہیچی نوخوریم. ۱۵ پس ہسہ شومان و شورا اعضا، فرماندہ ی رومی بیگید کی اون باورہ شیمی ورجہ، بہ ابہانہ کی دققتتر اون جا بازجویی بوکونید. امانم آمادہیم ہطو کی امی نزدیکی بمو اون بوکوشیم.»

۱۶ وختی پوئس خواخور زأ، کی او شهر میان زندگی کودی، جِه اوشان نقشه و اخبر بوبوسته، بوشو قلعه دورون، پوئس و اخبر کوده. ۱۷ پوئس ایتا افسر دوخوآده و بوگفته: «آ جوان اوسه کون فرمانده ورجه، چونکی اون ره ایتا خبر باورده.» ۱۸ پس افسر اون فوری ببرده فرمانده ورجه و بوگفته: «پوئسی کی زندان میان ایسه، مر دوخوآده و مر بوگفته آ جوان باورم تی ورجه کی تر ایچی بگه.»

۱۹ فرمانده او مرد جوان دس بیگفته، اون ببرده ایچہ کنارتر و وورسه: «بوگو بیدینم مره چی خبری باوردی؟» ۲۰ اون بوگفته: «یهودیان نقشه بکشه ییدی کی فردا شیمی جا بخوآید کی پوئس باورید شورا، به آ بهانه کی جِه اون دقیقتر بازجویی بوکونید. ۲۱ اوشان گبان قوبیل نوکونید، چونکی ویشتر جِه چهل نفر یهودی اون کمین ایسه ییدی و همدیگر امرأ هم قسم بوبوستیدی و بوگفتیدی: (تا اون نوکوشیم، هیچی نوخوریم.) هسه آ مرداگان آماده ایسه ییدی کی شومان آ تقاضای قوبیل بوکونید.» ۲۲ فرمانده، جوان اوسه کوده کی بشه و اون فرمان بده، بوگفته: «هیچ کس نوگو کی آ خبر مره باوردی.»

پوئس بریدی قیصریه

۲۳ پس اون، دو نفر جِه خو افسران دوخوآده بوگفته: «دیویست نفر سرباز پیاده، هفتادتا سواره نظام و دیویست تا نیزه دار آماده کونید کی ساعت نه شب بیشید قیصریه. ۲۴ پوئس سوار کونید، اون سلامت برید و فلیگس، استان یهودیه والی تحویل بدید.»

۲۵ اون ایتا نامه بینویشته:

۲۶ «به نام خودا،

جِه: گلودیوس لیسایس

به: عالیجناب فلیگس، والی

۲۷ یهودیان آ مرداک کی آن نام پوئس ایسه، بیگفتیدی و نقشه بکشه ییدی تا اون بوکوشید ولی من، می سربازان امرأ بوشویم و اون نجات بدیم، چونکی بیشنوستم روم شینه. ۲۸ اون ببرد یهودیان شورا میان کی بفهم چره اون محکوم بوکودیدی. ۲۹ بفهمستم کی اوشان خوشان دین و شریعت وستی اختلاف داریدی و اون کاری نوکوده کی سزاوار اعدام یا زندان ببه. ۳۰ وختی متوجه بوبوستم کی بر ضد اون نقشه بکشه ییدی، فوری اون شیمی ورجه اوسه کودم. مدعیانم دستور بدم شکایتی کی اون جا داریدی، شیمی ورجه باورید.»

۳۱ سربازانم خوشان فرمانده دستور امرأ، شبانه پوئس باوردیدی شهر آنتیپاتریس. ۳۲ هو روز، اون بیسپردیدی به سواره نظام کی اون باورید و سربازان به قلعه و اگر دستیدی. ۳۳ سواره نظام وختی به قیصریه فارسه ییدی، نامه تحویل والی بدیدی و پوئس بریدی اون ورجه. ۳۴ والی نامه بخوانده، پوئس جا وورسه: «کو استان شینی؟» بفهمسته کی

کیلیکیہ شین ایسہ، ۳۵ اون بوگفته: «وختی اوشانی کی تی جا شکایت دأریدی فأرسید آیه، تی جا بازجویی کونم». بزین دستور بدہ کی پولس بأورید، هیروڈیس کاخ میان زیر نظر بدأرید.

پولس محاکمہ، فلیکس ورجہ

۲۴
 ۱ پنج روز بعد، کاهن اعظم کی اون نام حنانيا بو، چند نفر جہ مشایخ یهود و ایتا وکیل امرأ کی ترتولس نام داشتی، بوشوییدی قیصریہ و خوشان شکایت بریدی والی ورجہ. ۲ وختی پولس بأوردیدی، ترتولس وکیل خو شکایت فلیکس والی ورجہ اطویبی شروع بوکودہ: «عالیجناب، خیلی وختہ کی شیمی سایہ ئ جیر آسایش دأریمی و شیمی آیندہ بینی باعث بو بوستہ اقوم پیشرفت بوکونہ. ۳ امی وظیفہ دانیمی ہمہ جا و ہمہ کس ورجہ شیمی جا قدردانی بوکونیم. ۴ خیلی شیمی وخت نیگیریم. تقاضا دأریمی امر محبت بوکونید و امی گبان گوش بدید. ۵ «امر آشکار بوستہ کی امردای، آدم فتنہیی ایسہ کی تومام دونیا یهودیان میان شورش بہ پا کونہ و ایتا جہ سران فرقه ئ ناصرییم ایسہ. ۶ اون سعی کونہ کی معبد بی حرمت بوکونہ، کی امان اون دسگیر بوکودیم کی امی شریعت امرأ اون محاکمہ بوکونیم ۷ ولی فرماندہ لیسایس بمو و اون بہ زور جہ امی دس بیرون بأوردہ، ۸ و اوشانی کی اون جا شکایت دأریدی دستور بدہ کی بأید آیه شیمی ورجہ. ہسہ اگہ شومان خودتان اون جا بازجویی بوکونید، شمر آشکار بہ کی امان چرہ اون جا شکایت دأریمی.» ۹ یهودیانم یکصد بوگفتیدی: «هطویہ».

پولس دفاع فلیکس ورجہ

۱۰ وختی والی پولس اشارہ بوکودہ کی گب بزہ، اون اطویبی جواب بدہ:
 «دانم سالیان درازی ایسہ کی شومان قضاوت قوم یهود بر عہدہ دأریدی. پس شادی امرأ، جہ خودم دفاع کونم. ۱۱ حقیقت موضوع شمر آشکار بہ: جہ او روزی کی من بہ زیارت اورشلیم بوشوم دوازده روز ویشتر نیہ. ۱۲ ہیکس مر نیدہ کی معبد میان کسی امرأ جروبحت بوکونم، یا کنیسہیان میان و یا شہر میان، مردوم بوشورانم. ۱۳ هطویم اوشان نتانیدی ہرچی کی بہ ضد من گیدی شیمی ورجہ ثابت بوکونید. ۱۴ ولی شیمی ورجہ و اعتراف بوکونم کی بہ تعلیمی کی (راہ نجات) ایسہ و اوشان اون (فرقہ ئ تازہ) نام بنہیدی، قوبیل دارم و امی پئران خودای عبادت کونم و بہ ہر اونچی کی تورات و پیامبران کیتابان دورون بینیویشتہیہ، ایمان دارم. ۱۵ منم اوشان مانستن بہ خودا امید دارم کی قیامتی عادلان و ظالمان رہ در پیشہ. ۱۶ ہن وستی منم سخت تلاش کونم کی خودا و مردوم ورجہ ایتا وجدان پاک امرأ زندگی بوکونم.

۱۷ «من بعد سالیان دراز و اگر دستم بوشوم اورشلیم کی کومکهای مالی، می قوم فقیران رہ ببرم و قربانییم خوداوند رہ تقدیم بوکونم. ۱۸ آداب و رسوم تطہیر بہ جا آوردن دوبوم کی مر معبد میان بیدہیدی. نہ جینجال بر پا بو و نہ

شورشی. ۱۹ ولی اویہ چند نفر یہودی کی جہ منطقہ ی آسیا بمو بید و اوشان بر علیہ من بوشورانہ بید، خُب بو کی الان اوشانم شیمی ورجہ بیسہ بید و ہر شکایتی جہ من دأشتیدی شمَر بوگفته بید. ۲۰ یا اشان جا وورسید کی شورا چہ خطایی می جا بیدہ و بہ چہ جرمی مَر محکوم کونیدی، ۲۱ بہ جز آنکی اوشان میان صدای بلند امرأ بوگفتم: (بہ زندہ بوستن مُردہ یان جہ روز قیامت ایمان دارم و ہن وستی ایسہ کی ایمروز شیمی ورجہ آیہ محاکمہ بوستن درم.)»

۲۲ بزین فلیکس کی جہ تعلیم مسیحیان بہ خوبی آگاہ بو، محاکمہ ی عقب تاودہ، بوگفته: «وختی فرماندہ لیسایس بایہ و اون گبان بیشوم، شیمی شکایت رسیدگی کونم.» ۲۳ و ایتا جہ خو افسران فرمان بدہ پولس جا نگہبانی بوکونہ، کی اگہ اون آشنایان بخوآستید اون بیدینید و اون رہ چیزی باورید، اجازہ بدہ.

۲۴ چند روز بعد، فلیکس خو زناک امرأ کی اون نام ڈروسیلا و یہودی ہم بو، بمو. اون دستور بدہ پولس باورید تا اون گبان کی جہ ایمان بہ عیسی مسیح بو، گوش بدید. ۲۵ وختی پولس جہ عدالت و پرهیزگاری و روز داوری گب بزہ، قدرت خودا کلام فلیکس ہراسان کودہ و بوگفته: «ہسہ د تانی بیشی ولی اگر وخت بدأشتم، بازم تر دوخوانم.»

۲۶ ولی امیدوار بو کی پولس اون رشوہ فدہ. ہن وستی چند بار اون دوخوآدہ و اون امرأ گب بزہ.

۲۷ دو سال کی بوگوذشتہ، پورکیوس فستوس، فلیکس جانشین بو بوستہ. ولی فلیکس، بہ خاطر آنکی یہودیآن سر منت بنہ پولس زندان میان بدأشتہ.

پولس محاکمہ فستوس ورجہ، کی جانشین فلیکس بو بوستہ بو

۱ فستوس سہ روز بو کی فلیکس جانشین بو بوستہ بو، جہ شہر قیصریہ بوشو اورشلیم. ۲ پیلہ کاهنان و قوم پیلہ دانہ آدمان بمویدی اون ورجہ، خوشان ایتہامات بر ضد پولس بوگفتیدی ۳ و پافشاری بوکودیدی کی: «امی سر میٹ بنہ و پولس باور اورشلیم،» چونکی نقشہ بکشہ بید اون راہ میان بوکوشید. ۴ ولی فستوس واگردستہ بوگفته: «پولس قیصریہ زندان میان ایسہ و منم خوایم بشم اویہ. ۵ جہ شیمی میان کسان کی صلاحیت دریدی تانیدی امی امرأ بایید اویہ کی اگہ اون گوناہکار بہ اون جا شکایت بوکونید.»

۶ فستوس بعد ہشت تا دہ روزی کی اورشلیم میان ایسہ بو، راہ دکفہ، شہ قیصریہ طرف و فردای او روز، تخت قضاوت سر نشینہ و فرمان دہہ پولس باورید. ۷ ہطو کی پولس بمو بودورون، یہودیانی کی جہ اورشلیم بمو بید، بمویدی اون دور بیسہ بیدی. ایتا عالمہ شکایات سنگین بر ضد اون بوگفتیدی ولی نتانستیدی اوشان ثابت بوکونید.

۸ پولس توامی ایتہاماتی کی ان بزہ بید رد کودہ و بوگفته: «من ہیچ تقصیری نارم. شریعت یہودی امرأ مخالف نییم، بہ معبد یا قیصر ہیچ بی احترامی یا خطایی نوکودم.» ۹ ولی فستوس کی خوآستی یہودیآن سر منت بنہ، پولس بوگفته: «خوایی بیشیم اورشلیم کی اویہ می ورجہ محاکمہ بیبی؟» ۱۰ پولس جواب بدہ: «شومان کی قیصر نمایندہ ایسیدی و منم کی قیصر تخت قضاوت جلو بیا ایسم، ہو جایی ایسہ کی وا محاکمہ بیم. شومان خودتان می جا بہتر

دائیدی کی من به ضدّ یهودیان ہیچ گوناہی نوکودم. ۱۱ ہسہ اگہ گوناہی بوکودم کی می حق مردن بیه، مردن جا ترسی نأرم. ولی اگہ ایفترائی کی اشان مر زیدی نتانید ثابت بوکونید، پس ہیچ کس نتانہ مر اوشان دس فدہ کی مر بوکوشید. مر وَا اوسہ کونید روم تا قیصر جا دادخواہی بوکونم.» ۱۲ فستوس خو مشاوران امرأ مشورت بوکودہ، پولس بوگفتہ: «پس هطو کی تو بوگفتی، خوایی جہ قیصر تقاضای عدالت بوکونی، تر اوسہ کونیم قیصر ورجہ.»

فستوس، اگریپاس امرأ مشورت کونہ

۱۳ چند روزی بوگذشتہ بو کی اگریپاس پادشاہ کی روم حکومت دس نشانہ بو، خو خواخوڑ مرہ کی برنیکی نام دأستی، خوشامدگویی وستی بموییدی قیصریہ، فستوس ورجہ. ۱۴ روزان زیادی کی پادشاہ و فستوس با ہم ایسہ بید، فستوس جریان زندانی بوستن پولس بہ میان فکشہ، و اگردستہ پادشای بوگفتہ: «ایتا زندانی دأریم کی فلیکس، اون محاکمہی مر واگذار بوکودہ. ۱۵ وختی کی اورشلیم میان بوشو بوم، پیلہ کاهنان و مشایخ یهود می ورجہ بموییدی و جہ پولس زندانی شکایت بوکودیدی و بخواستیدی کی من اون مجازات بوکونم.

۱۶ «منم و اگردستم اوشان بوگفتم: (بہترہ کی بدانید روم قانون میان، ہیچ کس بدون محاکمہ مجازات نیہ. اول اوشان مہلت فدیدی تا کی بتانید جہ خودشان دفاع بوکونید.) ۱۷ وختی پولس شاکیان، ہمہ تان بموییدی آیہ، فردا روز رہ، فوراً تخت داوری سر بینیشتم، فرمان بدم اون باورید. ۱۸ وختی شاکیان ویریشتیدی و علیہ اون گب بزہ بیدی، بر خلاف می تصور، ہیچ گوناہی در اون نیدم، چون بر خلاف امی قانون کاری نوکودہ. ۱۹ من بفہمستم کی اوشان دعوا مربوط بہ خوشان دین و مذہب ایسہ و اشان گبان جہ عیسی نامی ایسہ کی بمردہ بو، ولی پولس ادعا کودی کی زندہ ایسہ. ۲۰ جہ ا خاطر کی رسیدگی اوشان رسم و دین و مذہب وارد نوبوم، بہتر بیدم کی اون اوسہ کونم اورشلیم و اوہیہ محاکمہ بہ. پس پولس وورسم: (تی دیل خوایہ کی بیشی اورشلیم محاکمہ بیبی؟) ۲۱ پولس جہ قیصر دادخواہی بوکودہ، منم فرمان بدم کی اون ہوہی بدأرید کی من اون قیصر ورجہ اوسہ کونم.» ۲۲ اگریپاس، فستوس بوگفتہ: «خیلی می دیل خوایہ کی اون گبان بیشنوم تا بدانم پولس چی دأرہ کی بگہ.» فستوس و اگردستہ بوگفتہ: «فردا حتماً ان گبان ایشنوی.»

پولس اگریپاس روبرو

۲۳ فردای او روز، اگریپاس خو خواخوڑ برنیکی امرأ با زرق و برق، جلال و جبروت بموییدی و نظامی فرماندہیان و شہر سرشناس آدمان امرأ بموییدی دادگاہ تالار میان. فستوس فرمان بدہ تا پولس باورید. ۲۴ وختی کی پولس باوردیدی، فستوس و اگردستہ بوگفتہ: «ای اگریپاس پادشاہ و ای جماعتی کی الان امکان میان جمع بوستیدی، ا شخص کی دینیدی، تومام یهودیان قیصریہ و اورشلیم می جا بخواستیدی کی اون دستور قتل صادر بوکونم. ۲۵ من

بفہمستم کی اون کاری نوکودہ کی محکوم بہ مرگ بہ۔ ولی چونکی قیصرؓ جا دادخواہی بوکودہ، موافقت بوکودم کی اون اوسہ کونم روم۔ ۲۶ جہ ایتھامی کی اون بزہییدی، ہیچ مدرکی ناشتیم کی قیصرؓ رہ بینیویسم۔ ہنؓ وستی، اونؓ باوردم شیمی حضور، مخصوصاً ای آگریپاسؓ پادشاہ، کی قضاوت بوکونید، تا بتانم ایچی قیصرؓ رہ بینیویسم و اوسہ کونم۔ ۲۷ عاقلانہ نی یہ امان زندانیؓ کی ہیچ مدرکی کی ثابت بوکونہ گوناہی مرتکب بوہوستہ روانہ کونیم، بشہ قیصرؓ ورجہ۔»

پولسؓ دفاع کودن جہ خودش آگریپاسؓ ورجہ

۱ آگریپاسؓ واگردستہ، پولسؓ بوگفتہ: «اجازہ داری کی جہ خودت دفاع بوکونی.» پولسؓ ہم بہ رسم رومیان دادگاہ میانی خو دسؓ بوجورؓ کیفیہ و اطویٰ خو دفاعیؓ شروع بوکودہ:

۲۶

۲ «ای پادشاہ حکیم، خیلی مرہ باعثؓ خوشحالی ایسہ کی در حضورؓ شومانؓ جہ اتھاماتی کی یہودیانؓ مر بزہییدی و زینیدی، خودمؓ جا دفاع کونم۔ ۳ دانم شومانؓ تانیدی ایتا قاضی و داوڑ خوبی بینؓ من و می طرفؓ دعوا ببید، چونکی بہ آداب و رسوم و اختلافاتؓ مذہبیؓ یہودیانؓ وارد ایسیدی۔ پس شیمیؓ جا اینتظار دارم کی تومامیؓ می گبانؓ صبر و حوصلہ امرأ گوش بدید۔

۴ «تومامیؓ یہودیانی کی مر شناسیدی، دانیدی کی من جہ او وختی کی زای بوم، قومؓ یہودؓ رسم امرأ، می شہر تارسوسؓ میانی تربیت بوہوستم و اورشلیمؓ دورونی زندگی بوکودم۔ ۵ اشانؓ مر خبؓ شناسیدی و اگہ بخوآیید، تانیدی شہادت بدید و می گبانؓ تصدیق بوکونید کی ہمیشہ ایتا فریسیؓ سختگیر بوم و جہ آداب و رسومؓ قومؓ یہودؓ ایطاعت کودیم۔ ۶ ہسہ ہہ تھمتانی کی اشانؓ مر زینیدی و خوآییدی مر محکوم بوکونید جہ آ خاطرہ کی من وعدہؓ رستاخیزؓ اینتظار کشم کی خودا مژدیانؓ زندہ کونہ و آ وعدہ، پیغامی بو کی خودا امی اجدادؓ فدہ بو۔ ۷ تومامیؓ قومؓ یہودؓ شبانہ روز با تومامی دیل و جان سعی بوکودیدی و کونیدی کی خودا دستورانؓ ایطاعت بوکونید تا بہ باورؓ فآرسید کی من الانؓ دارمہ۔ ای پیلہ دانہ پادشاہ، ہہ امیدؓ وستی ایسہ کی اشانؓ خوآییدی مر محکوم بہ مرگ بوکونید۔ ۸ ای یہودیانی کی آیہ ایسہییدی، چرہ نخوآییدی باور بوکونید کی خودا آدمیؓ کی بمرہ دووارہ زندہ کونہ؟

۹ «ایتا موقع، می باور ہنؓ بو کی اوشانی کی عیسایؓ ناصریؓ قبیل دآریدی، و آزار و شکنجہ بدم۔ ۱۰ جہ آ خاطر پیلہ کاهنانؓ دستورؓ امرأ خیلی جہ مسیحیانؓ اورشلیمؓ میان زندانی بوکودم۔ وختی محکوم بہ مرگ بوستیدی، بہ ضدؓ اوشانؓ رایؓ فدیم۔ ۱۱ تومامیؓ می سعی و تلاش آن بو کی کنیسہیانؓ میان اوشانؓ زجر و شکنجہ امرأ، وادار بوکونم کی مسیحؓ کفر بیگید۔ اینقدہ اوشانؓ غیظؓ می دیل داشتیم کی اوشانؓ تا دورترین شہرانؓ دونبالؓ کودیم۔

پولس گبان خودش ایمان ره

۱۲ «ایبار کی ایتا آجور ماموریتان میان، جہ حکمی کی پیلہ کاهنان مر فده بید، دمشق طرف شوئون دوبوم. ۱۳ ای پیلہ دانه پادشاه، ایتفاقی کی مره دکفته و شمره نقل کونم، زواله دم بو کی جہ آسمان ایتا پیلہ دانه شفق امی سر جور بتابسته اون تابش شدت ایجور بو کی همه تان امر سوجانن دوبو، ۱۴ امان همه تا بکفتم زیمین سر. ایدفعه یی ایتا صدا مر بوگفته: (شائول، شائول، چره آنقدر مر آزار رسائی؟ بدان کی تی آ کاران، آن مانه کی تو مخ سر راه بیشی. تو خودت لطمه زن دری!) ۱۵ او صدا صاحب وورسم: (سرورم، تو کی ایسی؟)

«بوگفته: (من هو عیسی ایسم کی تو اون آزار رسائی. ۱۶ هسه ویریز! هطو کی تر ظاهر بوستم و تر انتخاب بوکودم کی می خدمتگوزار و می شاهد بیی، اونچی کی ایمرور ایتفاق دکفته و در آینه هم ایتفاق دکفه، مردوم ره تعریف بوکون. ۱۷ من تر جہ تی قوم و غیریهودیان دس حمایت کونم. می تصمیم انه کی تر غیریهودیان ورجه اوسه کونم. ۱۸ وستی اوشان چومان واز کونی تا جہ ظلمت تاریکی به می نور و روشنایی و جہ شیطان قلمرو به خودا طرف واگردانی تا کی اشان گوناهان بخشیده بیه و کسانی ورجه کی جہ ایمان آوردن به من مقدس بو بوستید سهم بدآرید.)

پولس گبان، خودش خدماتی ره کی انجام بدهبو

۱۹ «هن وستی ای پیلہ پادشاه، من او صاحب صدا گبان گوش بوکودم. ۲۰ جہ اول دمشق یهودیان ره، بزین اورشلیم و سراسر یهودیه و غیریهودیان ره اعلام بوکودم کی توبه بوکونید و خودا طرف بائید و خوشان کرد کاران امران نیشان بدید کی جہ دیل و جان توبه بوکودیدی. ۲۱ جہ خاطر بو کی یهودیان مر معبد میان دسگیر بوکودیدی و خواستیدی مر بوکوشید. ۲۲ تا به هسه خودا مر یاری بوکوده و الان کی شیمی ورجه ایسم جہ کوجدانه و پیلہ دانه ره شهادت بدم، او چیزی کی گمه، تومامی ای او گبانی ایسه کی موسی و بقیه ای خودا پیغمبران مردوم گفتیدی کی و ایتفاق دکفه، ۲۳ کی مسیح وادرد ورنج بکشه و اولین کسی بیه کی جہ خو مردن امران دوواره زنده بیه، و یهود و غیر یهود زندگی ای روشنایی بخشه.»

پولس، اگر پاس به ایمان خوداوند عیسی مسیح دعوت کونه

۲۴ ایدفعه یی فستوس خو جاجیگاه جا ویریزه و ایجگره امران پولس گه: «مگه تو تور بوستی؟ یا جہ درس خواندن زیادتی عقل جہ دس بدیی؟» ۲۵ پولس واگردسته، بوگفته: «عالیجناب فستوس، من نه تور دیوانه ایم، نه زیادتی درس خواندن امران عقل جہ دس بدم. تومامی ای می گبان در راستی و هوشیاری گفتن درمه. ۲۶ دانمه کی تانم تومامی ای می گبان آزادانه بگم، چونکی پادشاهی کی من اون ورجه ایسم، همه ای ماجرایانی کی ایتفاق دکفته آگاهی داره،

چونكى هيچي خلوت جاھ ميانى ايتفاق دنكفته. ۲۷ اي آگريپاس پادشاه، شومان خودا پيغمبران قوبيل داريدى؟ كى البته دانم كى داريدى.»

۲۸ آگريپاس واگردسته، پولس جا وورسه: «تو خوابي تي آگبان امرأ، مر مسيحي چاكونى؟» ۲۹ پولس هم رو بوكوده، پادشاي بوگفته: «من جه خودا خوابيمه دير يا زود همهئ شمرو و همهئ كسانى كى امي ورجه و هر جاى ديگه ايسه بيدي، اشان ديلان لمس بوكونه و همه تان مسيحي بيبيد. البته نه مي مانستن مسيحي غل زنجير دورونى.» ۳۰ بزین پادشاه و آن خواخور پرنیکی و والى و همهئ پيله كس آدمان جه خوشان جاجيگه ويريشتيدى و دادگاه تالار ترك كوديدى. ۳۱ هطو كى همه تان كرا شوئون ديبيد و كل گب زنان همديگر گفتيدى: «هسه كى امرأك گبان بيشنوستيمى، هيچ گوناھى جه آن نيده ييمي كى اون جزا مرگ و يا زندان بيه.» ۳۲ آگريپاس ناراحتى امرأ واگردسته، فستوس بوگفته: «اگه پولس، جه قيصر دادخواھى نو كوده بى، شايستى اون آزاد كودن.»

پولس رسول و لوقا خوشان همراھان امرأ جه راه دريا شيدى روم

۱ وختى قرار بر آن بوبوسته كى امان جه دريا بيشيم ايتاليا، پولس و چند نفر جه زندانيان ديگرم باورده بيد و ايتا افسرى كى اون نام يوليوس بو بيسپرديدى كى جه لشكر گارډ قيصر بو. ۲ كشتى كى جه منطقه ادراميتينوس بو، سوار بوستيم كى جه بندران آسيايى دوارستى تا فارسيم ايتاليا. آريستارخوس مقدونى* جه شهر تسالونيكى اسفرو ميان امي امرأ بو.

۳ فردا روز ره، فارسه ييم شهر صيدون. افسر يوليوس، پولس محبت بوكوده، اجازه بده كى بشه خو دوستانى كى هو شهر دورونى داشتى بيدينه. ۴ جه اويه كشتى امرأ راه دكفتيم تا به طرف امي مقصد بيشيم. ولى باډ مخالف اينفده زياد بو كى كشتى جه خو مسير خارج كوده. هن وستی مجبور بوبوستيم جه شومال قبرس كى امي كشتى ره «بادپناه» بو، هو باډ كومك امرأ حركت بوكونيم. ۵ جه دريايان ايلات كيليكه و پامفيليه دوارستيم تا بندر ميرا بيجير بموييم، كى ايلات ليكيه ميان نهه.

۶ هو افسرى كى امرأ تا مقصد همراھى كودن دبو، ايتا كشتى مصرى پيدا كونه كى ايتاليا طرف شوئون دبو و امرأ سوار او كشتى بوكوده. ۷ روزان يواش يواش شوييمى تا سختى امرأ فارسه ييم شهر بندرى كنىڊوس. چون باډ مخالف امون دبو، جه كناره ايتا بادپناه به طرف جزيره كرت و جه او راه از بندر سالمونى دوارستيم. ۸ سختى امرأ جه كنار جزيره كرت رد بوستيم و به مكاني كى «بندر نيكي» نام داشتى، فارسه ييم، كى نزديكى شهر لاسائيه بو. ۹ هطويى وخت زيادى جه دس بده ييم. پاييز آخر روزان بو و فصلى كى باھاي شديدى داشتى و كار دريانوردى خيلى سخت كودى. هه وختان، او موقعى بو كى ايام روزه كفاره يي يهوديانم تومام بوسته بو. پولس واگردسته،

اوشانی کی خواستیدی اشان به مقصد فارسانید هشدار بده کی مواظب ببید ۱۰ و بوگفته: «آقایان، هطو اگه پیش بیشیم، امی سفر پور خطر به، هم کشتی اسیب دینه و هم کشتی بار جه بین شه و امی همه تان جانم به خطر دکفه.» ۱۱ ولی افسر رومی، کشتی ناخدا و صاب کشتی گبان ویشتر قویبل داشتی تا پولس گبان. ۱۲ چون زمستان آ بندر میانی ایسن مناسب نبو، اوشان بهتر بدآنستیدی کی جه اویه بیشید کی فارسه یید به بندر فینیکس و بتانید زمستان اویه بیسید. فینیکس ایتا بندر بو، جزیره ی کرت کنار، کی رو به شمال غربی و جنوب غربی قرار داشتی.

دریا طوفانی به

۱۳ جنوب جا باد ملایمی بمو. اوشان گومان بوکودیدی به او چیزی کی خواستیدی فارسه ییدی. هن وستی لنگر فکشه ییدی و ساحل کرت کنار جا دوارستیم. ۱۴ وخت زیادی نوگودشته بو کی باد شدیدی کی «شومال شرقی باد» معروف بو، به طرف امی کشتی بمو ۱۵ و کشتی گرفتار باد و کولاک بو بوسته. هن وستی د نتانستی خلاف مسیر باد پیش بشه؛ پس مجبور بو بوستیم خودمان به هو باد بیسپریم و اون امرأ پیش بیشیم. ۱۶ در پناه ایتا کوچدانه جزیره کی ان نام گودا بو پیش بوشویم و خیلی زحمت امرأ بتانستیم قایق نجات در اختیار بیگیریم. ۱۷ ملوانان قایق نجاتی کی کشتی عقب دوسته نهه بو سختی امرأ کشتی عرشه رو باوردیدی و لافند امرأ کشتی دور هم دوستیدی. توما م بادبانان بیجیر باوردیدی و کشتی هو باد امرأ رها بوکودیدی چون ترسه ییدی کی کشتی، آفریقا ساحل فورشان میان گیر بوکونه. ۱۸ روز بعد، چون طوفان خیلی سنگین بو، ملوانان مجبور بو بوستیدی کی کشتی بار دریا میان فوکونید. ۱۹ سومی روز میانم، کشتی توما م لوازم دریا میان فوکودیدی. ۲۰ روزان هطو خوره شوئون دبوو. امان نه روز رنگ خورشید ده ییمی و نه شب ستاره یان. طوفانم هطو ایدامه داشتی، جوری بو بوسته بو کی همه تان امان بترسه بیم و خودمان نجات ره هیچ امیدی ناشتیم.

۲۱ مدتی بو کی هیچکی هیچی نو خورده بو، کی پولس اوشان میان ویریشته بپا بیسه و بوگفته: «ای سروران، اگه جه اول می گبان گوش بوکوده یید، اطو گرفتار ا طوفان نوبوستیم، کی جه بندر کرت میانی بیرون باییم و بعدم ان همه ضرر و زیان بیدینیم. ۲۲ هسه شمر گوشزد کونم کی شیمی شهامت جه دس ندید، چونکی شیمی هیچ کلام جان در خطر نیه؛ فقط کشتی در خطر، ۲۳ چونکی دیشب ایتا فرشته از طرف خودایی کی من اون شینم و اون خدمت کونم، بمو می ورجه ۲۴ و مر بوگفته: (پولس، ترس نوا داشتن، چونکی تو وستی قیصر ورجه فارسی تا به اون دس محاکمه بیی. یقین بدار کی خودا تی همسفران جان تر بخشه.) ۲۵ پس ای سروران، دلیل و جرأت بدارید! من خودای ایمان دارم. پس همه چی هو جوری کی مر بوگفته، ایتفاق دکفه. ۲۶ ولی هطویم امی کشتی وستی ایتا جزیره میان به گیل بینیشینه.»

موجِ امرأ کشتی عقبِ اشکفہ

۲۷ چہار دہمی شب بو کی ہنوز باد کشتیِ اَ طرف او طرفِ دریایِ آدریاتیک فکشہ یی۔ نزدیکہای نصفِ شب بو کی ملوانان فکر بوکودیدی بہ خشکی فآرسہ ییدی۔ ۲۸ پس جُلفیِ اَبِ اندازہ بیگفتیدی و بفہمستیدی کی بیست قَدِ آدمی ایسہ۔ ایچہ جولوتر بوشوییدی، اندازہ بیگفتیدی، پونزدہ قَدِ آدمی بو۔ ۲۹ چونکی ترسہ ییدی کی نوکونہ کشتی بہ سنگ بوخورہ، کشتی چہارتا لنگر تآودہ ییدی و دوعا بوکودیدی کی ہرچی زودتر ہوا روشن بہ تا بتانید ہمہ جائِ حُب بیدینید۔ ۳۰ چندتا ملوان کی در فکر فرار جہ کشتی بید، قایقِ نجات تآودہ ییدی دریا میان، وانمود بوکودید کی شوئون درید کشتی جُلُو تا او لنگران دریا میانی تآودید۔ ۳۱ پولس، افسر و سربازان بوگفتہ: «اگہ ا ملوانان کشتی میان نیسید، ہیچکی نتانہ نجات پیدا بوکونہ۔» ۳۲ پس سربازان قایقِ نجات لافند وَوہ ییدی و قایقِ اَبِ دورون ول کودیدی۔ ۳۳ ہوا روشن بوستن دبو، پولس اوشان جا بخواستہ ایچہ غذا بوخورید و بوگفتہ: «ایمروز چہار دہ روزہ کی اینتظار کشن دریدی، ہیچی نوخوردیدی و بی غذا بمآنستہ ییدی۔ ۳۴ ہن وستی شمَرِ خواہش کونمہ کی غذا بوخورید، چونکی شیمی زندہ مآنستن و نجات رہ بہ غذا احتیاج دآریدی۔ ایتا دانہ مویم شیمی سَرِ جا کم نیہ۔» ۳۵ وختی اَن بوگفتہ، نان اوسدہ و ہمہ چی رہ خودای شکر بوکودہ و نان خوردہ کودہ، بوخوردہ۔ ۳۶ پس ہمہ تان دیلگرم بوستید و غذا بوخوردید۔ ۳۷ امان کشتی میان دیویست و ہفتاد و شیش نفر بیم۔ ۳۸ وختی ہمہ غذا بوخوردیدی سَر بوستیدی، ہرچی گندم باقی بمآنستہ بو فوکودیدی دریا میان کی کشتی سو بوک بہ۔

۳۹ وختی ہوا روشن بوستہ، خوشکیِ نشناختیدی کی کویہ ایسہ ولی ایتا خلیج کی ساحلِ شنی دآستی بیدہ ییدی و تصمیم بیگفتیدی کی کشتیِ اویہ بہ گل بینشآنید۔ ۴۰ وختی لنگران بند وَوہ ییدی، اوشان تآودہ ییدی دریا میان و سکان لافندان واز کودیدی۔ کشتی جُلُو بادبان فکشہ ییدی بوجور تا کی کشتی جہ کنارہ ساحل جُلُو بشہ۔ ۴۱ ولی کشتی خورہ بہ ایتا برآمدگی و بہ گیل نیشینہ۔ کشتی دماغہ، خو جا سر بی حرکت مانہ، کشتی عقب گردابِ موجِ امرأ اشکفہ۔

۴۲ سربازان نقشہ کشیدی کی زندانیان بوکوشید کی کسی شناکونان فرار نوکونہ۔ ۴۳ ولی افسر رومی پولس نجات وستی، اوشان فرمان بدہ کی ا کار نوکونید و بوگفتہ: «اول اوشانی کی تآنیدی شنا بوکونید خوشان تآودید دریا میان و شناکونان بہ خشکی فآرسید۔ ۴۴ بقیہ ہم کشتی تختہ پارہی کشتی بیگیرید و بہ خشکی فآرسید۔» اطوی ہمہ تان سالم بہ خشکی فآرسہ ییدی و نجات پیدا کونیدی۔

پولس، لوقا و اوشان همراهان فارسه ییدی مالت جزیره دورون

۲۸

۱ وختی سالم به ساحل فارسه ییم بفهمستیم کی او جزیره نام «مالت» ایسه. ۲ او جزیره آدمان، امر خیلی محبت بوکودیدی. چونکی وارش وارستی و هوا سرد بو، آتش روشن کودیدی و امر به گرمی قوبیل بوکودیدی. ۳ پولس هیزم زیادی جمع کوده بو. وختی اوشان آتش سر نهن دبو، آتش حرارت وستی، ایتا لنتی سمی جه هیزمان دورونی بیرون بمو و پولس دس دوچکسته. ۴ جزیره آدمان، وختی لنتی کی اون دس جا آویزان بو، بیده ییدی همدیگر بوگفتیدی: «پس معلومه امرای قاتله. درسته کی غرق بوستن جا نجات پیدا بوکوده، ولی عدالت دس وناله اون زنده بمانه.» ۵ ولی پولس او لنتی آتش میان تاوده و هیچ آسیبی یم نیده. ۶ اوشان اینتظار داشتیدی کی اون جان فوری ورم بوکونه و بکفه، بیمیره. خیلی اینتظار بکشه ییدی. وختی بیده ییدی هیچ بلایی اون سر نمو، اوشان فکر عوض بوسته، بوگفتیدی اون ایتا جه خودایانه.

۷ او جزیره رئیس کی آن نام پولیوس بو، او نزدیکیان باغ و بولاغان زیادی داشتی و امر خو خانه دعوت بوکوده و سه روز خو جاجیگاه میان امی جا پذیرایی بوکوده. ۸ پولیوس پتر بیماری و تب و اسهال خونی جا بستری بو. پولس بوشو اون ورجه، دس بنه اون سر، دوعا بوکوده و اون شفا بده. ۹ بزین مریضان دیگری کی جزیره میان ایسه بید، اموییدی و شفا گیتیدی. ۱۰ اوشان، امر خیلی احترام بوکودید. سه ماه بعد، وختی آماده بوستیم کی جه او به بیشیم، هرچی کی احتیاج داشتیم امره فراهم بوکودیدی.

جه جزیره مالت بموییم روم میانی

۱۱ سه ماه بعد آنکی امی کشتی بشکفته، ایتا کشتی دیگر امرای کی اسکندریه شین بو و «جوزا»، یعنی «براران دوقلو»، نام داشتی و توما زمستان او به ایسه بو، دریا جا راه دکفتیم بوشوییم. ۱۲ به سراکیوس کی فارسه ییم، لنگر تاوده ییم و سه روز او به بیسه ییم. ۱۳ بزین امی سفر دریایی ای ادامه بدیم و فارسه ییم ریگیون. فردای او روز، جنوب باد بمو. پس فرداش به پوتیولی فارسه ییم. ۱۴ پوتیولی شهر میانی، ایماندارانی پیدا بوکودیم کی اوشان امر دعوت بوکودیدی ایتا هفته اوشان ورجه بیسیم و هطویی بو کی فارسه ییم روم. ۱۵ قبل آنکی شهر روم میانی فارسه ییم، ایمانداران بیشنوسته بید امان راه میان ایسه ییم و امون دریم. تا «بازار آپوس» و «سه میخانه» طرف امی پیشواز بموییدی. پولس کی اوشان بیده، خودای شکر بوکوده و امیدوار بوسته و قوت قلب بیگفته.

۱۶ وختی فارسه ییم روم، پولس اجازه بدیدی کی هر جا آن دیل خوایه زندگی بوکونه، کی البته خودش خانه میانی ایتا سربازم آن مواظب به.

پولس خو خدمات بشارتی ی روم میان شروع کونه

۱۷ سه روز بو کی روم میانی ایسه بيم، پولس روم پيله آدمان کی يهودیان بيد، دوخواده. وختی اوشان بمويیدی، بوگفته: «ای براران، مر کی کاری بر ضد قوم و اداب و رسوم امی آباجداد نوکوده بوم، اورشليم میان دسگیر و تحویل رومیان بدییدی. ۱۸ اوشان مر بیگفتیدی، جه من بازجویی بوکودید و بخواستیدی مر آزاد کونید، چونکی گوناھی نوکوده بوم کی سزاواژ مرگ بيم. ۱۹ ولی يهودیان می آزادی امرأ مخالفت بوکودیدی. ناچار بوبوستم کی قیصر جا دادخواھی بوکونم، البته نه کی جه يهودیان اورشليم کی می قوم ایسیدی، شکایتی بوکونم. ۲۰ هسه شمر دوخوادم کی شمر بيدیم و بگم کی زنجیری کی می دس دوستید آن وستي يه کی من ایمان دارم مسیح موعود ظهور بوکوده.»

۲۱ اوشانم واگردستیدی بوگفتیدی: «امان هيچ نامه یی جه اونچی کی تره پیش بمو يهوديه جا دریافت نوکودیم و جه هيچ کدام ا براران يهودی کی جه اويه بمويیدی، نيشنوستيم کی بيگيد تو کاری بوکودی یا گوناھی مرتکب بوبوسته بی.»

۲۲ خوشحال بيم اگه تی جا بيشنويم و بدانيم کی تو چی فکر کونی، چونکی بيشنوستيم مردوم، همه جا جه آفره یی کی (مسیحی) نام داره، بدگویی کونیدی.»

۲۳ پس ایتا روز تعیین بوکودید و مردومان زیادی پولس ورجه بمويیدی. اونم ایتا صبح تا شب جه خودا پادشاهی اوشان ره گب بزه و سعی بوکوده جه موسی کیتاب، تورات و بقیه پیغمبران کیتاب کی راجع به عیسی مسیح پادشاهی بینویشته بو، اوشان قانع بوکونه. ۲۴ بعضی جه اوشان اون گبان قوبیل بوکودیدی و ایمان باوردیدی، بعضی هم قوبیل نوکودیدی. ۲۵ هطو کی همدیگر امرأ بحث کودن دیبید، خواستید اويه ترک کونید کی پولس خو آخری گبان بزه و بوگفته: «روح القدس چی درست شیمی آباجداد امرأ گب بزه بو و جه زبان اشعیای نبی بفرمأسته بو. ۲۶ روح خودا او نبی بوگفته:

«(بوشو اقوم بوگو:

«شیمی گوش امرأ ایشنویدی ولی نفهمیدی،

شیمی چومان امرأ دینیدی ولی درک نوکونیدی.»

۲۷ چونکی اقوم ديل سیاه دمرده،

غروز امرأ نخواستیدی قوبیل بوکونید؛

اوشان گوشانم سنگین بوسته،

خوشان چومان دوستیدی،

کی نوکونه چیزی بدینید

و خوشان گوشان امرأ بيشنويد

و خوشآن دیلْ امرأ بفهمید تا بزین واگردید کی من اوشآن شفا بدم.»*

۲۸ پولس بوگفته: «پس بدانید کی خودا آنجات غیریهودیآن ره مهیا بوکوده و اوشآن ایشنوییدی.» ۲۹ وختی پولس خو گبان بزه، وهودیآن کلْ گب زنان خوشآن امرأ جر و بحث بوکودیدی و جه اویه بوشوییدی.

۳۰ پولس دو سالْ تومام خو خانه میان کی اجاره بوکوده بو، زندگی کودی و هر کس کی شویی اون ورجه، اون قوبیل کودی. ۳۱ اون شہامت امرأ، خودا پادشاهی اوشآن ره اعلام کودی و بدون هیچ مانعی، در مورد عیسی مسیح خوداوند اوشآن تعلیم دبی.